



# UNDANG-UNDANG MALAYSIA

---

VERSI DALAM TALIAN TEKS  
CETAKAN SEMULA YANG KEMAS KINI

---

**Akta 176**

**AKTA EKSAIS 1976**

*Sebagaimana pada 1 Julai 2021*

**AKTA EKSAIS 1976**

Tarikh Perkenan Diraja	...	...	...	... 21 Jun 1976
Tarikh diterbitkan dalam <i>Warta</i>	...	...	...	... 24 Jun 1976
Kali terakhir dipinda melalui Akta A1629 yang mula berkuat kuasa pada	...	...	...	... 1 Januari 2021

# UNDANG-UNDANG MALAYSIA

## Akta 176

### AKTA EKSAIS 1976

---

#### SUSUNAN SEKSYEN

---

##### BAHAGIAN I PERMULAAN

###### Seksyen

1. Tajuk ringkas dan pemakaian
2. Tafsiran

##### BAHAGIAN II

##### PELANTIKAN PEGAWAI

3. Fungsi Ketua Pengarah
4. Timbalan Ketua Pengarah dan pegawai lain hendaklah mempunyai kuasa Ketua Pengarah
- 4A. Kuasa pegawai polis
5. Kad kuasa, dsb. hendaklah dikemukakan

##### BAHAGIAN IIA

##### KETETAPAN KASTAM DAN KETETAPAN UMUM

- 5A. Permohonan bagi ketetapan kastam
- 5B. Pembuatan ketetapan kastam
- 5C. Pindaan, pengubahsuaian atau pembatalan ketetapan kastam
- 5D. Ketua Pengarah mengisytiharkan ketetapan sebagai batal, dsb.
- 5E. Penerimaan dua ketetapan kastam
- 5F. Ketetapan umum

## BAHAGIAN III

## MELEVI DUTI EKSAIS

## Seksyen

6. Kuasa menteri untuk menetapkan kadar duti eksais
- 6A. Tiada duti eksais dilevi atas barang-barang *bona fide* dalam pemindahan dan pemindahankapal
7. Nilai barang-barang bagi maksud duti
8. Taksiran duti
- 8A. Pembayaran duti eksais dengan bantahan
- 8B. Ketua Pengarah hendaklah menentukan persoalan tentang penjenisan dan penilaian
9. Kuasa Ketua Pengarah untuk mentaksir semula
10. Kuasa Menteri untuk menetapkan caj bagi pentaksiran
11. Pengecualian duti eksais
- 11A. Menteri boleh meremit duti eksais, dsb.
12. Pengenaan semula duti
13. Memulangkan balik duti atau caj lain yang terlebih bayar atau tersalah bayar
14. Peremitan duti atas barang-barang yang rosak, musnah atau hilang sebelum dikeluarkan daripada kawalan eksais
15. Pembayaran duti, dsb. yang terkurang bayar atau yang dipulangkan balik dengan silap
- 15A. Mendapatkan duti eksais, dsb. daripada orang yang meninggalkan Malaysia
- 15B. Mendapatkan balik duti eksais, dsb., sebagai hutang sivil
16. Kadar duti eksais
17. Pengenaan atau penghapusan duti eksais
18. Persoalan berkenaan dengan barang-barang yang disifatkan sebagai berduti
19. Pulangan cukai
- 19A. Pulangan cukai ke atas barang-barang import
- 19B. Akuan oleh pihak yang menuntut
- 19C. Takrif “eksport semula” dalam seksyen 19A dan 19B
- 19D. (*Dipotong*)
- 19E. Pemulangan balik kepada pelawat dan pemunya sampel
- 19F. Pelepasan duti ke atas barang-barang import untuk sementara

Seksyen

- 19G. Mengimbangi pulangan cukai atau pemulangan balik terhadap amaun terhutang

## BAHAGIAN IV

## PENGILANGAN BARANG-BARANG BERDUTI

20. Lesen untuk menyuling, menapai atau selainnya mengilang barang-barang berduti
21. Tiada seseorang kecuali seorang pengilang berlesen boleh menyimpan alat penyulingan, dsb.
22. Pengecualian
23. Pemindahan barang-barang berduti daripada premis berlesen
- 23A. Penyelesai syarikat hendaklah memberikan notis penggulangan dan mengeneipkan duti
- 23B. Pelantikan penerima hendaklah diberitahu kepada Ketua Pengarah

## BAHAGIAN V

## PENYIMPANAN BARANG-BARANG BERDUTI

24. (*Dipotong*)
25. Lesen gudang
26. Menyimpan dan memiliki barang-barang berduti
27. Meletak dan memindahkan barang-barang berduti
- 27A. Mendeposit barang-barang ke dalam gudang
- 27AB. Mendeposit barang-barang dalam suatu gudang atau tempat lain yang diluluskan oleh Ketua Pengarah
- 27B. Kuasa untuk membuka dan memeriksa bungkusan
- 27C. Penahanan barang-barang jika terdapat keraguan
28. Pengeluaran barang-barang berduti daripada kawalan eksais
29. Pembayaran dius bagi barang-barang dalam gudang eksais awam

## BAHAGIAN VI

## PETROLEUM DAN KELUARAN PETROLEUM

Seksyen

30. Cara pembayaran duti eksais

## BAHAGIAN VII

## PELESENAN

## Seksyen

31. Melantik Lembaga Pelesen
32. Jualan runcit hendaklah dilesen
33. Jualan secara borong hendaklah dilesen
34. Menyimpan liquor yang memabukkan dan yang duti telah dibayar atasnya
35. Jenis lesen
36. Pemegang lesen hendaklah menyimpan akaun, dsb.
37. Pemegang lesen tidak boleh menyimpan liquor berduti dalam premis
38. Seseorang yang tidak berlesen tidak boleh mempamerkan tanda

## BAHAGIAN VIII

## TODI

39. Peraturan-peraturan todi
40. Penalti

## BAHAGIAN VIII A

PERUNTUKAN AM MENGENAI VESEL DALAM  
PERAIRAN WILAYAH

- 40A. Barang-barang yang tidak dibutirkan hendaklah disifatkan sebagai bersalahan eksais
- 40B. Larangan membawa barang-barang berduti dalam lancang tempatan
- 40C. Pemakaian bagi kapal udara

## BAHAGIAN VIII B

## AKUAN BARANG-BARANG

## Seksyen

- 40D. Akuan barang-barang berduti yang diimport
- 40E. Akuan hendaklah membuat pementiran yang penuh dan benar

Seksyen

- 40F. Barang-barang yang telah diakui di stesen pemungutan, bagasi penumpang, barang-barang yang diposkan, dsb. dikecualikan
- 40G. Salinan akuan

#### BAHAGIAN IX

#### PERUNTUKAN PELBAGAI

- 41. Orang adalah diwajibkan memberi maklumat
- 41A. Dokumen hendaklah dikemukakan apabila diminta
- 41B. Rekod yang berhubungan dengan perkara eksais
- 41BA. Kehendak untuk menyediakan terjemahan
- 41C. Ketua stesen kereta api hendaklah mengemukakan inwois dan bil angkutan
- 41D. Barang-barang yang tidak dibutirkan dalam daftar muatan
- 42. Penyampaian notis, dsb.
- 42A. Bagasi penumpang
- 42B. Membungkus barang-barang berduti
- 43. Pegawai yang hak boleh mengambil contoh
- 44. Boleh memasuki tempat atau premis
- 44A. Kuasa Ketua Pengarah untuk menghendaki cagaran
- 44B. Perlindungan terhadap saman dan prosiding undang-undang
- 45. Penambahan atau pengurangan duti baru atau duti yang diubah dalam hal kontrak
- 46. Pekerja boleh mentransaksi urusan
- 47. Kajian semula dan rayuan terhadap keputusan Ketua Pengarah
- 47A. (*Dipotong*)
- 48. Borang yang hendak digunakan
- 49. Perlindungan bagi Kerajaan dan pegawai
- 50. Bayaran bagi perkhidmatan

## BAHAGIAN X

PEMERIKSAAN, PENYIASATAN, PENGGELEDAHAN, PENYITAAN DAN  
PENANGKAPAN

Seksyen

- 50A. Kuasa penguatkuasaan, penyiasatan dan pemeriksaan
- 50B. Kuasa tambahan
  - 51. Majistret boleh mengeluarkan waran geledah
  - 52. Bila penggeledahan boleh dilakukan tanpa waran
  - 53. Kuasa memberhentikan dan menggeledah kereta, vesel dan kapal udara
- 53A. Akses kepada maklumat berekod atau data berkomputer
- 53B. Kuasa untuk membuka bungkus dan memeriksa barang-barang
- 53C. Pemeriksaan orang yang tiba di Malaysia
  - 54. Penyitaan barang-barang hal perkara sesuatu kesalahan
  - 55. Pemulangan atau pelupusan barang-barang
- 55A. Pengemukaan perakuan ahli analisis, atau pegawai kanan eksais, atau orang yang diberi kuasa oleh menteri
  - 56. Kuasa untuk menangkap
- 56A. Kuasa untuk memeriksa orang
- 56B. Kebolehterimaan pernyataan dalam keterangan
- 56C. Tatacara apabila penyiasatan tidak boleh diselesai dalam tempoh dua puluh empat jam
- 56D. Catatan diari semasa penyiasatan
- 56E. Keterangan ejen provokasi boleh diterima

## BAHAGIAN XI

## PERUNTUKAN MENGENAI PERBICARAAN DAN PROSIDING

- 57. (*Dipotong*)
- 58. Mahkamah Kelas Satu mempunyai bidang kuasa penuh
- 59. Beban membuktikan
- 59A. Perintah mahkamah
  - 60. Pemeriksaan sebahagian barang-barang yang disita hendaklah diterima oleh mahkamah
  - 61. Keterangan mengenai analisis boleh diberi secara bertulis



Seksyen

- 61A. Peruntukan keterangan
  - 62. Bukti mengenai pendaftaran atau pelesenan kenderaan dalam Malaysia dan Singapura
  - 62A. Bukti tentang tanan atau binaan sesuatu pesawat
  - 62B. Bukti tentang ketepatan kompas, radar, dsb.
  - 62C. Bukti tentang duti timbal balas, anti-lambakan dan perlindungan yang kena dibayar
  - 63. Cara penyitaan tidak boleh disiasat dalam perbicaraan atau dalam rayuan kepada Mahkamah Tinggi
  - 63A. Kewajipan kerahsiaan
    - 64. Perlindungan pemberi maklumat daripada diketahui
  - 64A. Kerahsiaan maklumat
    - 65. Barang-barang yang boleh dikenakan penyitaan boleh dikenakan lucut hak
    - 66. Mahkamah hendaklah memerintahkan barang-barang yang disita dilupuskan
    - 67. Barang-barang yang disita yang berkenaan dengannya tiada pendakwaan atau hasil jualannya adalah terlucut hak jika tidak dituntut dalam masa satu bulan
    - 68. Barang-barang atau amaun terlucut hak boleh diserahkan atau dibayar balik kepada pemunya atau orang lain
    - 69. Pengkompaunan kesalahan
  - 69A. Kos memegang barang-barang, dokumen atau benda yang disita
    - 70. Tiada apa-apa kos atau ganti rosak yang timbul daripada penyitaan boleh dituntut melainkan jika penyitaan tanpa sebab yang berpatutan

## BAHAGIAN XII

### KESALAHAN DAN PENALTI

- 71. Penalti bagi membuat pernyataan tidak betul dan bagi memalsukan dokumen
- 72. Peruntukan khas berhubung dengan pernyataan, dsb. yang tidak betul, di bawah seksyen 71
- 73. Penalti bagi enggan menjawab soalan atau bagi memberi maklumat palsu
- 74. Penalti bagi perbuatan melarikan duti eksais dan bagi mengilang secara menyalahi undang-undang barang-barang berduti
- 74A. Penalti bagi kesalahan yang berhubungan dengan data yang disimpan dalam komputer
- 74B. Penalti bagi kesalahan yang berhubungan dengan tuntutan pulangan cukai

Seksyen

- 74C. Penalti bagi kesalahan yang berhubungan dengan tuntutan pemulangan balik
- 75. Penalti bagi memiliki alat suling, dsb.
  - 76. Penalti bagi menjual liquor tanpa lesen
  - 77. Penalti bagi menyerang atau menghalang pegawai eksais dan merebut kembali barang-barang
  - 78. Penalti bagi menerima atau menawarkan rasuah dan bagi menyalahgunakan kuasa
  - 79. Kesalahan-kesalahan yang penalti tidak ada diperuntukkan baginya
  - 80. Cubaan dan persubahatan
  - 81. Dihukum penjara kerana tidak membayar denda
- 81A. Tanggungan berse sama dan berasingan pengarah dsb.
- 82. Kesalahan oleh kumpulan orang dan oleh pekhidmat dan ejen
- 82A. Duti eksais, dsb., hendaklah kena dibayar walau apa pun apa-apa prosiding, dsb.
- 83. Hadiah
  - 84. Tindakan pegawai awam tidak menjadi kesalahan

#### BAHAGIAN XIII

#### PERATURAN-PERATURAN

- 85. Kuasa untuk membuat peraturan-peraturan
- 86. Kuasa untuk mewakilkan

#### BAHAGIAN XIV

#### PERUNTUKAN KHAS BERKENAAN DENGAN LABUAN

- 87. Tafsiran
- 88. Barang-barang kena duti di Labuan
- 89. Barang-barang dikilang di Labuan hendaklah disifatkan sebagai barang-barang dikilang di luar Malaysia
- 90. Barang-barang dikilang di Wilayah Persekutuan lain hendaklah disifatkan sebagai dieksport apabila dipindahkan ke Labuan
- 90A. Duti eksais ke atas barang-barang yang diimport masuk ke Labuan atau diangkut ke atau dari Labuan atau ke kawasan utama kastam

Seksyen

- 90B. Pengangkutan barang-barang ke atau dari Labuan dari atau ke kawasan utama kastam
- 90C. Akuan tentang barang-barang yang diangkut dari Labuan ke kawasan utama kastam
- 90D. Barang-barang berduti hendaklah disifatkan sebagai tidak berduti semasa berada di Labuan
- 90E. Pemungutan duti di Labuan
- 90F. Pemakaian peruntukan yang berhubungan dengan pulang balik bagi barang-barang yang di angkut ke Labuan

## BAHAGIAN XV

PERUNTUKAN KHAS BERKENAAN  
DENGAN SABAH DAN SARAWAK

- 91. Perjanjian antara Sabah berhubungan dengan pemindahan barang-barang

## BAHAGIAN XVI

## PERUNTUKAN KHAS BERKENAAN DENGAN LANGKAWI

- 91A. Tafsiran
- 91B. Barang-barang kena duti di Langkawi
- 91C. Barang-barang yang dikilang di Langkawi hendaklah disifatkan sebagai dikilang di luar Malaysia
- 91D. Barang-barang yang dikilang di wilayah-wilayah lain dalam Malaysia hendaklah disifatkan sebagai eksport apabila dipindahkan ke Langkawi
- 91DA. Duti eksais yang berhubungan dengan Langkawi
- 91DB. Pengangkutan barang-barang ke atau dari Langkawi dari atau ke kawasan utama kastam
- 91DC. Akuan tentang barang-barang yang diangkut dari Langkawi ke kawasan utama kastam
- 91DD. Barang-barang berduti hendaklah disifatkan sebagai tidak berduti semasa berada di Langkawi
- 91DE. Pemungutan duti di Langkawi
- 91DF. Pemakaian peruntukan-peruntukan yang berhubungan dengan pulang balik bagi barang-barang yang diangkut ke Langkawi

## BAHAGIAN XV B

PERUNTUKAN KHAS BERKENAAN  
DENGAN TIOMAN

Seksyen

- 91E. Tafsiran
- 91F. Barang-barang kena duti di Tioman
- 91G. Barang-barang yang dikilang di Tioman hendaklah disifatkan telah dikilang di luar Malaysia
- 91H. Barang-barang yang dikilang di wilayah-wilayah lain di dalam Malaysia hendaklah disifatkan telah dieksport apabila dipindahkan ke Tioman
- 91I. Duti eksais yang berhubungan dengan Tioman
- 91J. Pengangkutan barang-barang ke atau dari Tioman dari ke dari kawasan utama kastam
- 91K. Akuan barang-barang yang diangkut dari Tioman ke kawasan utama kastam
- 91L. Barang-barang berduti hendaklah disifatkan sebagai tidak berduti semasa berada di Tioman
- 91M. Pemungutan duti di Tioman
- 91N. Pemakaian peruntukan yang berhubungan dengan pulang balik bagi barang-barang yang diangkut ke Tioman

## BAHAGIAN XV C

PERUNTUKAN KHAS BERKENAAN DENGAN KAWASAN  
PEMBANGUNAN BERSAMA

- 91O. Pemindahan barang ke dalam atau dari Kawasan Pembangunan Bersama
- 91P. Duti eksais kena dibayar ke atas pengimportan ke dalam Kawasan Pembangunan Bersama

## BAHAGIAN XV D

## PERUNTUKAN KHAS BERKENAAN DENGAN PANGKOR

- 91Q. Tafsiran
- 91R. Barang-barang kena duti di Pangkor
- 91S. Barang-barang yang dikilang di Pangkor hendaklah disifatkan sebagai dikilang di luar Malaysia

## Seksyen

- 91t. Barang-barang yang dikilang di wilayah-wilayah lain dalam Malaysia hendaklah disifatkan sebagai dieksport apabila dipindahkan ke dalam Pangkor
- 91u. Duti eksais yang berhubungan dengan Pangkor
- 91v. Pengangkutan barang-barang ke atau dari Pangkor dari atau ke kawasan utama kastam
- 91w. Akaun mengenai barang-barang yang diangkut dari Pangkor ke kawasan utama kastam
- 91x. Barang-barang berduti hendaklah disifatkan sebagai tidak berduti semasa berada di Pangkor
- 91y. Pemungutan duti di Pangkor
- 91z. Pemindahan peruntukan yang berhubungan dengan pulangan cukai bagi barang-barang yang diangkut ke Pangkor

## BAHAGIAN XVI

## PEMANSUHAN

- 92. Pemansuhan dan kecualian

## JADUAL



## UNDANG-UNDANG MALAYSIA

### Akta 176

### AKTA EKSAIS 1976

Suatu Akta bagi meminda dan menyatukan undang-undang berhubung dengan eksais dalam Malaysia.

[1 Julai 1977, P.U. (B) 351/77]

**MAKA INILAH DIPERBUAT UNDANG-UNDANG** oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti yang berikut:

#### BAHAGIAN I

#### PERMULAAN

#### Tajuk ringkas dan pemakaian

1. (1) Akta ini bolehlah dinamakan Akta Eksais 1976, dan hendaklah mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

(2) Akta ini hendaklah terpakai di seluruh Malaysia.

#### Tafsiran

2. (1) Dalam Akta ini, melainkan jika konteksnya menghendaki makna yang lain—

“alkohol” ertinya alkohol etil;

“barang-barang” mempunyai erti yang diberi oleh subseksyen 2(1) Akta Kastam 1967 [*Akta 235*];

“barang-barang berduti” ertinya barang-barang yang tertakluk kepada pembayaran duti eksais dan yang atasnya duti itu belum dibayar;

“barang menyalahi eksais” ertinya barang-barang yang berkenaan dengannya suatu pelanggaran terhadap peruntukan Akta ini atau mana-mana perundangan subsidiari yang dibuat di bawahnya telah dilakukan;

“bir” termasuklah *ale*, *stout*, *porter* dan segala liquor tapaian lain yang dibuat daripada *malt*;

“botol” termasuklah apa-apa bekas, tidak melebihi dua liter muatannya, bagi liquor yang memabukkan, yang boleh disumbat dengan gabus atau ditutup, dan “membotolkan” hendaklah ditafsirkan dengan sewajarnya;

“depot pelepasan darat” mempunyai erti yang diberikan kepadanya oleh subseksyen 2(1) Akta Kastam 1967;

“dokumen” mempunyai erti yang diberikan kepadanya dalam seksyen 3 Akta Keterangan 1950 [*Akta 56*];

“duti eksais” ertinya apa-apa duti yang ditetapkan di bawah seksyen 6;

“ejen” mempunyai erti yang diberikan kepadanya oleh subseksyen 2(1) Akta Kastam 1967;

“eksport” mempunyai erti yang diberi oleh subseksyen 2(1) Akta Kastam 1967;

“ketetapan kastam” ertinya ketetapan kastam yang dibuat oleh Ketua Pengarah di bawah seksyen 5B;

“gudang berlesen” ertinya gudang atau tempat lain yang dilesenkan di bawah seksyen 25 bagi penggudangan barang-barang berduti, termasuklah—



- (a) gudang kastam di bawah seksyen 63;
- (b) mana-mana gudang yang dilesenkan di bawah seksyen 65 dan 65A;
- (ba) mana-mana kedai bebas cukai yang dilesenkan di bawah seksyen 65D; dan
- (c) mana-mana depot pelepasan daratan yang dilesenkan di bawah seksyen 65E,

Akta Kastam 1967, bagi penggudangan barang-barang yang serupa kelasnya dengan barang-barang berduti tersebut;

“import” mempunyai erti yang diberikan kepadanya oleh subseksyen 2(1) Akta Kastam 1967;

“jalan” mempunyai erti yang diberikan kepadanya oleh subseksyen 2(1) Akta Kastam 1967 [*Akta 235*];

“juruterbang pesawat udara” mempunyai erti yang diberikan kepadanya oleh subseksyen 2(1) Akta Kastam 1967;

“kapal udara” mempunyai erti yang diberi oleh subseksyen 2(1) Akta Kastam 1967;

“kawalan kastam” mempunyai erti yang diberikan kepadanya oleh subseksyen 2(1) Akta Kastam 1967;

“kedai bebas cukai” mempunyai erti yang diberikan kepadanya oleh subseksyen 2(1) Akta Kastam 1967;

“ketetapan umum” ertinya ketetapan umum yang dibuat oleh Ketua Pengarah di bawah seksyen 5F;

“Ketua Pengarah” mempunyai erti yang diberi oleh subseksyen 2(1) Akta Kastam 1967;

“komputer” mempunyai erti yang diberikan kepadanya dalam seksyen 3 Akta Keterangan 1950;

“lancang tempatan” mempunyai erti yang diberikan kepadanya oleh subseksyen 2(1) Akta Kastam 1967;

“lapangan terbang kastam” mempunyai erti yang diberikan kepadanya oleh subseksyen 2(1) Akta Kastam 1967;

“laut” mempunyai erti yang diberikan kepadanya oleh subseksyen 2(1) Akta Kastam 1967;

“Lembaga Pelesenan” ertinya sesuatu Lembaga yang ditubuhkan di bawah seksyen 31;

“liquor bumiputera” ertinya mana-mana daripada liquor yang memabukkan dan yang lazimnya ditapai, dibuat atau disediakan oleh bumiputera di Sabah dan Sarawak untuk kegunaan mereka sendiri dan bukan untuk kegunaan komersial;

“liquor yang memabukkan” mempunyai erti yang diberi oleh subseksyen 2(1) Akta Kastam 1967;

“Menteri” ertinya Menteri yang bertanggungjawab atas kewangan;

“nakhoda” mempunyai erti yang diberikan kepadanya oleh subseksyen 2(1) Akta Kastam 1967;

“nilai” ertinya—

(a) berhubung dengan barang-barang yang dikilangkan secara tempatan, nilai ditentukan di bawah perenggan 85(2)(*bd*); dan

(b) berhubung dengan barang-barang yang diimport—

(i) nilai barang-barang itu bagi maksud duti kastam sebagaimana yang ditentukan mengikut Akta Kastam 1967; dan

- (ii) amaun duti kastam, jika ada, yang kena dibayar atas barang-barang itu.

“pegawai eksais” ertinya—

- (a) seseorang pegawai kastam sebagaimana yang ditakrifkan dalam subseksyen 2(1) Akta Kastam 1967;
- (b) (*Dipotong oleh Akta A1594*);

“pegawai kanan eksais” ertinya—

- (a) Ketua Pengarah;
- (b) mana-mana Timbalan Ketua Pengarah Kastam dan Eksais yang dilantik di bawah subseksyen 3(1) Akta Kastam 1967;
- (c) mana-mana Penolong Ketua Pengarah, Pengarah, Timbalan Pengarah, Penolong Kanan Pengarah dan Penolong Pengarah Kastam yang dilantik di bawah subseksyen 3(1) Akta Kastam 1967;
- (d) mana-mana Penguasa Kanan, Penguasa, Penolong Penguasa Tinggi, Penolong Penguasa Kanan atau Penolong Penguasa Kastam yang dilantik di bawah subseksyen 3(4) Akta Kastam 1967;
- (e) mana-mana pegawai eksais yang diberi kuasa seorang pegawai kanan eksais di bawah subseksyen 4(2) atau (3);
- (f) mana-mana pegawai polis yang mempunyai kuasa seorang pegawai kanan eksais menurut seksyen 4A;

“pegawai yang hak” ertinya seseorang pegawai eksais yang bertindak untuk melaksanakan kewajipan di bawah Akta ini, sama ada kewajipan itu diuntukkan kepadanya secara khas atau secara am atau secara nyata atau secara fahaman; dan tiap-tiap orang, sama ada seorang pegawai eksais atau bukan, yang bertugas dengan perintah atau dengan persetujuan Ketua Pengarah (sama ada dinyatakan

terdahulu atau kemudiannya) pada menjalankan apa-apa perbuatan atau kewajiban berhubung dengan sesuatu perkara yang diuntukkan yang, menurut undang-undang adalah dikehendaki atau dibenarkan supaya dijalankan oleh atau dengan seorang pegawai eksais hendaklah disifatkan sebagai pegawai yang hak yang olehnya atau dengannya perbuatan atau kewajiban itu hendak dijalankan, dan seseorang yang sedemikian disifatkan sebagai pegawai yang hak adalah mempunyai segala kuasa seorang pegawai eksais berhubung dengan perbuatan atau kewajiban itu;

“pelabuhan kastam” mempunyai erti yang diberikan kepadanya oleh subseksyen 2(1) Akta Kastam 1967;

“pemegang lesen” ertinya mana-mana orang yang dilesen di bawah seksyen 25 atau 35;

“pemindahan” mempunyai erti yang diberikan kepadanya oleh subseksyen 2(1) Akta Kastam 1967;

“pemindahan kapal” mempunyai erti yang diberikan kepadanya oleh subseksyen 2(1) Akta Kastam 1967;’;

“pemunya”—

(a) berkenaan dengan barang-barang, termasuklah mana-mana orang (selain seorang pegawai eksais yang bertugas atas sifat rasminya) yang adalah atau mengemukakan dirinya sebagai pemunya, pengimport, pengilang, pemasang, penerima kiriman, ejen atau orang yang memiliki, atau yang mempunyai kepentingan berfaedah atas, atau yang mengawal, atau berkuasa melupuskan, barang-barang itu; dan

(b) berkenaan dengan tanah, ertinya tuan punya berdaftar atau pemunya di sisi undang-undang atau pemegang melalui pemegangan di sisi adat bagi mana-mana tanah;

“penduduk” termasuklah seseorang pemegang pajakan atau penyewa atau seseorang yang memiliki, menguruskan atau mengawal mana-mana tanah atau premis;

“pengangkut” mempunyai erti yang diberikan kepadanya oleh subseksyen 2(1) Akta Kastam 1967;

“pengangkut berlesen” mempunyai erti yang diberikan oleh subseksyen 2(1) Akta Kastam 1967;

“pengilang berlesen” ertinya mana-mana orang yang dilesen di bawah seksyen 20;

“pengilangan” ertinya—

(a) mengenai liquor yang memabukkan, menyuling, membru, menapai, membotolkan liquor yang memabukkan, dan termasuklah menambah sesuatu bahan (lain daripada air) kepada sesuatu liquor yang memabukkan dan mencampur, mensebatikan dan mengubah liquor yang memabukkan dengan tujuan supaya sebatian yang dihasilkan sedemikian dijual untuk kegunaan manusia, tetapi tidak termasuk sesuatu sebatian yang dibuat atas pesanan pembeli, dan untuk kegunaannya yang segera:

Dengan syarat bahawa mengenai todi, adalah juga termasuk menyadap, membotolkan dan mengetinkan todi;

(b) mengenai tembakau, apa-apa proses mengubahjadikan apa-apa tembakau mentah atau daun tembakau kepada tembakau yang layak untuk dihisap, disedut atau dikunyah dan termasuklah membuat rokok daripada tembakau yang telah dikilang;

(c) berhubung dengan petroleum, proses penapisan yang termasuk pemisahan, penukaran, penulenan dan pengadunan aliran penapisan atau aliran petrokimia; dan

(d) mengenai hal-hal lain, mengubahjadikan dengan tangan atau dengan cara mekanikal bahan-bahan organik atau tidak organik kepada suatu keluaran baru dengan menukar saiz, bentuk, kandungan, jenis atau kualiti bahan tersebut dan termasuklah memasang bahagian-bahagian supaya menjadi

suatu jentera atau keluaran lain, tetapi tidaklah termasuk pemasangan jentera atau alat kelengkapan bagi maksud pembinaan;

“pengimport” mempunyai erti yang diberikan kepadanya oleh subseksyen 2(1) Akta Kastam 1967;

“pertukaran data elektronik” ertinya pemindahan, dari komputer ke komputer, transaksi perdagangan dan pentadbiran dengan menggunakan standard perutusan yang dipersetujui untuk menstrukturkan data yang berhubungan dengan sesuatu transaksi;

“petroleum” mempunyai erti yang diberikan oleh seksyen 2(1) Akta Kastam 1967;

“premis berlesen” termasuklah mana-mana gudang, kawasan atau tempat yang berlesen di bawah seksyen 20, 24, 25 dan 35 Akta ini dan di bawah seksyen 65 dan 65A Akta Kastam 1967;

“rokok” ertinya rokok yang dibuat daripada tembakau sama ada dengan atau tanpa apa-apa ramuan tambahan yang lain dan termasuklah apa-apa jenis pangkal dan kertas rokok;

“stesen pemungutan” mempunyai erti yang diberikan kepadanya oleh subseksyen 2(1) Akta Kastam 1967;

“surcaj” ertinya apa-apa caj yang genap masa dan kena dibayar di bawah subseksyen 15(3);

“tembakau” termasuklah tembakau yang dikilang atau belum dikilang dari tiap-tiap jenis, termasuk tangkai tembakau dan lebih-lebih tembakau tetapi tidak termasuk tembakau belum diawet;

“tembakau belum diawet” ertinya daun tembakau mentah yang belum lagi dikenakan apa-apa proses pengeringan atau pengawetan;

“tempat pendaratan yang sah di sisi undang-undang” mempunyai erti yang diberikan kepadanya oleh subseksyen 2(1) Akta Kastam 1967;

“todi” ertinya nira kelapa atau nira palma lain yang telah ditapai;

“Tribunal Rayuan Kastam” ertinya Tribunal Rayuan Kastam yang ditubuhkan di bawah seksyen 141B Akta Kastam 1967.

(1A) Bagi maksud Akta ini, suatu zon bebas hendaklah disifatkan sebagai suatu tempat di luar kawasan utama kastam, dan peruntukan Bahagian VII dan VIII A dan seksyen 76 hendaklah terpakai bagi zon bebas.

(1B) Bagi maksud subseksyen (1A)—

- (a) “zon bebas” ertinya mana-mana kawasan di dalam Malaysia yang telah diisytihar oleh Menteri sebagai suatu zon perdagangan bebas atau zon perindustrian bebas di bawah Akta Zon Bebas 1990 [*Akta 438*]; dan
- (b) “kawasan utama kastam” ertinya mana-mana bahagian Malaysia tidak termasuk zon bebas, Labuan, Langkawi, Tioman dan Pangkor.

(2) Bagi maksud Akta ini barang-barang hendaklah disifatkan sebagai di bawah kawalan eksais selama masa barang-barang itu diletakkan atau dipegang dalam mana-mana tempat suling, bruari atau tempat pengilangan lain, atau dalam gudang berlesen, suatu gudang atau tempat lain yang diluluskan oleh Ketua Pengarah, pejabat pos, atau di dalam mana-mana pengangkut dari mana barang-barang itu tidak boleh dipindahkan kecuali dengan kebenaran pegawai yang hak.

## BAHAGIAN II

### PELANTIKAN PEGAWAI

#### **Fungsi Ketua Pengarah**

3. Ketua Pengarah hendaklah menjadi Ketua Pegawai Eksais dan hendaklah menguasai segala perkara berhubung dengan eksais, tetapi tertakluk kepada arahan dan kawalan Menteri.

**Timbalan Ketua Pengarah dan pegawai lain hendaklah mempunyai kuasa Ketua Pengarah**

4. (1) Seseorang Timbalan Ketua Pengarah, Penolong Ketua Pengarah, Pengarah, Timbalan Pengarah, Penolong Kanan Pengarah dan Penolong Pengarah Kastam dan Eksais yang dilantik di bawah seksyen 3 Akta Kastam 1967, hendaklah, tertakluk kepada arahan dan pengawasan am Ketua Pengarah, mempunyai dan menjalankan semua kuasa yang diberi kepada Ketua Pengarah oleh atau di bawah Akta ini, selain kuasa yang diberikan oleh seksyen 18.

(2) Ketua Pengarah boleh, melalui pemberian kuasa secara bertulis memberi kepada mana-mana pegawai eksais, yang bukan seorang pegawai kanan eksais, semua atau mana-mana daripada kuasa seseorang pegawai kanan eksais selama tempoh tidak melebihi sembilan puluh hari berkenaan dengan mana-mana satu pemberian kuasa.

(3) Menteri boleh, melalui pemberitahuan dalam *Warta*, memberi kepada mana-mana pegawai eksais yang bukan seorang pegawai kanan eksais semua atau mana-mana daripada kuasa seseorang pegawai kanan eksais.

**Kuasa pegawai polis**

4A. Bagi maksud Akta ini, semua pegawai polis yang bukan di bawah pangkat Inspektor hendaklah mempunyai dan boleh melaksanakan semua kuasa yang diberi oleh Bahagian X Akta ini ke atas pegawai kanan eksais, dan semua pegawai polis di bawah pangkat Inspektor hendaklah mempunyai dan boleh melaksanakan semua kuasa yang diberi oleh Bahagian X Akta ini ke atas pegawai eksais.

**Kad kuasa, dsb. hendaklah dikemukakan**

5. (1) Tiap-tiap pegawai eksais apabila bertindak terhadap seseorang di bawah Akta ini hendaklah, jika tidak memakai uniform, apabila dikehendaki, menyatakan jawatannya dan mengemukakan



kepada orang yang terhadapnya dia bertindak itu sesuatu lencana atau kad kuasa yang dia telah diarahkan supaya membawanya di bawah subseksyen 9(1) Akta Kastam 1967.

(2) Tidaklah menjadi suatu kesalahan bagi seseorang untuk enggan mematuhi apa-apa permintaan, kehendak atau perintah yang dibuat oleh seseorang pegawai eksais yang bertindak atau berupa sebagai bertindak di bawah Akta ini, jika pegawai itu tidak memakai uniform dan enggan menyatakan jawatannya dan enggan mengemukakan lencana atau kad kuasanya apabila dikehendaki oleh orang itu.

## BAHAGIAN IIA

### KETETAPAN KASTAM DAN KETETAPAN UMUM

#### **Permohonan bagi ketetapan kastam**

**5A.** (1) Mana-mana orang boleh memohon, dalam borang yang ditetapkan berserta dengan fi yang ditetapkan, kepada Ketua Pengarah bagi suatu ketetapan kastam berkenaan dengan mana-mana satu atau lebih perkara yang berikut:

- (a) penjenisan barang-barang;
- (b) prinsip-prinsip yang diterima pakai bagi maksud menentukan nilai sesuatu barang; atau
- (c) apa-apa perkara lain yang hendaklah ditetapkan oleh Ketua Pengarah.

(2) Permohonan di bawah subseksyen (1) boleh dibuat—

- (a) berkenaan dengan barang-barang import—
  - (i) pada bila-bila masa sebelum barang-barang itu, yang menjadi hal perkara permohonan, diimport atau dimaksudkan untuk diimport ke Malaysia; atau

- (ii) pada bila-bila masa kemudiannya, jika Ketua Pengarah atas budi bicaranya membenarkan; atau

(b) berkenaan dengan barang-barang yang dikilangkan—

- (i) pada bila-bila masa sebelum barang-barang itu, yang menjadi hal perkara permohonan, dikilangkan; atau

- (ii) pada bila-bila masa kemudiannya, jika Ketua Pengarah atas budi bicaranya membenarkan.

(3) Seseorang pemohon boleh menarik balik permohonannya pada bila-bila masa sebelum sesuatu ketetapan kastam dibuat dan apa-apa bayaran yang dibuat yang berhubungan dengan permohonan bagi ketetapan kastam itu hendaklah dilucuthakkan oleh Ketua Pengarah.

### **Pembuatan ketetapan kastam**

**5B.** (1) Tertakluk kepada subseksyen (3), Ketua Pengarah hendaklah membuat suatu ketetapan kastam berkenaan dengan apa-apa perkara yang dinyatakan dalam permohonan yang dibuat di bawah seksyen 5A dan ketetapan itu hendaklah mengikat pemohon itu.

(2) Apa-apa ketetapan kastam boleh tertakluk kepada apa-apa syarat yang Ketua Pengarah sifatkannya patut dikenakan.

(3) Ketua Pengarah boleh menolak untuk membuat ketetapan kastam jika, pada pendapatnya—

- (a) maklumat yang diberikan oleh pemohon tidak mencukupi untuk berbuat demikian;

(b) permohonan itu adalah bagi suatu keadaan andaian; atau

- (c) suatu kajian semula atau suatu rayuan di bawah Akta ini yang melibatkan hal perkara yang dirujuk dalam permohonan itu masih belum selesai.

**Pindaan, pengubahsuaian atau pembatalan ketetapan kastam**

**5c.** (1) Sesuatu ketetapan kastam boleh dipinda, diubah suai atau dibatalkan oleh Ketua Pengarah jika—

- (a) ia mengandungi suatu kesilapan yang perlu diperbetulkan;
- (b) ketetapan kastam itu diasaskan kepada kesilapan fakta atau undang-undang;
- (c) terdapat perubahan dalam undang-undang yang berhubungan dengan eksais; atau
- (d) terdapat perubahan dalam fakta material atau hal keadaan yang menjadi asas ketetapan itu.

(2) Ketua Pengarah hendaklah, sebaik selepas membuat pindaan, pengubahsuaian atau pembatalan itu, memberi notis secara bertulis kepada pemohon mengenai pindaan, pengubahsuaian atau pembatalan itu dan, tertakluk kepada subseksyen (3), ketetapan yang dipinda, diubah suai atau dibatalkan itu hendaklah mula berkuat kuasa dari tarikh yang dinyatakan dalam notis.

(3) Walau apa pun subseksyen (2), jika sesuatu ketetapan kastam mempunyai kesan menyebabkan atau menaikkan apa-apa liabiliti duti berkenaan dengan mana-mana barang, dan—

- (a) barang-barang itu diimport dalam masa tiga bulan dari tarikh notis pindaan, pengubahsuaian atau pembatalan itu diberi menurut suatu kontrak mengikat yang dibuat sebelum tarikh itu;
- (b) barang-barang itu telah meninggalkan tempat pengilangan atau gudang di negara yang daripadanya barang-barang itu dieksport untuk dihantar terus ke Malaysia pada tarikh notis pindaan, pengubahsuaian atau pembatalan ketetapan itu diberi; atau

- (c) barang-barang itu diimport pada atau sebelum tarikh notis pindaan, pengubahsuaian atau pembatalan itu diberi tetapi belum dilepaskan untuk penggunaan tempatan,

maka ketetapan kastam yang telah dibuat sebelum pindaan, pengubahsuaian atau pembatalan di bawah seksyen ini hendaklah terpakai bagi barang-barang itu.

(4) Walau apa pun subseksyen (2), dan tertakluk kepada seksyen 13, jika pindaan, pengubahsuaian atau pembatalan sesuatu ketetapan kastam mempunyai kesan menurunkan apa-apa liabiliti duti berkenaan dengan apa-apa barang, apa-apa cukai yang lebih tinggi yang telah dibayar hendaklah dikira seolah-olah ia telah dibayar dengan khilaf.

#### **Ketua Pengarah mengisytiharkan ketetapan sebagai batal, dsb.**

**5D.** Ketua Pengarah hendaklah melalui notis mengisytiharkan sesuatu ketetapan kastam yang dibuat di bawah seksyen 5B sebagai batal, tidak sah dan tiada kesan jika ketetapan itu telah diperolehi oleh pemohon secara fraud, salah nyataan atau pemalsuan fakta.

#### **Penerimaan dua ketetapan kastam**

**5E.** Jika seseorang pemohon menerima dua atau lebih ketetapan kastam yang berbeza mengenai hal perkara yang sama, ketetapan itu hendaklah disifatkan sebagai batal dan tidak sah dan pemohon itu hendaklah dengan serta-merta memberitahu Ketua Pengarah yang hendaklah, dalam masa tiga puluh hari dari tarikh pemberitahuan itu, mengeluarkan suatu ketetapan kastam yang baharu.

#### **Ketetapan umum**

**5F.** (1) Ketua Pengarah boleh, pada bila-bila masa, membuat suatu ketetapan umum bagi pemakaian mana-mana peruntukan Akta ini.

(2) Ketua Pengarah boleh menarik balik, sama ada secara keseluruhan atau sebahagian, apa-apa ketetapan umum yang dibuat di bawah seksyen ini.

### BAHAGIAN III

#### MELEVI DUTI EKSAIS

#### **Kuasa Menteri untuk menetapkan kadar duti eksais**

6. (1) Menteri boleh, dari semasa ke semasa, melalui perintah yang disiarkan dalam *Warta*, menetapkan duti-duti eksais yang hendaklah dilevi dan dibayar atas—

(a) apa-apa barang yang dikilang dalam Malaysia; atau

(b) apa-apa barang yang diimport ke dalam Malaysia,

dan boleh menetapkan cara-cara yang mengikutnya duti itu hendaklah dilevi dan dibayar.

(2) Sesuatu perintah yang dibuat di bawah subseksyen (1) hendaklah dibentangkan di meja Dewan Rakyat pada mesyuarat Dewan Rakyat yang pertama diadakan selepas perintah itu dibuat, dan hendaklah, apabila tamat seratus dua puluh hari daripada tarikh dibentangkan sedemikian atau apabila tamat sesuatu tempoh lanjutan yang diarahkan oleh Dewan Rakyat melalui ketetapan, terhenti berkuat kuasa jika dan setakat mana perintah itu tidak disahkan dengan suatu ketetapan yang diluluskan oleh Dewan Rakyat dalam masa seratus dua puluh hari yang tersebut itu atau, jika tempoh itu telah dilanjutkan, dalam tempoh lanjutan itu.

(3) Jika sesuatu perintah terhenti berkuat kuasa pada keseluruhannya atau pada sebahagiannya sebagaimana diperuntukkan oleh subseksyen (2), maka apa-apa duti yang dilevi menurut perintah itu-atau, mengikut mana yang berkenaan, menurut bahagian perintah yang terhenti berkuat kuasa itu hendaklah, tertakluk kepada

subseksyen (4), kena dibayar balik kepada orang yang daripadanya duti itu telah dilevi.

(4) Melainkan jika diarahkan selainnya oleh Menteri, tiada sesuatu duti yang kena dibayar balik di bawah subseksyen (3) boleh dibayar balik di bawah subseksyen (3) boleh dibayar balik melainkan jika orang yang berhak mendapat pembayaran balik itu membuat suatu tuntutan mengenainya kepada Ketua Pengarah dalam tempoh satu tahun dari tarikh perintah itu terhenti berkuat kuasa pada keseluruhannya atau pada sebahagiannya sebagaimana diperuntukkan oleh subseksyen (2).

(5) Sesuatu tuntutan itu hendaklah dibuat secara bertulis dan hendaklah mengandungi butir-butir yang dikehendaki oleh Ketua Pengarah melalui perintah am atau khas.

(6) (*Dipotong oleh Akta A1594*).

### **Tiada duti eksais dilevi atas barang-barang *bona fide* dalam pemindahan dan pemindahankapal**

6A. Bagi maksud melewi duti eksais, barang-barang *bona fide* dalam pemindahan, termasuk barang-barang bagi pemindahankapal, tidak boleh disifatkan sebagai diimport melainkan jika barang-barang itu adalah atau telah menjadi barang-barang menyalahi eksais.

### **Nilai barang-barang bagi maksud duti**

7. Menteri boleh, dari semasa ke semasa, melalui pemberitahuan dalam *Warta*, menetapkan, bagi maksud melewi dan membayar duti eksais, nilai bagi sesuatu barang berduti.

### **Taksiran duti**

8. (1) Pegawai yang hak boleh, berkenaan dengan apa-apa barang berduti atau barang-barang menyalahi eksais—

- (a) menetapkan kelas barang-barang yang di dalamnya barang-barang berduti atau barang-barang menyalahi eksais itu tergolong; dan
- (b) menilai, menimbang, menyukat atau selainnya memeriksa atau menyebabkan supaya dinilai, ditimbang, disukat atau selainnya diperiksa barang-barang berduti atau barang-barang menyalahi eksais itu,

bagi maksud menentukan amaun duti eksais yang boleh dilevi ke atasnya.

(2) Segala kerja yang perlu berhubung dengan menimbang, menyukat dan memeriksa barang-barang berduti hendaklah dijalankan oleh atau atas perbelanjaan pemunya barang-barang itu atau ejennya:

Dengan syarat bahawa pegawai yang hak itu boleh, menurut budi bicaranya, mengarahkan supaya mana-mana kerja itu dijalankan oleh orang di bawah kawalannya, dan walau bagaimanapun kerja-kerja itu hendaklah dijalankan atas perbelanjaan pemunya barang-barang itu atau ejennya.

(3) Apabila penilaian apa-apa barang telah dibuat oleh pegawai yang hak maka penilaian itu hendaklah dianggap sebagai betul sehingga dibuktikan sebaliknya.

### **Pembayaran duti eksais dengan bantahan**

**8A.** Mana-mana orang yang tidak berpuas hati dengan keputusan pegawai yang hak di bawah subseksyen 8(1) tentang sama ada mana-mana barang tertentu termasuk atau tidak termasuk dalam suatu kelas barang yang terdapat dalam sesuatu perintah yang dibuat di bawah subseksyen 6(1) atau dengan penilaian, penimbangan, penyukatan atau pemeriksaan mana-mana barang boleh membayar duti eksais yang dilevi dengan bantahan.

**Ketua Pengarah hendaklah menentukan persoalan tentang penjenisan dan penilaian**

**8B.** Jika duti eksais telah dibayar secara bantahan, pegawai yang hak hendaklah, dalam masa tiga puluh hari daripada pembayaran itu dibuat, merujuk apa-apa persoalan mengenai penjenisan atau penilaian barang-barang kepada Ketua Pengarah untuk keputusannya.

**Kuasa Ketua Pengarah untuk mentaksir semula**

**9.** Apabila Ketua Pengarah ada sebab bagi mempercayai atau mengesyaki bahawa kuantiti atau kualiti barang-barang berduti yang dibuat daripada sesuatu kuantiti atau kualiti tertentu bahan mentah atau bahagian komponen adalah kurang kuantitinya atau rendah kualitinya daripada yang sepatutnya telah diperolehi daripadanya, Ketua Pengarah boleh mentaksir semula duti yang kena dibayar pada sesuatu kuantiti yang lebih besar atau sesuatu kualiti yang lebih tinggi sebagaimana yang difikirkannya patut. Tiap-tiap taksiran yang dibuat oleh Ketua Pengarah di bawah Akta ini hendaklah disifatkan sebagai betul.

**Kuasa Menteri untuk menetapkan caj bagi pentaksiran**

**10.** Menteri boleh dengan perintah menetapkan caj-caj yang dikehendaki dibayar bagi kerja-kerja yang dijalankan di bawah seksyen 8 oleh pegawai eksais atau orang lain di bawah kawalan pegawai yang hak, dan boleh meremit apa-apa caj yang kena dibayar.

**Pengecualian duti eksais**

**11.** (1) Menteri boleh dengan perintah mengecualikan, tertakluk kepada apa-apa syarat yang difikirkannya patut dikenakan, mana-mana kelas barang atau orang daripada membayar kesemua atau sesuatu bahagian daripada mana-mana duti eksais atau apa-apa fi atau caj lain yang ditetapkan yang kena dibayar.

(2) Menteri boleh dalam sesuatu kes tertentu:



- (a) mengecualikan mana-mana orang daripada membayar kesemua atau sesuatu bahagian daripada duti eksais atau apa-apa fi atau caj lain yang ditetapkan yang kena dibayar oleh orang itu atas apa-apa barang; atau
- (b) boleh mengarah dipulangkan balik kepada mana-mana orang kesemua atau sesuatu bahagian daripada duti eksais atau apa-apa fi atau caj lain yang ditetapkan yang telah dibayar oleh orang itu atas apa-apa barang,

dan pada memberi pengecualian itu atau pada mengarahkan pemulangan balik itu, boleh mengenakan apa-apa syarat yang difikirkannya patut.

(3) Apa-apa barang-barang yang mengenainya sesuatu pengecualian daripada membayar duti eksais telah diberi di bawah subseksyen (1) atau (2) hendaklah disifatkan sebagai barang-barang berduti sehingga syarat-syarat, jika ada, yang tertakluk kepadanya pengecualian daripada duti itu diberi adalah dipenuhi, dan boleh dikenakan segala caj lain, yang bukan duti eksais, yang kepadanya barang-barang itu sepatutnya tertakluk jika sekiranya tiada sesuatu pengecualian itu telah diberi.

### **Menteri boleh meremit duti eksais, dsb.**

**11A.** (1) Menteri boleh, jika difikirkannya adil dan saksama untuk berbuat demikian, dan tertakluk kepada apa-apa syarat sebagaimana yang difikirkannya patut dikenakan, meremit keseluruhan atau mana-mana bahagian duti eksais, surcaj, penalti, fi atau wang lain yang kena dibayar di bawah Akta ini.

(2) Jika seseorang telah membayar apa-apa duti eksais, surcaj, penalti, fi atau wang lain yang kena dibayar di bawah Akta ini yang baginya peremitan telah diberi di bawah subseksyen (1), orang itu berhak kepada suatu pemulangan balik duti eksais, surcaj, penalti, fi atau wang lain yang telah diremitkan itu.

**Pengenaan semula duti**

**12.** (1) Jika mana-mana daripada syarat-syarat yang dikenakan atas sesuatu barang yang duti eksais belum dibayar, iaitu syarat-syarat yang tertakluk kepadanya pengecualian daripada duti diberi di bawah seksyen 11, telah tidak dipatuhi, atau barang itu tidak lagi disimpan atau digunakan oleh orang atau bagi maksud-maksud yang melayakkan barang itu diberi pengecualian itu, maka barang itu boleh, apabila syarat-syarat itu tidak dipatuhi atau apabila barang itu tidak lagi disimpan atau digunakan sedemikian, dikenakan duti eksais dan orang yang diberi pengecualian itu dan mana-mana orang yang didapati memiliki barang itu adalah bersesama dan masing-masing bertanggung membayar duti eksais itu.

(2) Jika apa-apa barang yang boleh dikenakan duti eksais di bawah subseksyen (1) dan yang atasnya duti itu belum dibayar adalah dijumpai dalam milik atau pada premis mana-mana orang lain daripada orang yang dibenarkan memilikinya di bawah syarat pengecualian itu, maka barang itu hendaklah, sehingga dibuktikan sebaliknya, disifatkan sebagai barang-barang berduti dalam erti Akta ini.

**Memulangkan balik duti atau caj lain yang terlebih bayar atau tersalah bayar**

**13.** (1) Adalah sah bagi Ketua Pengarah memerintahkan supaya dipulangkan balik apa-apa wang yang terlebih bayar atau tersalah bayar, jika dibuktikan dengan memuaskan hatinya bahawa wang itu telah terlebih bayar atau tersalah bayar sebagai duti eksais, surcaj, penalti, fi atau wang lain atau sebagai sewa gudang atau sebagai apa-apa caj lain di bawah Akta ini:

Dengan syarat bahawa—

- (a) tiada apa-apa pemulangan balik boleh dibenarkan melainkan jika suatu tuntutan berkenaan dengan wang yang terlebih bayar atau tersalah bayar itu dibuat secara bertulis kepada Ketua Pengarah dalam masa satu tahun selepas pembayaran terlebih atau tersalah itu dibuat; atau

(b) dalam hal jika duti eksais telah dibayar di bawah seksyen 8A, atau sementara menunggu keputusan suatu semakan atau rayuan di bawah seksyen 47, tiada tuntutan bagi pemulangan balik boleh dibenarkan melainkan tuntutan itu dibuat dalam borang yang ditetapkan dalam masa satu tahun dari tarikh keputusan ke atas penjenisan, penilaian, semakan atau rayuan diberitahukan kepada pihak yang menuntut itu.

(2) Suatu tuntutan di bawah subseksyen (1) hendaklah disokong dengan apa-apa dokumen sebagaimana yang dikehendaki oleh Ketua Pengarah.

**Peremitan duti atas barang-barang yang rosak, musnah atau hilang sebelum dikeluarkan daripada kawalan eksais**

14. (1) Jika apa-apa barang-barang berduti rosak, musnah atau hilang disebabkan oleh kemalangan yang tidak dapat dielakkan pada bila-bila masa sebelum dikeluarkan daripada kawalan eksais, Ketua Pengarah boleh, jika difikirkan patut olehnya, meremit keseluruhan atau mana-mana bahagian duti eksais yang kena dibayar atasnya sekiranya notis secara bertulis mengenai kerosakan, kemusnahan atau kehilangan itu, disokong dengan dokumen yang mencukupi, telah diberikan pada atau sebelum masa barang-barang itu dikeluarkan.

(2) Jika apa-apa barang-barang berduti rosak, musnah atau hilang disebabkan oleh kemalangan yang tidak dapat dielakkan selepas barang-barang tersebut dikeluarkan daripada kawalan eksais, tiada pengurangan duti eksais boleh dibenarkan atas barang-barang itu.

**Pembayaran duti, dsb. yang terkurang bayar atau yang dipulangkan balik dengan silap**

15. (1) Apabila—

- (a) disebabkan oleh ketidaksengajaan, kecuaiian, kesilapan, pakatan sulit, atau salah tafsiran di pihak mana-mana pegawai eksais, atau disebabkan oleh pernyataan silap mengenai nilai, kuantiti, kualiti atau perihalan oleh mana-mana orang, atau disebabkan oleh apa-apa sebab lain, keseluruhan atau mana-mana bahagian daripada mana-mana duti eksais, surcay, penalti, fi atau wang lain yang kena dibayar di bawah Akta ini tidak dibayar; atau
- (b) keseluruhan atau mana-mana bahagian daripada duti eksais, surcay, penalti, fi atau wang lain itu, selepas dibayar, telah, disebabkan oleh apa-apa sebab, dipulangkan balik secara silap,

orang yang bertanggung untuk membayar duti eksais, surcay, penalti, fi atau wang lain itu, atau orang yang kepadanya pemulangan balik itu telah dibuat secara silap, mengikut mana-mana yang berkenaan, hendaklah membayar kekurangan itu atau membayar balik lebihan amaun yang telah dibayar kepadanya, apabila tuntutan dibuat dalam masa enam tahun dari tarikh duti eksais, surcay, penalti, fi atau wang lain itu kena dibayar, atau kekurangan duti eksais, surcay, penalti, fi atau wang lain yang telah dibayar atau pemulangan balik itu telah dibuat, mengikut mana-mana yang berkenaan, dan tanpa menjejaskan apa-apa remedi lain bagi mendapatkan balik amaun yang genap masa, apa-apa barang-barang kepunyaan orang yang bertanggung untuk membayar amaun yang genap masa yang mungkin dalam kawalan eksais boleh ditahan sehingga duti eksais, surcay, penalti, fi atau wang lain atau kekurangan itu dibayar atau pemulangan balik itu dibayar semula, mengikut mana-mana yang berkenaan.

(2) Jika apa-apa amaun kena dibayar mengikut subseksyen (1), Ketua Pengarah boleh membenarkan amaun itu dibayar secara ansuran tertakluk kepada apa-apa syarat yang ditetapkannya.

(3) Jika terdapat keingkaran dalam pembayaran apa-apa ansuran di bawah subseksyen (2) pada tarikh genap masanya, keseluruhan baki tertunggak itu hendaklah menjadi genap masa dan kena dibayar pada tarikh itu dan hendaklah, tanpa apa-apa notis selanjutnya disampaikan kepada orang yang bertanggung untuk membayar amaun yang genap

masa itu, tertakluk kepada surcaj yang bersamaan dengan sepuluh peratus daripada baki tertunggak itu dan surcaj itu boleh didapatkan balik seolah-olah surcaj itu genap masa dan kena dibayar.

(4) Tiada apa-apa dalam subseksyen (2) dan (3) boleh menjejaskan pelaksanaan hak dan kuasa di bawah seksyen ini oleh Ketua Pengarah untuk menyita atau, tertakluk kepada subseksyen (5), menjual apa-apa barang-barang di bawah kawalan eksais kepunyaan orang yang bertanggung untuk membayar duti eksais, surcaj, penalti, fi atau wang lain itu bagi mendapatkan balik amaun yang kena dibayar di bawah subseksyen (1), (2) atau (3), atau apa-apa baki tertunggak.

(5) Jika duti eksais, surcaj, penalti, fi atau wang lain atau kekurangan, atau pemulangan balik kena dibayar balik itu masih belum dibayar, mengikut mana-mana yang berkenaan, Ketua Pengarah boleh menjual barang-barang itu selepas memberikan notis bertulis tidak kurang daripada tiga puluh hari dari tarikh penyitaan kepada pemunya atau ejennya, atau jika nama dan alamat pemunya atau ejen itu tidak diketahuinya, melalui pemberitahuan dalam *Warta*.

(6) Hasil jualan apa-apa barang-barang di bawah subseksyen (5) hendaklah digunakan bagi pembayaran duti eksais, surcaj, penalti, fi atau wang lain, atau mendapatkan balik apa-apa amaun atau caj yang mungkin genap masa berkenaan penjualan barang-barang itu, dan lebihannya, jika ada, hendaklah dibayar kepada orang yang bertanggung untuk membayar amaun yang genap masa di bawah subseksyen (1) dan jika orang itu tidak dijumpai dalam masa satu bulan daripada jualan itu, lebihan itu hendaklah dibayar kepada Kumpulan Wang Disatukan.

(7) Jika semasa jualan apa-apa barang-barang itu tiada tawaran mencukupi didapati untuk menanggung duti eksais, surcaj, penalti, fi atau wang lain yang kena dibayar itu atau pemulangan balik yang dibayar secara silap, mengikut mana-mana yang berkenaan, barang-barang itu hendaklah dilucut hak kepada Kerajaan dan hendaklah dilupuskan mengikut cara sebagaimana yang diarahkan oleh Ketua Pengarah.

(8) Tiada apa-apa dalam subseksyen (1) menghalang Ketua Pengarah daripada membuat tuntutan pada bila-bila masa selepas enam

tahun apabila apa-apa pembayaran duti eksais, surcuj, penalti, fi atau wang lain tidak dibayar atau kurang dibayar disebabkan oleh apa-apa bentuk fraud atau keingkaran yang dilakukan oleh atau bagi pihak mana-mana orang.

(9) Jika jualan barang-barang itu dibuat secara lelong, elektronik atau selainnya, lelongan itu hendaklah dijalankan oleh atau dengan kehadiran pegawai kanan eksais.

### **Mendapatkan duti eksais, dsb. daripada orang yang meninggalkan Malaysia**

**15A.** (1) Jika Ketua Pengarah mempunyai sebab untuk mempercayai bahawa mana-mana orang hendak atau berkemungkinan meninggalkan Malaysia tanpa membayar apa-apa duti eksais surcuj, penalti, fi atau wang lain yang kena dibayar olehnya, dia boleh mengeluarkan kepada Ketua Pengarah Imigresen suatu perakuan yang mengandungi butir-butir orang yang disyaki secara munasabah telah melakukan suatu kesalahan dengan suatu permintaan supaya orang itu dihalang daripada meninggalkan Malaysia melainkan jika dan sehingga dia membayar duti eksais surcuj, penalti, fi atau wang lain yang kena dibayar sedemikian, atau memberikan cagaran yang memuaskan hati Ketua Pengarah bagi pembayarannya.

(2) Tertakluk kepada apa-apa perintah yang dikeluarkan atau dibuat di bawah mana-mana undang-undang bertulis yang sedang berkuat kuasa berhubung dengan buang negeri atau imigresen, Ketua Pengarah Imigresen yang menerima suatu permintaan di bawah subseksyen (1) berkenaan dengan seseorang hendaklah menjalankan segala langkah yang boleh termasuk pengambilan dan penyimpanan apa-apa perakuan pengenalan, pasport, permit keluar atau dokumen perjalanan lain yang berhubungan dengan orang itu sebagaimana yang perlu untuk melaksanakan permintaan itu.

(3) Ketua Pengarah hendaklah menyebabkan notis mengenai pengeluaran sesuatu perakuan di bawah subseksyen (1) disampaikan ke diri atau melalui pos berdaftar di alamat yang terakhir diketahui bagi orang yang kepadanya perakuan ini berkaitan:

Dengan syarat bahawa ketidakterimaan notis itu oleh orang itu tidak boleh mentaksahkan kepadanya apa-apa yang dibuat di bawah seksyen ini.

(4) Jika orang yang berkenaan dengannya suatu perakuan telah dikeluarkan di bawah subseksyen (1) mengemukakan pada atau selepas tarikh perakuan itu suatu pernyataan bertulis yang ditandatangani oleh Ketua Pengarah yang menyatakan bahawa semua duti eksais, surcaj, penalti, fi atau wang lain telah dibayar, atau bahawa cagaran telah diberikan bagi pembayarannya, pernyataan itu hendaklah menjadi kuasa yang cukup bagi membenarkan orang itu meninggalkan Malaysia.

(5) Tiada apa-apa prosiding undang-undang boleh dimulakan atau disenggarakan terhadap Kerajaan, sesuatu Kerajaan Negeri atau mana-mana pegawai awam lain berkenaan dengan apa-apa jua yang dibuat dengan sah di bawah seksyen ini.

(6) *(Dipotong oleh Akta A1594).*

### **Mendapatkan balik duti eksais, dsb., sebagai hutang sivil**

**15B.** (1) Tanpa menjejaskan apa-apa remedi lain dan walau apa pun apa-apa semakan atau rayuan terhadap apa-apa keputusan Ketua Pengarah di bawah seksyen 47, apa-apa duti eksais, surcaj, penalti, fi atau wang lain yang kena dibayar di bawah Akta ini, boleh didapatkan balik sebagai suatu hutang sivil yang genap masa kepada Kerajaan.

(2) Dalam mana-mana prosiding untuk mendapatkan balik duti eksais, surcaj, penalti, fi atau wang lain di bawah subseksyen (1), pengemukakan suatu perakuan yang ditandatangani oleh Ketua Pengarah—

(a) yang menyatakan bahawa apa-apa duti eksais, surcaj, penalti, fi atau wang lain dan amaun yang ditunjukkan dalam perakuan itu sebagai kena dibayar, dalam apa-apa taksiran atau notis yang dibuat di bawah Akta ini daripada orang yang dinamakan dalam perakuan itu; dan

- (b) yang memberikan alamat orang itu dan yang berupa sebagai suatu salinan atau cabutan daripada apa-apa notis taksiran,

hendaklah menjadi keterangan muktamad bagi duti eksais, surcaj, penalti, fi atau wang lain dan amaun itu sebagaimana yang kena dibayar dalam apa-apa taksiran atau notis dan hendaklah menjadi autoriti yang mencukupi bagi mahkamah untuk memberikan penghakiman bagi amaun itu.

(3) Apa-apa penalti yang dikenakan di bawah Akta ini hendaklah, bagi maksud Akta ini dan Akta Had Masa 1953 [*Akta 254*], Ordinan Had Masa Sabah [*Sabah Bab 72*] atau Ordinan Had Masa Sarawak [*Swk. Bab 49*], mengikut mana-mana yang berkenaan, boleh didapatkan semula seolah-olah penalti itu adalah duti eksais, surcaj, penalti, fi atau wang lain yang genap masa dan kena dibayar di bawah Akta ini dan dengan itu subseksyen 6(4) Akta Had Masa 1953, seksyen 3 Ordinan Had Masa Sabah atau seksyen 3 Ordinan Had Masa Sarawak, mengikut mana-mana yang berkenaan, tidak terpakai kepada penalti itu.

### **Kadar duti eksais**

**16.** (1) Kadar duti eksais yang terpakai bagi apa-apa barang hendaklah—

- (a) dalam hal barang-barang yang dikilang di Malaysia, kadar duti eksais atau penilaian (jika ada) yang berkuat kuasa pada hari barang-barang itu dipindahkan dari tempat suling, bruari atau tempat pengilangan lain, atau dari gudang berlesen, atau suatu gudang atau mana-mana tempat lain yang diluluskan oleh Ketua Pengarah tempat barang-barang itu disimpan atau dari mana-mana tempat lain di bawah kawalan eksais;

(b) dalam hal barang-barang yang diimport dengan sah—

- (i) jika barang-barang itu (selain petroleum di dalam suatu gudang berlesen) digudangkan, atau jika duti



eksais dibayar di stesen pemungutan, kadar yang berkuat kuasa pada hari pemindahan barang-barang itu dibenarkan oleh pegawai yang hak atau, dalam hal stesen pemungutan, oleh seorang pegawai yang dilantik di bawah peruntukan mana-mana undang-undang yang sedang berkuat kuasa di Singapura berhubung dengan pemungutan duti eksais yang kena dibayar kepada Kerajaan Malaysia;

(ii) jika barang-barang itu terdiri daripada pertoleum yang berada di dalam gudang berlesen, kadar yang berkuat kuasa pada hari petroleum itu dipindahkan dari gudang itu;

(iii) jika barang-barang itu diimport melalui pos, kadar yang berkuat kuasa pada hari duti ditaksir oleh pegawai yang hak; dan

(iv) dalam apa-apa hal lain, kadar yang berkuat kuasa pada hari barang-barang itu dilepaskan oleh pegawai yang hak; dan

(c) dalam hal barang-barang menyalahi eksais, kadar yang berkuat kuasa pada hari barang-barang itu menjadi barang-barang menyalahi eksais, jika diketahui, atau kadar yang berkuat kuasa pada hari penyitaan, mengikut yang mana-mana yang lebih tinggi.

(2) Bagi maksud pengiraan duti eksais yang kena dibayar, penilaian yang terpakai bagi apa-apa barang hendaklah dibuat mengikut cara yang ditetapkan.

### **Pengenaan atau penghapusan duti eksais**

**17.** Apabila menurut kuasa sesuatu perintah yang dibuat di bawah subseksyen 6(1) sesuatu duti eksais ditetapkan atas apa-apa barang-barang yang dahulunya tidak dikenakan duti atau sesuatu duti

eksais atas barang-barang dihapuskan, maka pengenaan atau penghapusan duti itu hendaklah disifatkan sebagai telah berkuat kuasa pada masa barang-barang itu dipindahkan dari tempat pengilangan itu atau kawalan eksais.

### **Persoalan berkenaan dengan barang-barang yang disifatkan sebagai berduti**

**18.** Jika timbul sesuatu persoalan sama ada apa-apa barang-barang tertentu adalah termasuk atau tidak termasuk dalam suatu kelas barang-barang yang terdapat dalam sesuatu perintah di bawah subseksyen 6(1), maka persoalan itu hendaklah diputuskan oleh Ketua Pengarah.

### **Perakuan oleh Ketua Pengarah boleh diterima sebagai keterangan**

**18A.** Walau apa pun apa-apa jua yang terkandung dalam mana-mana undang-undang bertulis yang lain atau rukun keterangan yang berlawanan, jika dalam apa-apa prosiding suatu dokumen yang berupa sebagai suatu perakuan yang ditandatangani oleh Ketua Pengarah berkenaan dengan suatu keputusan yang dibuat olehnya di bawah seksyen 5B, 8B atau 18 dikemukakan, dokumen itu hendaklah boleh diterima sebagai keterangan dan hendaklah diterima sebagai keterangan yang mencukupi bagi fakta yang dinyatakan di dalamnya dan Ketua Pengarah tidak boleh dikehendaki supaya memberikan keterangan berkenaan dengan keputusan itu melainkan jika mahkamah memerintahkan selainnya.

### **Pulangan cukai**

**19.** (1) Jika apa-apa barang dieksport oleh pengilang sebagai suatu bahagian daripada atau ramuan bagi apa-apa barang yang dikilang dalam Malaysia atau sebagai pembungkus, atau suatu bahagian daripada atau ramuan bagi pembungkus, barang-barang terkilang itu, maka, jika duti eksais atas bahagian atau ramuan barang-barang terkilang itu atau atas pembungkus atau bahagian atau ramuan

barang-barang terkilang itu atau atas pembungkus atau bahagian atau ramuan pembungkus berkenaan telah dibayar, Ketua Pengarah boleh, apabila barang-barang itu dieksport sedemikian, membenarkan pulangan cukai penuh kepada pengilang bagi duti eksais yang telah dibayar sedemikian jika—

- (a) barang-barang siap itu telah dikilang di premis yang diluluskan oleh Ketua Pengarah;
- (b) apa-apa buku dan akaun disimpan sebagaimana yang dikehendaki oleh Ketua Pengarah bagi maksud memastikan kuantiti barang-barang yang digunakan dalam pengilangan itu atau bagi atau dalam pembungkusan barang-barang terkilang itu;
- (c) barang-barang itu dieksport sedemikian dalam masa dua belas bulan dari tarikh duti eksais telah dibayar atau apa-apa tempoh lanjut sebagaimana yang diluluskan oleh Ketua Pengarah;
- (d) notis bertulis telah diberikan pada borang akaun eksport bahawa tuntutan bagi pulangan cukai itu akan dibuat, dan tuntutan sedemikian dalam borang yang ditetapkan telah dibuat dan dibuktikan hingga memuaskan hati pegawai kanan eksais dalam masa enam bulan dari tarikh pengeksportan itu atau apa-apa tempoh lanjut sebagaimana yang diluluskan oleh Ketua Pengarah; dan
- (e) pulangan cukai yang dituntut berkenaan dengan mana-mana satu konsainan barang-barang yang dieksport tidaklah kurang daripada dua ratus ringgit.

(2) Dalam seksyen ini, ungkapan “pengilang” termasuklah mana-mana orang yang kepadanya barang-barang terkilang itu telah dijual atau dilupuskan selainnya.

**Pulangan cukai ke atas barang-barang import**

**19A.** (1) Apabila apa-apa barang import, selain barang-barang yang terlibat di bawah seksyen 19E yang atasnya duti eksais telah dibayar, dieksport semula, Ketua Pengarah boleh membenarkan sembilan per sepuluh daripada duti yang dikira mengikut subseksyen (2) dibayar semula sebagai pulangan cukai jika—

- (a) barang-barang itu dikenal pasti dengan memuaskan hati seorang pegawai kanan kastam di pelabuhan kastam atau lapangan terbang kastam di mana barang-barang itu dikapalkan atau dimuatkan bagi eksport semula, atau di tempat eksport semula;
- (b) pulangan cukai yang dituntut berkenaan dengan mana-mana satu konsainan barang-barang yang dieksport semula tidaklah kurang daripada dua ratus ringgit;
- (c) barang-barang itu dieksport semula dalam masa tiga bulan dari tarikh duti eksais dibayar;
- (d) bayaran pulangan cukai ke atas barang-barang sesuatu kelas yang ke dalamnya barang-barang yang akan dieksport semula itu tergolong tidak dilarang oleh peraturan-peraturan yang dibuat di bawah Akta ini;
- (e) notis bertulis telah diberikan kepada seorang pegawai kanan eksais pada atau sebelum masa eksport semula bahawa suatu tuntutan untuk pulangan cukai akan dibuat, dan tuntutan itu dibuat dalam borang yang ditetapkan dan dibuktikan dengan memuaskan hati seseorang pegawai kanan eksais dalam masa tiga bulan dari tarikh eksport semula; dan
- (f) barang-barang itu tidak digunakan selepas pengimportan.

(2) Amaun pulangan cukai yang dibenarkan hendaklah dikira pada kadar duti eksais yang dilevi pada masa import.

**Akuan oleh pihak yang menuntut**

**19B.** Tiap-tiap orang yang menuntut pulangan cukai atas apa-apa barang yang dieksport semula hendaklah, sendiri atau melalui ejennya, membuat suatu akuan kepada seorang pegawai kanan eksais mengikut borang yang ditetapkan, bahawa barang-barang itu telah sebenarnya dieksport semula dan tidak didaratkan semula atau diturunkan dari kereta api dan tidak dimaksudkan untuk didaratkan semula atau diturunkan dari kereta api di mana-mana pelabuhan kastam, lapangan terbang kastam atau tempat dalam Malaysia atau dalam mana-mana pelabuhan di Malaysia.

**Takrif “eksport semula” dalam seksyen 19A dan 19B**

**19C.** Bagi maksud seksyen 19A dan 19B, ungkapan “eksport semula” termasuklah pergerakan barang-barang ke suatu gudang yang dilesenkan di bawah seksyen 65A Akta Kastam 1967 dan ke suatu kedai bebas cukai yang dilesenkan di bawah seksyen 65D Akta Kastam 1967.

**19D.** (*Dipotong oleh Akta A1594*).

**Pemulangan balik kepada pelawat dan pemunya sampel**

**19E.** Apabila apa-apa barang persendirian atau barang lain yang telah diimport oleh pelawat ke Malaysia untuk kegunaan mereka sendiri, atau sampel yang diimport oleh pengembara dagangan, atau sampel dagangan atau apa-apa barang lain yang ditetapkan, yang ke atasnya duti eksais telah dibayar dieksport semula dalam masa tiga bulan dari tarikh pengimportan atau dalam apa-apa tempoh lanjutan sebagaimana yang dibenarkan oleh Ketua Pengarah, sama ada secara am atau dalam mana-mana hal tertentu, Ketua Pengarah boleh membenarkan pulangan cukai duti eksais itu.

**Pelepasan duti ke atas barang-barang import untuk sementara**

**19F.** Jika Ketua Pengarah berpuas hati bahawa barang-barang diimport hanya untuk sementara dengan tujuan untuk pengeksporan semula kemudiannya, dia boleh membenarkan barang-barang itu diserahkan ketika pengimportan tanpa pembayaran duti tertakluk kepada pembayaran suatu deposit yang bersamaan dengan tidak kurang daripada amaun duti yang kena dibayar jika barang-barang itu diimport bagi kegunaan tempatan atau cagaran diberikan dengan memuaskan hati Ketua Pengarah bagi pembayaran duti itu, dan deposit itu hendaklah dipulangkan balik atau cagaran itu dilepaskan jika barang-barang itu dieksport semula dalam masa tiga bulan daripada tarikh pengimportan atau dalam apa-apa tempoh lanjutan yang dibenarkan oleh Ketua Pengarah.

**Mengimbangi pulangan cukai atau pemulangan balik terhadap amaun terhutang**

**19G.** Walau apa pun apa-apa peruntukan Akta ini, jika mana-mana orang tidak membayar, keseluruhan atau sebahagian—

- (a) apa-apa amaun duti eksais, surcaj, penalti, fi atau apa-apa wang lain di bawah Akta ini;
- (b) apa-apa amaun duti kastam, surcaj, penalti, fi atau apa-apa wang lain di bawah Akta Kastam 1967;
- (c) apa-apa amaun cukai jualan yang genap masa dan kena dibayar, apa-apa surcaj terakru, atau apa-apa penalti atau apa-apa wang lain yang kena dibayar di bawah Akta Cukai Jualan 1972 [*Akta 64*];
- (d) apa-apa amaun cukai perkhidmatan yang genap masa dan kena dibayar, apa-apa surcaj terakru, atau apa-apa penalti atau apa-apa wang lain yang kena dibayar di bawah Akta Cukai Perkhidmatan 1975 [*Akta 151*];

- (e) apa-apa amaun cukai yang genap masa dan kena dibayar, apa-apa surcaj terakru, atau apa-apa penalti atau apa-apa wang lain yang kena dibayar di bawah Akta Cukai Barang dan Perkhidmatan 2014 [*Akta 762*];
- (f) apa-apa amaun cukai jualan yang genap masa dan kena dibayar, apa-apa surcaj terakru, atau apa-apa penalti, fi atau apa-apa wang lain yang kena dibayar di bawah Akta Cukai Jualan 2018 [*Akta 806*]; atau
- (g) apa-apa amaun cukai perkhidmatan yang genap masa dan kena dibayar, apa-apa surcaj terakru, atau apa-apa penalti, fi atau apa-apa wang lain yang kena dibayar di bawah Akta Cukai Perkhidmatan 2018 [*Akta 807*],

Ketua Pengarah boleh mengimbangkan apa-apa amaun atau mana-mana bahagian amaun pulangan cukai atau pemulangan balik yang genap masa kepada orang itu terhadap amaun yang tidak dibayar yang disebut dalam perenggan (a), (b), (c), (d), (e), (f) atau (g), dan Ketua Pengarah hendaklah mengira amaun yang diimbangkan sebagai pembayaran atau sebahagian daripada pembayaran yang diterima daripada orang itu.

#### BAHAGIAN IV

##### PENGILANGAN BARANG-BARANG BERDUTI

#### **Lesen untuk menyuling, menapai atau selainnya mengilang barang-barang berduti**

**20.** (1) Tertakluk kepada Bahagian ini, tiada seseorang boleh menyuling, menapai ataupun mengilang apa-apa barang-barang berduti, atau mengilang apa-apa tembakau atau liquor yang memabukkan kecuali di bawah dan mengikut peruntukan-peruntukan sesuatu lesen dalam borang yang ditetapkan yang dikeluarkan oleh Ketua Pengarah, dan di tempat suling, bruari, atau lain-lain tempat pengilangan yang dinyatakan dalam lesen itu.

(2) Menteri boleh dengan perintah mengecualikan, tertakluk kepada syarat-syarat yang difikirkannya patut dikenakan, mana-mana kelas orang daripada subseksyen (1).

(3) Sesuatu lesen di bawah seksyen ini hendaklah dikeluarkan menurut budi bicara Ketua Pengarah dan hendaklah dikeluarkan apabila dibayar apa-apa bayaran, dan tertakluk kepada apa-apa syarat yang ditetapkan olehnya bagi tiap-tiap satu kes dan kepada apa-apa syarat tambahan yang diarahkan oleh Ketua Pengarah supaya dicatatkan pada lesen itu.

(4) Walau apa pun peruntukan yang terkandung dalam subseksyen (3), Ketua Pengarah boleh menghendaki mana-mana orang yang diberi suatu lesen di bawah seksyen ini supaya memberi apa-apa sekuriti yang difikirkan patut oleh Ketua Pengarah bagi pematuhan yang sewajarnya oleh orang itu akan Akta ini dan pada amnya bagi perlindungan hasil eksais; dan sementara menanti sekuriti itu diberi Ketua Pengarah boleh enggan mengeluarkan sesuatu lesen.

(5) Sesuatu lesen yang dikeluarkan di bawah seksyen ini boleh dipindah milik, digantung atau dibatalkan pada bila-bila masa oleh Ketua Pengarah.

(6) Apabila sesuatu lesen digantung atau dibatalkan maka pengilang berlesen itu tidaklah berhak mendapat pulangan balik apa-apa bayaran lesen yang telah dibayar.

(7) Seseorang pengilang berlesen boleh memohon secara bertulis kepada Ketua Pengarah—

(a) bagi memindah milik lesennya kepada seseorang lain; dan dalam hal yang demikian orang lain itu hendaklah turut serta dalam permohonan itu;

(b) bagi memindahkan kilang penapisnya atau tempat pengilangannya ke mana-mana tempat lain,

dan Ketua Pengarah boleh, menurut budi bicaranya, enggan meluluskan sesuatu permohonan itu; dan jika Ketua Pengarah telah



meluluskan sesuatu permohonan itu maka ia hendaklah, apabila diserahkan balik lesen yang sedia ada itu dan apabila dibayar bayaran yang ditetapkan, jika ada, membuat catatan yang perlu padanya atau mengeluarkan suatu lesen baru sebagaimana yang difikirkannya sesuai.

(8) Sesuatu lesen untuk menyuling, menapai ataupun mengilang barang-barang berduiti, hendaklah disifatkan sebagai termasuk sesuatu lesen bagi menggudangkan barang-barang berduiti sebagaimana yang diperuntukkan di bawah subseksyen 25(1).

(9) Mana-mana peraturan-peraturan yang dibuat di bawah seksyen 85 bagi mengatur kawalan gudang-gudang berlesen hendaklah dipakai bagi gudang-gudang yang disifatkan sebagai berlesen sedemikian di bawah subseksyen (8), setakat mana yang diarahkan oleh Ketua Pengarah.

**Tiada seorang pun kecuali pengilang berlesen boleh menyimpan alat penyulingan, dsb.**

**21.** (1) Tertakluk kepada subseksyen (4) dan kepada subseksyen 20(2), tiada seorang pun selain pengilang berlesen di bawah subseksyen 20(1) atau seseorang yang dikecualikan di bawah seksyen 22 boleh dengan diketahuinya menyimpan atau memiliki apa-apa alat penyulingan, kelengkapan atau perkakas lain untuk menyuling, menapai atau mengilang barang-barang berduiti, atau apa-apa mesin kendalian kuasa bagi mengilang tembakau atau apa-apa bahagian atau alat tambah mesin itu.

(2) Tiada seorang pun selain seorang pengilang berlesen dalam produk tembakau atau seseorang yang dikecualikan di bawah subseksyen 20(2) boleh dengan diketahuinya menyimpan atau memiliki apa-apa mesin kendalian tangan untuk mengilang tembakau atau apa-apa bahagian atau alat tambah mesin itu.

(3) Pemunya atau penduduk mana-mana tanah atau premis di mana didapati ada apa-apa alat penyulingan, kelengkapan atau lain-lain perkakas untuk menyuling atau menapai atau pun mengilang apa-apa

barang-barang berdutit atau apa-apa mesin kendalian kuasa atau kendalian tangan untuk pengilangan tembakau hendaklah tiap-tiap seorang disifatkan, sehingga dibuktikan sebaliknya, sebagai dengan diketahuinya menyimpan atau memiliki alat penyulingan, kelengkapan atau perkakas lain atau mesin kendalian kuasa atau mesin kendalian tangan untuk pengilangan tembakau, mengikut mana yang berkenaan.

(4) Tiada apa-apa jua dalam subseksyen (1) boleh dipakai bagi sesuatu alat penyulingan, kelengkapan atau perkakas lain untuk menyuling, menapai atau pun mengilang barang-barang berdutit, atau bagi apa-apa mesin kendalian kuasa untuk mengilang tembakau, atau bagi sesuatu bahagian atau alat tambah mesin itu—

(a) yang dipegang sebagai barang niaga oleh seseorang peniaga *bona fide* perkakas atau jentera itu;

(b) yang dengan kelulusan Ketua Pengarah, berada dalam milik seseorang yang membina suatu tempat suling, bruari atau tempat pengilangan lain barang-barang berdutit, atau yang berada dalam milik mana-mana orang yang menduduki sesuatu tempat suling, bruari atau tempat pengilangan lain yang berkenaan dengannya sesuatu lesen di bawah subseksyen 20(1) telah dahulunya berkuat kuasa dan telah dengan kelulusan Ketua Pengarah diserahkan balik, digantung atau tidak diperbaharui oleh sebab terhentinya kendalian yang baginya tempat pengilangan itu telah dilesen.

### **Pengecualian**

**22.** (1) Tiada apa-apa jua dalam Akta ini boleh dipakai bagi sesuatu penyulingan barang-barang berdutit oleh—

(a) seseorang pengamal perubatan berdaftar;

(b) seseorang ahli farmasi berdaftar; atau

- (c) seseorang ahli kimia yang berkelayakan dengan kelulusan Ketua Pengarah,

jika penyulingan itu dibuktikan dengan memuaskan hati Ketua Pengarah sebagai untuk maksud perubatan yang sebenarnya atau sains yang sebenarnya.

(2) Tiada apa-apa jua dalam Akta ini boleh dipakai bagi mana-mana bumiputera—

- (a) yang dengan diketahuinya menyimpan atau memiliki apa-apa kelengkapan, lain daripada suatu alat penyulingan, bagi mengilang; atau

- (b) yang mengilang, lain daripada dengan penyulingan,

apa-apa liquor bumiputera bagi kegunaannya sendiri.

### **Pemindahan barang-barang berduti dari premis berlesen**

**23.** (1) Tiada apa-apa barang-barang berduti boleh dipindahkan dari—

- (a) sesuatu tempat suling, bruari atau tempat pengilangan lain yang dinyatakan dalam sesuatu lesen yang dikeluarkan di bawah seksyen 20;

- (b) (*Dipotong oleh Akta A1594*);

- (c) sesuatu gudang berlesen; atau

- (d) mana-mana tempat lain di bawah kawalan eksais,

kecuali mengikut sesuatu permit dalam borang yang ditetapkan yang diluluskan oleh pegawai yang hak atau mengikut peraturan-peraturan yang dibuat di bawah seksyen 85.

(2) Jika didapati pada bila-bila masa bahawa dalam sesuatu tempat atau gudang yang tersebut dalam subseksyen (1) ada sesuatu kekurangan pada mana-mana lot, kiriman atau bungkusan barang-barang berduti yang sepatutnya didapati berada dalam tempat atau gudang itu, pemegang lesen bagi tempat atau gudang itu hendaklah, jika tidak ada bukti sebaliknya, dianggap sebagai telah memindahkan barang-barang itu secara menyalahi undang-undang dan boleh, tanpa menyentuh apa-apa prosiding di bawah Akta ini, dikenakan membayar dengan serta-merta kepada pegawai yang hak duti yang boleh dilevi atas barang-barang yang didapati kurang itu:

Dengan syarat bahawa jika dibuktikan kepada Ketua Pengarah dengan memuaskan hatinya bahawa kekurangan itu telah disebabkan oleh kebocoran, kepecahan atau kemalangan lain yang tidak dapat dielakkan, atau oleh sejatan, Ketua Pengarah boleh meremit kesemua atau sesuatu bahagian daripada duti yang boleh dilevi atas barang-barang yang didapati kurang itu.

**Penyelesai syarikat hendaklah memberikan notis penggulungan, dan mengetepikan duti**

**23A.** (1) Jika suatu ketetapan yang berkesan diluluskan atau suatu perintah dibuat bagi penggulungan sesuatu syarikat yang kepadanya suatu lesen di bawah Akta ini dikeluarkan atau pengimport, maka penyelesai syarikat itu hendaklah memberikan notis mengenainya kepada Ketua Pengarah dalam masa empat belas hari selepas ketetapan itu diluluskan atau perintah itu dibuat, dan hendaklah sebelum melupuskan mana-mana aset syarikat itu mengetepikan sekian jumlah wang daripada aset itu sebagaimana yang didapati oleh Ketua Pengarah cukup untuk membayar apa-apa duti eksais yang kena dibayar atau yang akan selepas itu menjadi kena dibayar berkenaan dengan syarikat itu, dan hendaklah membayar duti eksais itu.

(2) Penyelesai bagi mana-mana syarikat sedemikian yang gagal memberikan notis kepada Ketua Pengarah dalam masa yang dinyatakan dalam subseksyen (1) atau gagal mengadakan peruntukan bagi pembayaran duti eksais sebagaimana yang dikehendaki oleh subseksyen itu hendaklah bertanggung sendiri atas apa-apa duti

eksais yang kena dibayar atau yang menjadi kena dibayar seperti yang sebut terdahulu.

(2A) Mana-mana penyelesaian yang tidak mematuhi subseksyen (1) atau (2B) melakukan suatu kesalahan boleh, apabila disabitkan, dikenakan denda tidak melebihi lima puluh ribu ringgit atau dipenjarakan selama tempoh tidak melebihi tiga tahun atau kedua-duanya.

(2B) Seseorang penyelesaian hendaklah mengemukakan semua dokumen, buku dan rekod yang berkaitan yang ada dalam milikannya kepada pegawai yang hak bagi maksud pengiraan semua duti kena dibayar di bawah Akta ini.

(3) Jika dua orang atau lebih dilantik menjadi penyelesaian atau dikehendaki oleh undang-undang untuk menjalankan penggulungan mana-mana syarikat itu, maka obligasi dan liabiliti yang dikenakan kepada penyelesaian di bawah seksyen ini hendaklah dikenakan kepada semua orang itu secara bersesama dan berasingan, tertakluk kepada hak sumbangan sesama mereka seperti dalam hal kontrak.

### **Pelantikan penerima hendaklah diberitahu kepada Ketua Pengarah**

**23B.** (1) Jika seorang penerima dilantik bagi harta syarikat yang kepadanya suatu lesen di bawah Akta ini dikeluarkan atau pengimport, maka penerima itu hendaklah memberikan notis mengenainya kepada Ketua Pengarah dalam masa empat belas hari selepas pelantikan itu dibuat, dan hendaklah sebelum melupuskan mana-mana aset syarikat itu menyetepikan sekian jumlah wang daripada aset itu sebagaimana yang didapati oleh Ketua Pengarah cukup untuk membayar apa-apa duti eksais yang kena dibayar atau yang akan selepas itu menjadi kena dibayar berkenaan dengan barang-barang berduti yang telah dijual oleh syarikat itu sebelum perlantikan penerima itu, dan hendaklah membayar duti eksais itu.

(2) Seseorang yang dilantik sebagai penerima yang gagal memberikan notis kepada Ketua Pengarah dalam masa yang

dinyatakan dalam subseksyen (1) atau gagal mengadakan peruntukan bagi pembayaran duti eksais sebagaimana yang dikehendaki oleh subseksyen itu hendaklah bertanggung sendiri atas apa-apa duti eksais yang kena dibayar atau yang menjadi kena dibayar seperti yang disebut terdahulu.

(2A) Mana-mana penerima yang tidak mematuhi subseksyen (1) atau (1A) adalah bersalah atas suatu kesalahan terhadap Akta ini dan boleh, apabila disabitkan, dikenakan denda tidak melebihi lima puluh ribu ringgit atau dipenjarakan selama tempoh tidak melebihi tiga tahun atau kedua-duanya.

(2B) Seseorang penerima hendaklah mengemukakan semua dokumen, buku dan rekod yang berkaitan yang ada dalam milikannya kepada pegawai yang hak bagi maksud mengira semua duti kena dibayar di bawah Akta ini.

(3) Jika dua orang atau lebih dilantik menjadi penerima, maka obligasi dan liabiliti yang dikenakan kepada penerima di bawah seksyen ini hendaklah dikenakan kepada semua orang itu secara bersejajarnya dan berasingan, tertakluk kepada hak sumbangan sesama mereka seperti dalam hal kontrak.

## BAHAGIAN V

### PENYIMPANAN BARANG-BARANG BERDUTI

**24.** (*Dipotong oleh Akta A1594*).

#### **Lesen gudang**

**25.** (1) Ketua Pengarah boleh, menurut budi bicaranya dan apabila dibayar apa-apa bayaran yang ditetapkan olehnya dalam tiap-tiap satu kes, memberi kepada mana-mana orang suatu lesen bagi penggudangan barang-barang yang boleh dikenakan duti dalam tempat atau tempat-tempat yang dinyatakan dalam lesen itu dan boleh memindah milik, menggantung atau membatalkan lesen itu.

(2) Sesuatu lesen itu hendaklah bagi sesuatu tempoh dan tertakluk kepada apa-apa syarat yang dinyatakan oleh Ketua Pengarah dalam tiap-tiap satu kes dalam lesen itu.

### **Menyimpan dan memiliki barang-barang berduti**

26. Tiada seorang pun tanpa kebenaran yang sah boleh menyimpan atau ada dalam milik atau kawalannya apa-apa barang-barang berduti, selain tembakau, kecuali dalam suatu tempat sulungan, bruari atau tempat-tempat lain pengilangan yang dinyatakan dalam sesuatu lesen di bawah seksyen 20, atau dalam sesuatu gudang berlesen, atau suatu gudang atau tempat lain yang diluluskan oleh Ketua Pengarah atau di mana-mana tempat lain di bawah kawalan eksais.

### **Meletak dan memindahkan barang-barang berduti**

27. Tiada apa-apa barang-barang berduti pun boleh diletakkan dalam atau dipindahkan daripada sesuatu gudang berlesen kecuali mengikut peraturan-peraturan yang dibuat di bawah seksyen 85.

### **Mendeposit barang-barang ke dalam gudang**

27A. (1) Apabila tiba atau didaratkan, apa-apa barang-barang yang diimport hendaklah didepositkan di dalam suatu gudang berlesen selain gudang berlesen di bawah seksyen 25 atau di dalam suatu gudang atau mana-mana tempat lain yang diluluskan oleh Ketua Pengarah melainkan jika—

- (a) duti eksais yang kena dibayar, jika ada, telah dibayar;
- (b) barang-barang itu telah diluluskan bagi pergerakan dalam pemindahan dan pembayaran duti eksais digantung;
- (c) barang-barang itu telah diluluskan bagi pemindahankapal dan barang-barang itu untuk dimuatkan dengan segera ke vesel lain;

- (d) barang-barang itu diimport melalui pos;
- (e) barang-barang itu diimport melalui jalan raya atau melalui laut yang tiada gudang berlesen atau gudang atau tempat lain yang diluluskan oleh Ketua Pengarah di tempat import itu; atau
- (f) barang-barang itu adalah barang persendirian dibawa oleh penumpang dalam apa-apa bagasi.

(2) Jika difikirkan perlu oleh Ketua Pengarah bagi maksud kepentingan awam supaya barang-barang itu digudangkan, Ketua Pengarah boleh menghendaki barang-barang itu didepositkan di dalam suatu gudang berlesen selain suatu gudang yang dilesenkan di bawah seksyen 25 atau di dalam suatu gudang atau tempat lain yang diluluskan oleh Ketua Pengarah.

(3) Barang-barang yang didepositkan di bawah subseksyen (2) hendaklah—

- (a) didepositkan atas perbelanjaan pemunya barang-barang itu;
- (b) disifatkan sebagai di bawah kawalan kastam; dan
- (c) tidak dikeluarkan kecuali dengan kebenaran pegawai kastam yang hak.

(4) Subseksyen (1) tidak terpakai bagi barang-barang yang memasuki kawasan utama kastam melalui jalan raya, laut atau udara dari suatu zon bebas.

(5) Walau apa pun subseksyen (4), barang-barang yang disebut dalam subseksyen (4) tidak boleh dilepaskan daripada kawalan kastam melainkan jika—

- (a) duti eksais yang kena dibayar, jika ada, telah dibayar; atau
- (b) barang-barang itu telah diluluskan bagi pergerakan dalam pemindahan dan pembayaran duti eksais digantung.



**Mendeposit barang-barang dalam suatu gudang atau tempat lain yang diluluskan oleh Ketua Pengarah**

**27AB.** (1) Ketua Pengarah boleh meluluskan apa-apa gudang, yang bukan suatu gudang berlesen, atau mana-mana tempat lain untuk dideposit dengan barang-barang berduti, dan kelulusan yang diberi itu boleh ditarik balik, digantung atau dibatal.

(2) Apa-apa kelulusan itu hendaklah bagi tempoh dan tertakluk kepada apa-apa syarat-syarat sebagaimana yang dinyatakan oleh Ketua Pengarah dalam setiap kes bagi kelulusan itu.

**Kuasa untuk membuka dan memeriksa bungkusan**

**27B.** Seseorang pegawai kanan eksais boleh, pada bila-bila masa, mengarahkan supaya mana-mana barang atau bungkusan yang diserahkan simpan di mana-mana gudang berlesen dibuka, ditimbang atau selainnya diperiksa, dan selepas barang-barang atau bungkusan itu telah dibuka atau diperiksa sedemikian, boleh menyebabkan supaya barang-barang atau bungkusan itu dilak atau ditanda mengikut cara yang difikirkannya patut.

**Penahanan barang-barang jika terdapat keraguan**

**27c.** (1) Pegawai yang hak boleh menahan dalam suatu gudang berlesen atau mana-mana tempat lain yang disifatkan sebagai berada di bawah kawalan eksais apa-apa barang jika dia ragu-ragu sama ada barang-barang itu berduti atau tidak atau kerana apa-apa sebab lain.

(2) Dalam tiap-tiap hal sedemikian pegawai yang hak itu hendaklah dengan serta-merta membuat suatu laporan kepada seorang pegawai kanan eksais yang hendaklah, tanpa kelengahan yang tidak wajar, memutuskan sama ada barang-barang itu berduti atau tidak.

(3) Jika mana-mana barang itu didapati tidak berduti, tiada sewa gudang, caj pengendalian atau caj-caj lain kena dibayar berkenaan dengan barang-barang itu.

**Pengeluaran barang-barang berduti daripada kawalan eksais**

**28.** Tiada apa-apa jua barang-barang berduti boleh digunakan dalam, atau dipindahkan dari, sesuatu tempat yang berlesen di bawah seksyen 20 atau dari suatu gudang berlesen atau suatu gudang atau mana-mana tempat lain yang diluluskan oleh Ketua Pengarah atau kawalan eksais kecuali—

- (a) apabila dibayar duti atasnya atau, jika perintah di bawah seksyen 6 berhubung dengan duti itu membenarkan, apabila diberi sekuriti sebagaimana yang diperuntukkan oleh perintah itu bagi pembayaran duti itu;
- (b) jika barang-barang itu di dalam sesuatu gudang berlesen, suatu gudang atau tempat lain yang diluluskan oleh Ketua Pengarah atau mana-mana tempat lain di bawah kawalan eksais, di bawah apa-apa syarat yang difikirkan patut oleh Ketua Pengarah—
  - (i) adalah untuk dipindahkan ke gudang berlesen lain, suatu gudang atau mana-mana tempat lain yang diluluskan oleh Ketua Pengarah atau mana-mana tempat lain di bawah kawalan eksais; atau
  - (ii) adalah untuk pengilangan di tempat lain yang dilesenkan di bawah seksyen 20; atau
- (c) (*Dipotong oleh Akta A781*);
- (d) untuk dieksport ke suatu tempat di luar Malaysia dan digunakan di situ.

**Pembayaran dius bagi barang-barang dalam gudang eksais awam**

**29.** (1) Pemunya apa-apa barang-barang yang diletakkan dalam sesuatu gudang eksais awam atau ejennya hendaklah apabila diminta membayar kepada pegawai yang hak, mengikut kadar yang ditetapkan, dius gudang yang kena dibayar berkenaan dengan barang-barang itu.

(2) Jika sesuatu sewa gudang berkenaan dengan apa-apa barang-barang tidak dibayar dengan sewajarnya mengikut cara yang diperuntukkan oleh subseksyen (1), seseorang pegawai kanan eksais boleh, selepas memberi tidak kurang daripada empat belas hari notis secara bertulis kepada pemunya (jika nama dan alamat pemunya itu diketahuinya), atau selepas notis yang wajar dalam *Warta* (jika nama dan alamat pemunya itu tidak diketahuinya), menjual barang-barang itu:

Dengan syarat bahawa barang-barang mudah rosak yang diletakkan dalam sesuatu gudang eksais hendaklah dipindahkan dengan serta-merta, dan jika tidak dipindahkan sedemikian seseorang pegawai kanan eksais boleh menjual barang-barang itu.

(3) Hasil jualan apa-apa barang-barang itu hendaklah digunakan untuk membayar apa-apa duti eksais, sewa gudang dan caj lain dan tambang kereta api yang kena dibayar berkenaan dengan barang-barang itu atau berkenaan dengan mana-mana barang-barang lain yang diletakkan oleh pemunya barang-barang itu, dan lebihannya itu, jika ada, hendaklah dibayar kepada pemunya barang-barang itu dan jika pemunya itu tidak dapat dijumpai dalam tempoh satu bulan dari tarikh jualan itu, lebihan itu hendaklah dibayar kepada Kumpulan Wang Yang Disatukan bagi Persekutuan.

## BAHAGIAN VI

### PETROLEUM DAN KELUARAN PETROLEUM

#### **Cara pembayaran duti eksais**

**30.** Walau apa pun peruntukan seksyen 28 petroleum dan keluaran petroleum berduit boleh dipindahkan daripada tempat pengilangannya yang berlesen di bawah seksyen 20 atau daripada mana-mana gudang berlesen dalam mana ia disimpan—

- (a) apabila pengilang, pengilang berlesen atau ejennya yang diberi kuasa dengan sewajarnya menandatangani suatu aku janji dalam borang yang ditetapkan oleh Ketua Pengarah

untuk membayar duti dengan sepenuhnya sebagaimana yang ditetapkan di bawah subseksyen 6(1);

- (b) apabila pengilang, pengilang berlesen atau ejennya yang diberi kuasa dengan sewajarnya mengadakan sekuriti sebagaimana yang ditetapkan di bawah subseksyen 6(1).

## BAHAGIAN VII

### PELESENAN

#### **Melantik Lembaga Pelesenan**

**31.** (1) Menteri boleh menubuhkan Lembaga Pelesenan untuk kawasan dalam Malaysia yang difikirkannya patut.

(2) Setiap Lembaga Pelesenan hendaklah terdiri daripada seorang Pengerusi, seorang Naib Pengerusi dan tidak kurang daripada dua orang atau tidak lebih daripada lima orang ahli lain, kesemua mereka itu hendaklah dilantik oleh Menteri:

Dengan syarat bahawa, kecuali Pengerusi, tiada seseorang pegawai awam yang atas sifat rasminya ada apa-apa urusan atau adalah dengan apa-apa cara jua kena-mengena dengan jualan atau pembelian liquor yang memabukkan atau dengan premis dalam mana jualan atau pembelian itu dijalankan atau mungkin dijalankan boleh dilantik ke sesuatu Lembaga.

(3) Tertakluk kepada seksyen ini, tiap-tiap seorang ahli Lembaga Pelesenan hendaklah memegang jawatan selama suatu tempoh tidak melebihi tiga tahun dari tarikh pelantikannya sebagaimana yang dinyatakan dalam pelantikannya itu, melainkan jika ia telah meletakkan jawatannya terlebih dahulu.

(4) Seseorang ahli Lembaga Pelesenan boleh dilantik semula apabila tamat tempoh perlantikannya.

(5) Menteri boleh pada bila-bila masa membatalkan pelantikan mana-mana ahli Lembaga Pelesenan, jika difikirkannya mustahak berbuat demikian, tanpa memberi apa-apa sebab baginya.

### **Jualan runcit hendaklah dilesen**

**32.** (1) Tiada seorang pun boleh menjual secara runcit, atau menawarkan jualan secara runcit, apa-apa liquor yang memabukkan sama ada untuk digunakan pada atau di luar premis penjual, kecuali di bawah dan mengikut sesuatu lesen yang dikeluarkan di bawah Bahagian ini dan dalam sesuatu tempat yang dinyatakan dalam lesen itu:

Dengan syarat bahawa tiada apa-apa jua dalam subseksyen ini boleh dipakai—

- (a) bagi jualan secara runcit bir atau todi dalam botol-botol yang belum terbuka dan yang meteri dan kapsulnya yang sewajar masih utuh atau dalam tin yang belum terbuka; atau
- (b) berkenaan dengan Sabah, bagi seseorang bumiputera yang menjual secara runcit atau menawarkan jualan secara runcit apa-apa liquor bumiputera yang bukan suatu liquor sulingan; atau
- (c) bagi jualan secara runcit liquor yang memabukkan di kedai-kedai bebas duti yang dilesenkan di bawah seksyen 65D Akta Kastam 1967.

(2) Kecuali sebagaimana yang diperuntukkan dalam subseksyen 33(2) penyerahan liquor yang memabukkan dalam kuantiti-kuantiti yang kurang daripada dua puluh tujuh liter dalam mana-mana satu hari hendaklah dikira dalam sesuatu prosiding di bawah Akta ini sebagai keterangan *prima facie* mengenai jualan secara runcit dan bahawa wang atau balasan lain telah diberi untuk liquor itu.

(3) Menteri boleh dalam sesuatu kes yang layak dan tertakluk kepada apa-apa syarat yang difikirkannya patut dikenakan dengan perintah membenarkan seseorang menjual secara runcit apa-apa liquor yang memabukkan.

(4) Jualan atau tawaran untuk jualan secara runcit apa-apa liquor yang memabukkan di bawah dan mengikut sesuatu perintah yang dibuat di bawah subseksyen (3) tidaklah menjadi suatu kesalahan terhadap subseksyen (1).

### **Jualan secara borong hendaklah dlesen**

**33.** (1) Tiada seorang pun boleh menjual secara borong, atau menawarkan jualan secara borong, apa-apa liquor yang memabukkan, kecuali di bawah dan mengikut suatu lesen yang dikeluarkan di bawah Bahagian ini:

Dengan syarat bahawa seseorang yang berlesen di bawah seksyen 20 untuk menyuling, menapai atau pun mengilang liquor yang memabukkan boleh menjual liquor yang memabukkan secara borong tanpa suatu lesen yang dikeluarkan di bawah Bahagian ini—

(a) di premis di mana liquor itu dikilang; atau

(b) jika liquor itu dibekalkan kepada seseorang pembeli terus daripada premis tersebut.

(2) Penyerahan liquor yang memabukkan dalam sesuatu kuantiti kepada seseorang yang berlesen atau dibenarkan menjual liquor secara runcit atau borong, dan penyerahan liquor yang memabukkan kepada mana-mana orang lain dalam kuantiti dua puluh tujuh liter atau lebih pada mana-mana satu hari, hendaklah dikira dalam sesuatu prosiding di bawah Akta ini sebagai keterangan *prima facie* mengenai jualan secara borong dan bahawa wang atau balasan lain telah diberi untuk liquor itu.

(3) Menteri boleh dalam sesuatu kes yang layak dan tertakluk kepada apa-apa syarat yang difikirkannya patut dikenakan dengan

perintah membenarkan seseorang menjual secara borong apa-apa liquor yang memabukkan.

(4) Jualan atau tawaran untuk jualan secara borong apa-apa liquor yang memabukkan di bawah dan mengikut sesuatu perintah yang dibuat di bawah subseksyen (3) tidaklah menjadi suatu kesalahan terhadap subseksyen (1).

### **Menyimpan liquor yang memabukkan dan yang duti telah dibayar atasnya**

**34.** (1) Tiada seseorang yang berlesen untuk menjual liquor yang memabukkan secara runcit atau secara borong boleh menyimpan liquor itu, yang duti telah dibayar atasnya, di tempat-tempat lain daripada dalam premis yang dinyatakan dalam lesennya:

Dengan syarat bahawa seksyen ini tidak boleh dipakai bagi liquor yang memabukkan yang *bona fide* dan sebenarnya dalam perjalanan, atau yang disimpan semata-mata untuk kegunaan persendirian.

(2) Tiada seorang pun selain seseorang yang memegang sesuatu lesen di bawah Bahagian ini boleh memiliki apa-apa liquor yang memabukkan kecuali liquor yang telah dibeli atau diperolehnya *bona fide* untuk kegunaan persendiriannya dan bukan untuk jualan.

(3) Seksyen ini tidak boleh dipakai bagi seseorang yang berkenaan dengannya suatu perintah telah dibuat di bawah subseksyen 32(3) atau subseksyen 33(3).

### **Jenis lesen**

**35.** (1) Lembaga Pelesenan bagi sesuatu kawasan adalah mempunyai kuasa menurut budi bicaranya untuk mengeluarkan atau memindah milik lesen dalam kawasan itu seperti berikut:

- (a) *lesen rumah awam*—untuk jualan secara runcit liquor yang memabukkan, tidak termasuk todi, untuk digunakan pada premis atau di tempat di mana liquor itu dijual;
- (b) *lesen rumah bir*—untuk jualan secara runcit bir untuk digunakan pada premis atau di tempat di mana bir itu dijual: dengan syarat bahawa pemegang lesen rumah awam adalah dikecualikan daripada memiliki lesen rumah bir;
- (c) *lesen kedai runcit*—untuk jualan secara runcit liquor yang memabukkan, tidak termasuk todi, untuk digunakan di tempat lain daripada pada premis atau di tempat di mana liquor itu dijual;
- (d) *lesen peniaga borong*—untuk jualan secara borong liquor yang memabukkan, tidak termasuk todi.

(2) Lembaga Pelesenan boleh, menurut budi bicaranya, mengenakan terhadap pengeluaran atau pemindah milikan sesuatu lesen di bawah seksyen ini apa-apa sekatan atau syarat yang difikirkannya patut dikenakan, iaitu yang tidak berlawanan dengan peruntukan Akta ini atau mana-mana peraturan-peraturan yang dibuat di bawahnya, dan sekatan dan syarat itu hendaklah dicatatkan dalam lesen itu.

(3) Lembaga Pelesenan boleh, menurut budi bicaranya, enggan mengeluarkan atau memindah milik sesuatu lesen di bawah Bahagian ini, dan menggantung atau membatalkan lesen itu pada bila-bila masa; dan Lembaga Pelesenan tidak boleh dipaksa memberi apa-apa sebab bagi sesuatu keputusan enggan mengeluarkan atau memindah milik atau menggantung atau membatalkan sesuatu lesen.

(4) Pemegang lesen di bawah Bahagian ini tidaklah berhak mendapat apa-apa pampasan kerana penggantungan atau pembatalan lesennya di bawah subseksyen (3), atau pulangan balik apa-apa bayaran yang dibayar berhubung dengan lesen itu.

(5) Jika sekiranya mana-mana orang yang berlesen di bawah Bahagian ini mati, kecelaruan mental, sakit atau bankrap, Lembaga



Pelesenan boleh dengan catatan dalam lesen itu, membenarkan seseorang lain menjalankan hak yang diberi oleh lesen itu sehingga tamat tempoh selama mana lesen itu telah diberi pada mulanya, atau sesuatu tempoh yang lebih singkat, tertakluk kepada segala syarat yang dikenakan pada mulanya atas lesen itu dan kepada apa-apa syarat tambahan yang difikirkan oleh Lembaga Pelesenan patut dikenakan.

(6) Lembaga Pelesenan boleh, menurut budi bicaranya, menghendaki sebagai suatu syarat bagi mengeluarkan sesuatu lesen bahawa pemohon hendaklah membuat ikat janji dengan mengadakan penjamin dalam borang yang ditetapkan.

(7) Mana-mana orang yang terkilang dengan keputusan Lembaga Pelesenan boleh dalam masa tiga puluh hari selepas ia diberitahu keputusan itu merayu terhadapnya kepada Menteri, dan keputusan Menteri adalah muktamad.

### **Pemegang lesen hendaklah menyimpan akaun, dsb.**

**36.** Tiap-tiap orang yang berlesen di bawah Bahagian ini hendaklah—

- (a) mempamerkan lesennya pada setiap masa di suatu tempat yang mudah dilihat di premis berlesen itu;
- (b) menyenggara di sebelah atas pintu masuk utama ke premis berlesen itu suatu *legend*, dalam bahasa Kebangsaan atau Bahasa Inggeris dan dalam suatu bentuk yang diluluskan oleh Lembaga Pelesenan, menyatakan namanya, jenis urusan yang ia berlesen menjalankannya, dan perkara lain yang dikehendaki oleh Lembaga Pelesenan;
- (c) menyenggara dalam bahasa Kebangsaan atau Bahasa Inggeris buku akaun sebagaimana yang ditetapkan, dalam mana butir-butir lengkap mengenai semua penerimaan dan pengiriman liquor yang memabukkan hendaklah dinyatakan;

- (d) membenarkan, pada bila-bila masa yang ia dibenarkan oleh lesennya menjual liquor yang memabukkan, mana-mana ahli Lembaga Pelesenan bagi kawasan dalam mana premis berlesen itu terletak, atau pegawai yang hak, memasuki premis berlesennya dan memeriksa premis itu dan apa-apa liquor yang memabukkan yang ada di dalamnya dan semua akaun yang disimpan berhubung dengannya, dan mengambil salinan atau cabutan daripadanya sebagaimana yang difikirkannya patut oleh ahli Lembaga Pelesenan atau pegawai yang hak itu, mengikut mana-mana yang berkenaan.

### **Pemegang lesen tidak boleh menyimpan liquor berduti dalam premis**

**37.** (1) Tiada seorang pun yang dilesenkan di bawah seksyen 35 boleh menyimpan di premis berlesennya apa-apa liquor berduti yang memabukkan.

(2) Selagi tidak ada bukti sebaliknya mana-mana liquor berduti yang memabukkan yang dijumpai di premis berlesen hendaklah dianggap sebagai disimpan oleh pemegang lesen itu.

### **Seseorang yang tidak berlesen tidak boleh mempamerkan tanda**

**38.** Tiada seorang pun selain seseorang yang dilesenkan di bawah Bahagian ini, boleh mempamerkan apa-apa tanda, tulisan, lukisan atau syarat lain yang boleh memberi faham atau memberi sebab yang munasabah supaya dipercayai bahawa premisnya adalah dilesen sedemikian.

## BAHAGIAN VIII

### TODI

### **Peraturan-peraturan todi**

**39.** (1) Menteri boleh membuat peraturan-peraturan untuk mana-mana atau semua daripada perkara yang berikut—

- (a) menubuh dan mengendalikan kedai todi dan jualan todi secara runcit bagi kegunaan di premis itu;
- (b) mengaturkan dengan harga apakah todi boleh dijual secara runcit di kedai todi;
- (c) mengeluarkan lesen kedai todi dan had dan syarat yang hendak dikenakan atas lesen itu;
- (d) mengatur dan mengawal pembotolan dan pengetinan todi; dan
- (e) apa-apa perkara lain yang berkenaan dengannya peraturan-peraturan boleh dibuat di bawah Bahagian ini.

(2) Kuasa untuk membuat peraturan-peraturan di bawah seksyen ini adalah tanpa menyentuh kuasa Menteri membuat peraturan-peraturan di bawah seksyen 85.

### **Penalti**

**40.** Apa-apa peraturan-peraturan yang dibuat di bawah seksyen 39 boleh mengadakan peruntukan supaya orang yang bersalah atas apa-apa kesalahan di bawahnya boleh apabila disabitkan dikenakan sesuatu denda atau sesuatu tempoh penjara atau kedua-duanya, tetapi tidak boleh mengadakan peruntukan supaya sesuatu denda itu lebih daripada dua ribu ringgit atau sesuatu tempoh penjara itu lebih daripada enam bulan.

## BAHAGIAN VIII

### PERUNTUKAN AM MENGENAI VESEL DALAM PERAIRAN WILAYAH

#### **Barang-barang yang tidak dibutirkan hendaklah disifatkan sebagai bersalahan eksais**

**40A.** Jika barang-barang, selain stor kapal *bona fide*, dijumpai oleh seorang pegawai yang hak dalam mana-mana vesel dalam perairan wilayah dan barang-barang itu tidak dibutirkan dengan betul dalam

daftar muatan atau dokumen-dokumen lain yang sepatutnya berada di atas vesel itu, maka barang-barang itu hendaklah disifatkan sebagai barang-barang menyalahi eksais dan boleh disita.

### **Larangan membawa barang-barang berduti dalam lancang tempatan**

**40B.** (1) Tiada barang sesuatu kelas yang berduti apabila diimport boleh dibawa dalam mana-mana lancang tempatan kecuali dengan kebenaran Ketua Pengarah dan tertakluk kepada apa-apa syarat sebagaimana yang dikenakan oleh Ketua Pengarah.

(2) Kebenaran itu boleh diberikan sama ada secara am, melalui pemberitahuan dalam *Warta*, berkenaan dengan semua lancang tempatan atau mana-mana kelas lancang tempatan, atau secara khas, dengan bertulis di bawah tandatangan Ketua Pengarah atau seorang pegawai yang diberi kuasa olehnya bagi maksud kebenaran itu berkenaan dengan sesuatu lancang tempatan yang tertentu.

(3) Tiada vesel boleh menghampiri sesuatu tempat mendarat yang sah di sisi undang-undang atau menghampiri sesuatu vesel samudera kecuali dengan kebenaran pegawai yang hak.

### **Pemakaian bagi kapal udara**

**40C.** Peruntukan Bahagian ini hendaklah terpakai, dengan apa-apa pengubahsuaian dan penyesuaian sebagaimana yang perlu, berkenaan dengan kapal udara yang tiba di, atau bertolak dari, mana-mana lapangan terbang kastam.

## BAHAGIAN VIII B

### AKUAN BARANG-BARANG

#### **Akuan barang-barang berduti yang diimport**

**40D.** (1) Tiap-tiap pengimport barang-barang berduti hendaklah membuat suatu akuan ke atas barang-barang yang diimport itu, secara

sendiri atau melalui ejennya, dalam borang sebagaimana yang ditetapkan kepada pegawai yang hak—

- (a) dalam hal barang-barang itu dideposit di dalam suatu gudang berlesen selain gudang yang dilesenkan di bawah seksyen 25 atau di dalam sesuatu gudang atau tempat lain yang diluluskan oleh Ketua Pengarah yang disebut di bawah subseksyen 27A(1) atau (2), dalam tempoh satu bulan dari tarikh ketibaan atau pendaratan barang-barang itu sebelum pengeluaran barang-barang itu atau apa-apa bahagian barang-barang itu daripada kawalan kastam;
- (b) dalam hal barang-barang itu tidak dideposit di dalam gudang berlesen atau di dalam suatu gudang atau tempat lain yang diluluskan oleh Ketua Pengarah yang disebut di bawah subseksyen 27A(1) atau (2), pada masa ketibaan atau pendaratan barang-barang itu di tempat import itu; atau
- (c) dalam hal barang-barang itu memasuki kawasan utama kastam dari suatu zon bebas, pada masa ketibaan barang-barang itu di kawasan utama kastam.

(2) Walau apa pun subseksyen (1), pegawai yang hak boleh, melalui notis bertulis, menghendaki akuan itu dikemukakan dalam masa tiga hari dari tarikh notis itu.

(3) Dalam hal barang-barang yang diimport melalui pos, akuan hendaklah dibuat oleh orang yang kepadanya barang-barang itu dialamatkan atau oleh ejennya apabila diminta oleh pegawai yang hak.

### **Akuan hendaklah membuat pementrian yang penuh dan benar**

**40E.** (1) Akuan yang disebut dalam seksyen 40D hendaklah membutirkan dengan penuh dan benar bilangan dan perihalan bungkusan, tentang perihalan, berat, ukuran atau kuantiti, dan nilai semua barang berduti itu, dan negara asal barang-barang itu:

Dengan syarat bahawa jika ditunjukkan dengan memuaskan hati pegawai yang hak bahawa barang-barang itu dikehendaki dengan segera bagi penggunaan tempatan dan bahawa pengimport tiada upaya untuk memberikan semua butir yang dikehendaki, pegawai itu boleh, mengikut budi bicaranya, melepaskan barang-barang itu atas pembayaran duti eksais yang dianggarkan olehnya boleh dilevi ke atas barang-barang itu, bersama dengan suatu deposit yang amaunnya ditentukan oleh pegawai itu yang tidak melebihi duti yang dianggarkan itu dan atas suatu aku janji yang diberikan oleh pengimport atau ejennya untuk memberikan suatu akuan yang betul dalam masa dua bulan atau apa-apa tempoh lanjutan yang dibenarkan oleh pegawai yang hak itu.

(2) Apabila dikemukakan suatu akuan yang betul, amaun duti kastam yang patut dan caj lain yang boleh dilevi hendaklah ditaksirkan dan apa-apa wang yang telah dibayar dan didepositkan melebihi amaun itu hendaklah dikembalikan kepada pengimport atau ejennya dan jika akuan itu tidak dikemukakan dalam tempoh yang disebut dalam subseksyen (1) deposit itu hendaklah dilucuthakkan dan dibayar ke dalam Kumpulan Wang Disatukan.

**Barang-barang yang telah diakui di stesen pemungutan, bagasi penumpang, barang-barang yang diposkan, dsb. dikecualikan**

**40f.** Peruntukan-peruntukan Bahagian ini tidak terpakai—

- (a) bagi barang-barang yang diimport dari suatu stesen pemungutan atau bagi barang-barang yang dihantar ke suatu stesen pemungutan, tertakluk kepada apa-apa syarat dan sekatan sebagaimana yang boleh dikenakan oleh Ketua Pengarah, sama ada secara am melalui perintah atau dalam sesuatu hal tertentu;
- (b) bagi bagasi penumpang atau barang-barang persendirian yang dibawa bersama; dan

- (c) bagi apa-apa barang yang dihantar melalui pos, kecuali sebagaimana yang diperuntukkan dalam subseksyen 40D(3).

### **Salinan akuan**

**40G.** Tiap-tiap akuan yang dikehendaki dibuat di bawah Bahagian ini hendaklah dibuat dengan apa-apa bilangan lain salinan sebagaimana yang diarahkan oleh orang yang kepadanya akuan itu dikehendaki dibuat.

## BAHAGIAN IX

### PERUNTUKAN PELBAGAI

#### **Orang adalah diwajibkan memberi maklumat**

**41.** (1) Adalah menjadi kewajipan tiap-tiap pegawai yang hak untuk menguatkuasakan, dan memastikan supaya dipatuhi dengan sewajarnya, peruntukan Akta ini dan mana-mana perundangan kecil yang dibuat di bawahnya, dan untuk membuat segala penyiasatan yang sewajar berhubung dengannya.

(2) Tiap-tiap orang yang ada maklumat tentang apa-apa perkara yang mengenainya adalah menjadi kewajipan pegawai yang hak untuk menyiasat adalah diwajibkan di sisi undang-undang untuk memberi maklumat itu, apabila dikehendaki oleh pegawai itu supaya berbuat demikian.

(3) Tiap-tiap orang yang dikehendaki oleh pegawai yang hak supaya mengemukakan sesuatu dokumen atau benda lain yang orang itu berkuasa mengemukakannya dan yang mana adalah sesuatu dokumen atau benda yang dikehendaki di bawah Akta ini atau sesuatu dokumen atau benda yang digunakan dalam sesuatu transaksi atau perkara lain berhubung dengan eksais, atau sesuatu dokumen atau benda yang mengenainya adalah menjadi kewajipan pegawai itu untuk

menyiasatnya di bawah Akta ini, adalah diwajibkan di sisi undang-undang untuk mengemukakan dokumen atau benda itu.

### **Dokumen hendaklah dikemukakan apabila diminta**

**41A.** Apabila diminta oleh pegawai yang hak pengimport apa-apa barang atau ejennya hendaklah mengemukakan kepada pegawai itu semua invois, bil muatan, perakuan tempat asal atau perakuan analisis dan apa-apa dokumen lain, yang dikehendaki oleh pegawai itu untuk memeriksa ketepatan apa-apa akuan yang dibuat oleh pengimport itu kepada mana-mana pegawai eksais dan pegawai itu boleh menyimpan mana-mana invois, bil muatan, perakuan tempat asal atau perakuan analisis atau dokumen-dokumen lain itu.

### **Rekod yang berhubungan dengan perkara eksais**

**41B.** (1) Tiap-tiap orang hendaklah menyimpan rekod yang lengkap dan benar yang kemas kini bagi semua transaksi yang menyentuh atau boleh menyentuh tanggungannya atas apa-apa perkara di bawah Akta ini.

(2) Rekod untuk disimpan termasuklah—

- (a) semua rekod pengimportan dan pengeksporan barang-barang termasuk barang-barang dalam pemindahan dan pemindahankapal;
- (b) semua pembayaran dan rekod bank termasuk surat kredit, permohonan pemindahan dana dan nota debit;
- (c) semua rekod perakaunan, pengurusan dan kewangan;
- (d) rekod jualan dan pembelian termasuk invois, resit, nota debit dan nota kredit;
- (e) rekod perniagaan lain termasuk kontrak atau perjanjian jualan, pengedaran dan royalti;



- (f) carta perakaunan, kod akses, dokumentasi program dan manual arahan sistem;
  - (g) rekod inventori; dan
  - (h) apa-apa rekod lain yang ditentukan oleh Ketua Pengarah.
- (3) Apa-apa rekod yang disimpan di bawah seksyen ini hendaklah—
- (a) dipelihara bagi tempoh tujuh tahun dari tarikh terakhir yang berhubungan dengan rekod itu; dan
  - (b) disimpan di Malaysia, kecuali jika diluluskan selainnya oleh Ketua Pengarah dan tertakluk kepada apa-apa syarat yang difikirkan patut oleh Ketua Pengarah.
- (4) Jika rekod itu dalam bentuk yang boleh dibaca secara elektronik, rekod itu hendaklah disimpan dalam apa-apa cara yang membolehkan rekod itu tersedia untuk diakses dan boleh ditukar ke dalam bentuk tulisan.
- (5) Jika rekod itu pada asalnya dalam bentuk kertas dan kemudiannya ditukar ke dalam bentuk elektronik, rekod itu hendaklah dikekalkan dalam bentuk asalnya sebelum pertukaran itu.
- (6) Suatu salinan rekod itu hendaklah boleh diterima sebagai keterangan dalam apa-apa prosiding setakat yang sama dengan rekod itu sendiri.
- (7) Mana-mana orang yang melanggar subseksyen (1), (2), (3), (4) atau (5) melakukan suatu kesalahan dan boleh, apabila disabitkan, dikenakan denda tidak melebihi satu ratus ribu ringgit atau dipenjarakan selama tempoh tidak melebihi lima tahun atau kedua-duanya.

### **Kehendak untuk menyediakan terjemahan**

**41BA.** (1) Jika seseorang pegawai kanan eksais menyiasat suatu kesalahan menjumpai, menyita, menahan atau mengambil milik apa-apa barang-barang, rekod, laporan atau dokumen yang keseluruhannya atau

sebahagiannya, adalah dalam bahasa selain bahasa kebangsaan atau bahasa Inggeris, atau dalam apa-apa tanda atau kod, pegawai itu boleh, secara lisan atau bertulis, menghendaki orang yang ada milikan, jagaan atau kawalan ke atas barang-barang, rekod, laporan atau dokumen itu sebelumnya untuk mengemukakan kepada pegawai kanan eksais itu suatu terjemahan dalam bahasa kebangsaan atau bahasa Inggeris dalam suatu tempoh sebagaimana yang dinyatakan olehnya.

(2) Tiada seorang pun boleh dengan diketahuinya mengemukakan suatu terjemahan di bawah subseksyen (1) yang tidak tepat, berfakta dan benar.

(3) Walau apa pun subseksyen (1), pegawai kanan eksais itu boleh menghendaki mana-mana orang lain untuk mengemukakan terjemahan itu kepadanya.

(4) Ketua Pengarah boleh membayar fi yang munasabah kepada orang yang dikehendaki untuk mengemukakan terjemahan di bawah subseksyen (3).

### **Ketua stesen kereta api hendaklah mengemukakan invois dan bil angkutan**

**41c.** (1) Ketua stesen kereta api di tempat pengimportan barang-barang melalui kereta api dan di stesen kastam tempat barang-barang berduti dikonsaikan hendaklah mengemukakan invois atau bil angkutan atau apa-apa dokumen lain yang diluluskan oleh Ketua Pengarah kepada pegawai yang hak, mengikut mana-mana yang berkenaan, berkenaan dengan barang-barang itu.

(2) Tiada kargo boleh dimuatkan ke dalam atau dipunggah dari kereta api, kecuali dengan kebenaran pegawai yang hak.

### **Barang-barang yang tidak dibutirkan dalam daftar muatan**

**41d.** (1) Jika apa-apa barang yang dicatatkan dalam daftar muatan mana-mana vesel, sebagaimana yang dikehendaki di bawah

Akta Kastam 1967, tidak dibutirkan dengan memuaskn hati pegawai yang hak dalam masa satu bulan daripada tarikh penyerahan pernyataan itu atau dalam tempoh lanjutan yang dibenarkan oleh pegawai itu, nakhoda atau ejen vesel itu boleh dikehendaki membayar kepada pegawai itu apabila diminta suatu jumlah wang tidak melebihi lima ribu ringgit dan, sebagai tambahan, dalam hal barang-barang berduti, ejen itu boleh dikehendaki membayar kepada pegawai itu apabila diminta amaun duti eksais yang boleh dilevi ke atas barang-barang itu atau, apabila duti yang betul tidak dapat ditaksir, suatu amaun yang tidak melebihi sepuluh ribu ringgit.

(2) Jika orang yang boleh dikenakan penalti dalam subseksyen (1) enggan atau gagal membayar penalti yang diminta daripadanya mana-mana pegawai kanan eksais boleh membawa guaman dan mendapatkan penalti itu di mahkamah Majistret Kelas Satu.

(3) Bagi maksud seksyen ini, “ejen vesel” termasuklah penghantar fret.

### **Penyampaian notis, dsb.**

**42.** (1) Tiap-tiap notis atau dokumen lain yang dikehendaki oleh Akta ini supaya disampaikan kepada mana-mana orang boleh disampaikan—

(a) ke diri orang itu; atau

(b) dengan menghantarnya kepada orang itu melalui pos berdaftar.

(2) Sesuatu notis atau dokumen lain yang dihantar melalui pos berdaftar kepada seseorang hendaklah disifatkan telah disampaikan kepada orang itu pada masa ia sepatutnya telah diserahkan kepadanya dalam perjalanan biasa pos jika notis atau dokumen lain itu telah dialamatkan—

(a) dalam hal suatu syarikat, suatu firma, suatu pertubuhan, suatu persatuan atau kumpulan orang yang lain—

- (i) ke pejabat berdaftarnya;
  - (ii) ke alamat yang terakhir diketahui; atau
  - (iii) kepada mana-mana orang yang diberi kuasa olehnya untuk menerima penyampaian proses; dan
- (b) dalam hal orang perseorangan, ke alamatnya yang terakhir diketahui.

### **Bagasi penumpang**

**42A.** (1) Walau apa pun apa-apa jua yang terkandung dalam Akta ini, tiap-tiap penumpang atau orang lain yang tiba di Malaysia hendaklah membuat akuan tentang semua barang berduti dalam miliknya, sama ada pada dirinya atau dalam mana-mana bagasi atau dalam mana-mana kenderaan, kepada pegawai yang hak, dan jika dia tidak berbuat demikian barang-barang itu hendaklah disifatkan sebagai barang-barang menyalahi eksais.

(2) Bagasi penumpang atau mana-mana orang boleh diperiksa dan diserahkan mengikut apa-apa cara yang diarahkan oleh Ketua Pengarah, dan menjadi tugas orang yang menjaga bagasi itu untuk mengemukakan, membuka, mengeluarkan dan membungkus semula bagasi itu.

### **Membungkus barang-barang berduti**

**42B.** Tiada barang berduti boleh dibungkus dalam apa-apa cara yang bermaksud untuk menipu seseorang pegawai eksais supaya pembutiran yang sepatutnya bagi barang-barang itu tidak boleh dibuat.

### **Pegawai yang hak boleh mengambil contoh**

**43.** (1) Pegawai yang hak boleh pada bila-bila masa, jika kewajipannya memerlukan, mengambil contoh apa-apa barang bagi

menentukan sama ada barang itu adalah barang dari suatu jenis yang boleh dikenakan sesuatu duti, atau bagi menentukan duti yang kena dibayar atas barang itu, atau bagi apa-apa maksud lain yang difikirkan perlu oleh pegawai yang hak, dan contoh itu boleh dilupakan mengikut cara sebagaimana yang diarahkan oleh Ketua Pengarah.

(2) Tiada sesuatu pembayaran perlu dibuat untuk apa-apa contoh yang diambil di bawah subseksyen (1), tetapi pegawai yang hak hendaklah memberi suatu resit bagi sesuatu contoh itu.

### **Boleh memasuki tempat atau premis**

**44.** (1) Bagi maksud Akta ini dan peraturan-peraturan yang dibuat di bawahnya, mana-mana pegawai kanan eksais hendaklah pada setiap masa mempunyai akses di mana-mana tempat atau premis yang—

- (a) mana-mana pengilang berlesen, pemegang lesen atau pengimport menjalankan perniagaannya; dan
- (b) mana-mana orang yang berurusan dengan pengilang berlesen, pemegang lesen atau pengimport itu menjalankan perniagaannya.

(2) Jika mana-mana pegawai kanan eksais memasuki mana-mana premis mengikut peruntukan seksyen ini, maka—

- (a) dia boleh menghendaki pengilang berlesen, pemegang lesen, pengimport atau orang yang disebut dalam perenggan 1(b) untuk mengemukakan apa-apa buku, data, dokumen, rekod atau benda yang dikehendaki supaya disimpan di bawah peruntukan Akta ini, atau yang berhubungan dengan mana-mana barang-barang berduti;
- (b) dia boleh memeriksa apa-apa buku, data, dokumen, rekod atau benda dan mengambil salinan apa-apa buku, data, dokumen atau rekod;

- (c) dia boleh menyita dan menahan apa-apa buku, data, dokumen, rekod atau benda, jika pada pendapatnya buku, data, dokumen, rekod atau benda itu boleh memberi keterangan mengenai pelakuan apa-apa kesalahan di bawah Akta ini;
- (d) dia boleh menghendaki mana-mana pengilang berlesen, pemegang lesen, pengimport atau orang yang disebut dalam perenggan 1(b) atau mana-mana orang diambil kerja oleh pengilang berlesen, pemegang lesen, pengimport atau orang yang disebut dalam perenggan 1(b) untuk menjawab soalan dengan benar berhubung dengan mana-mana buku, data, dokumen, rekod atau benda, atau mana-mana catatan dalam mana-mana buku, data, atau dokumen atau berhubung dengan mana-mana barang-barang berduti;
- (e) dia boleh menghendaki supaya apa-apa wadah, sampul surat atau bekas lain dalam mana-mana premis itu dibuka;
- (f) dia boleh atas risiko dan perbelanjaan pengilang berlesen, pemegang lesen, pengimport atau orang yang disebut dalam perenggan 1(b) itu, membuka dan memeriksa mana-mana bungkusan, atau mana-mana barang atau bahan, dalam mana-mana premis itu; dan
- (g) dia boleh mengambil dan menyimpan tanpa bayaran sampel apa-apa barang atau bahan yang difikirkannya perlu bagi pelaksanaan kewajipannya.

(3) Jika pegawai kanan eksais yang bertindak di bawah peruntukan seksyen ini tidak boleh mendapat akses bebas ke mana-mana premis tempat pengilang berlesen, pemegang lesen atau pengimport menjalankan perniagaannya atau tempat seseorang yang berurusan dengan pengilang berlesen, pelesen atau pengimport itu menjalankan urusannya atau ke apa-apa bekas yang berada di premis itu, dia boleh, pada bila-bila masa, memasuki premis itu dan membuka bekas itu dengan apa-apa cara, jika perlu dengan kekerasan, sebagaimana yang difikirkannya perlu.

(4) Jika, semasa memasuki mana-mana premis di bawah peruntukan seksyen ini, apa-apa barang berduti dijumpai yang berhubungan dengannya apa-apa kesalahan di bawah peruntukan Akta ini telah dilakukan, maka barang-barang berduti itu boleh dilucuthakkan.

(5) Mana-mana orang yang enggan untuk membenarkan mana-mana pegawai kanan eksais untuk memasuki mana-mana tempat atau premis di bawah subseksyen (1) melakukan suatu kesalahan dan boleh, apabila disabitkan, dipenjarakan selama tempoh tidak melebihi lima tahun atau didenda tidak melebihi satu ratus ribu ringgit atau kedua-duanya.

### **Kuasa Ketua Pengarah untuk menghendaki cagaran**

**44A.** (1) Ketua Pengarah boleh, mengikut budi bicaranya, sama ada secara am atau dalam hal tertentu atau berkenaan dengan suatu kawasan tertentu, menghendaki cagaran diberikan oleh mana-mana orang yang memindahkan barang-barang berduti dalam Malaysia dan jika apa-apa cagaran sedemikian telah dikehendaki supaya diberikan tiada seorang pun boleh memindahkan barang-barang itu melainkan jika cagaran itu telah diberikan.

(2) Cagaran yang dikehendaki di bawah subseksyen (1) tidak boleh melebihi amaun duti yang boleh dilevi ke atas barang-barang itu.

### **Perlindungan terhadap saman dan prosiding undang-undang**

**44B.** Tiada tindakan, saman, pendakwaan atau prosiding lain boleh diambil atau dibawa, dimulakan atau dikekalkan dalam mana-mana mahkamah terhadap—

- (a) mana-mana pegawai eksais;
- (b) mana-mana pegawai polis yang mempunyai kuasa seorang pegawai kanan eksais atau pegawai eksais di bawah seksyen 4A; dan
- (c) mana-mana pegawai yang hak,

bagi atau berkenaan dengan apa-apa perbuatan, pengabaian atau keingkaran yang dibuat atau dilakukan olehnya dengan suci hati atau apa-apa peninggalan yang ditinggalkan olehnya dengan suci hati atas sifat itu.

### **Penambahan atau pengurangan duti baru atau duti yang diubah dalam hal kontrak**

**45.** (1) Jika sesuatu duti eksais baru dikenakan atau jika sesuatu duti eksais dinaikkan, dan apa-apa barang-barang yang berkenaan dengannya duti itu kena dibayar adalah diserahkan selepas tarikh duti baru atau duti yang dinaikkan itu mula berkuat kuasa mengikut sesuatu kontrak yang dibuat sebelum tarikh itu, penjual barang-barang itu boleh, jika tidak ada perjanjian sebaliknya, mendapatkan balik sebagai suatu tambahan kepada harga kontrak itu sejumlah wang sama banyak dengan apa-apa amaun yang telah dibayar olehnya berkenaan dengan barang-barang itu oleh sebab duti baru atau kenaikan duti itu, mengikut mana yang berkenaan.

(2) Jika sesuatu duti eksais dibatal atau dikurangkan dan apa-apa barang-barang yang terlibat dengan duti itu adalah diserahkan selepas tarikh duti itu dibatalkan atau pengurangan duti itu mula berkuat kuasa mengikut suatu kontrak yang dibuat sebelum tarikh itu, pembeli barang-barang itu boleh, jika tidak ada perjanjian sebaliknya dan jika penjual barang-barang itu telah, berkenaan dengan barang-barang itu, mendapat faedah daripada pembatalan atau pengurangan duti itu, memotong daripada harga kontrak itu sejumlah wang yang sama banyak dengan amaun duti atau pengurangan duti itu, mengikut mana yang berkenaan.

### **Pekerja boleh mentransaksi urusan**

**46.** (1) Pekerja bagi mana-mana orang atau firma boleh mentransaksi urusan secara am dengan mana-mana pegawai eksais bagi pihak orang atau firma itu.



(2) Walau apa pun subseksyen (1), seorang pegawai kanan eksais boleh menolak untuk berurusan dengan pekerja itu melainkan jika orang atau firma itu telah mengemukakan suatu kuasa yang bertandatangan memberi kuasa kepada pekerja itu untuk menjalankan perniagaan bagi pihak orang atau firma itu.

### **Kajian semula dan rayuan terhadap keputusan Ketua Pengarah**

**47.** (1) Tertakluk kepada subseksyen (4), mana-mana orang yang terkilan dengan apa-apa keputusan Ketua Pengarah boleh memohon kepada Ketua Pengarah untuk mengkaji semula mana-mana keputusannya dalam masa tiga puluh hari dari tarikh orang itu diberitahu tentang keputusan itu dengan syarat bahawa tiada rayuan telah dibuat ke atas keputusan yang sama kepada Tribunal atau Mahkamah Tinggi.

(2) Permohonan di bawah subseksyen (1) hendaklah dibuat dalam borang yang ditetapkan.

(3) Jika suatu permohonan bagi kajian semula telah dibuat di bawah subseksyen (1), Ketua Pengarah hendaklah, jika boleh dilaksanakan dalam masa enam puluh hari daripada tarikh permohonan itu diterima, menjalankan kajian semula dan memberitahu keputusan kajian semula itu kepada orang itu.

(4) Tiada kajian semula boleh dibuat dalam apa-apa perkara yang berhubungan dengan kompaun atau subseksyen 67(3).

(5) Mana-mana orang yang terkilan dengan apa-apa keputusan Ketua Pengarah di bawah subseksyen (3) atau mana-mana peruntukan lain Akta ini, kecuali apa-apa perkara yang berhubungan dengan kompaun atau subseksyen 67(3), boleh merayu kepada Tribunal dalam masa tiga puluh hari daripada tarikh pemberitahuan secara bertulis mengenai keputusan itu kepada orang yang terkilan itu.

(6) Apa-apa duti eksais yang kena dibayar di bawah Akta ini hendaklah dibayar pada tarikh genap masa walau apa pun apa-apa kajian semula atau rayuan telah dibuat di bawah seksyen ini.

(7) Semua peruntukan yang berhubungan dengan Tribunal Rayuan Kastam hendaklah terpakai bagi Akta ini.

**47A.** (*Dipotong oleh Akta A1284*).

### **Borang-borang yang hendak digunakan**

**48.** Jika sesuatu borang telah ditetapkan di bawah perenggan 85(2)(e) maka tiada seseorang pun boleh bagi maksud Akta ini menggunakan apa-apa borang selain yang dicetak atau dikeluarkan dengan kuasa Ketua Pengarah:

Dengan syarat bahawa Ketua Pengarah boleh, menurut budi bicaranya dan tertakluk kepada syarat yang difikirkannya patut dikenakan, membenarkan mana-mana orang menggunakan sesuatu borang yang tidak dicetak atau dikeluarkan sedemikian seperti yang disebut terdahulu, atau membenarkan penggunaan apa-apa borang yang dikemukakan melalui pertukaran data elektronik.

### **Perlindungan bagi Kerajaan dan pegawai**

**49.** Kerajaan, seseorang pegawai yang hak atau orang lain yang diguna khidmat oleh Kerajaan berhubungan dengan eksais tidaklah bertanggung mengganti apa-apa kerugian yang ditanggung berhubungan dengan apa-apa barang oleh sebab kebakaran, kecurian, kerosakan atau sebab lain semasa barang itu berada dalam jagaan atau kawalan sah mana-mana pegawai atau orang itu melainkan jika kerugian itu disebabkan oleh kecuaiian atau kemungkiran sengaja pegawai atau orang itu.

### **Bayaran bagi perkhidmatan**

**50.** Ketua Pengarah boleh mengenakan bayaran sebagaimana yang difikirkannya munasabah berkenaan dengan apa-apa perbuatan atau perkhidmatan yang dilakukan atau diberi oleh Jabatan Eksais iaitu

yang tidak dikehendaki dilakukan atau diberi di bawah Akta ini dan yang baginya tiada apa-apa bayaran ditetapkan oleh mana-mana undang-undang bertulis.

## BAHAGIAN X

### PEMERIKSAAN, PENYIASATAN, PENGGELEDAHAN, PENYITAAN DAN PENANGKAPAN

#### **Kuasa penguatkuasaan, penyiasatan dan pemeriksaan**

**50A.** Bagi maksud Akta ini, seorang pegawai kanan eksais hendaklah mempunyai segala kuasa seorang pegawai polis tidak kira apa jua pangkatnya sebagaimana yang diperuntukkan di bawah Kanun Tatacara Jenayah [*Akta 593*] berhubung dengan penguatkuasaan, penyiasatan dan pemeriksaan, dan kuasa yang sedemikian hendaklah sebagai tambahan kepada kuasa yang diperuntukkan di bawah Akta ini dan tidak mengurangkan kuasanya.

#### **Kuasa tambahan**

**50B.** (1) Sebagai tambahan kepada dan tanpa menjejaskan kuasa sedia ada yang diberikan di bawah Akta ini, apabila membawa dan menjaga mana-mana orang dalam tahanan, seseorang pegawai yang hak hendaklah mempunyai segala kuasa seorang pegawai polis yang berpangkat Koperal dan lebih rendah dan kuasa seorang pegawai penjara yang berpangkat Sarjan dan lebih rendah di bawah Akta Penjara 1995 [*Akta 537*].

(2) Bagi maksud Akta ini –

- (a) jika sesuatu perintah, perakuan atau apa-apa perbuatan lain dikehendaki supaya diberikan, dikeluarkan atau dilakukan oleh seseorang pegawai penjaga Daerah Polis di bawah mana-mana undang-undang bertulis, perintah, perakuan atau perbuatan itu boleh diberikan, dikeluarkan atau dilakukan oleh seorang pegawai kanan eksais, dan bagi

maksud itu, tempat yang perintah, perakuan atau perbuatan itu diberikan, dikeluarkan atau dilakukan hendaklah disifatkan sebagai Daerah Polis di bawah jagaannya; dan

- (b) seseorang pegawai yang hak hendaklah mempunyai segala kuasa yang diberikan kepada seseorang pegawai penjaga balai polis di bawah mana-mana undang-undang bertulis, dan bagi maksud itu pejabat pegawai itu hendaklah disifatkan sebagai suatu balai polis.

### **Majistret boleh mengeluarkan waran geledah**

**51.** (1) Apabila didapati oleh seseorang Majistret, dari maklumat bertulis atas sumpah dan selepas apa-apa siasatan yang difikirkannya perlu bahawa ada sebab-sebab yang munasabah bagi mempercayai bahawa dalam rumah kediaman, kedai atau bangunan lain atau tempat, atau dalam sesuatu vesel, lain daripada sesuatu vesel yang adalah atau mempunyai taraf suatu kapal perang atau sesuatu kapal udara, ada disembunyi atau diletakkan apa-apa barang-barang yang boleh dikenakan lucut hak di bawah Akta ini atau di bawah mana-mana peraturan-peraturan yang dibuat di bawahnya, atau yang mengenainya sesuatu kesalahan di bawah Akta ini atau di bawah mana-mana peraturan-peraturan yang dibuat di bawahnya telah dilakukan, Majistret itu boleh mengeluarkan suatu waran memberi kuasa kepada seseorang pegawai eksais yang dinamakan dalamnya, pada waktu siang atau malam dan dengan atau tanpa bantuan—

- (a) untuk memasuki rumah kediaman, kedai atau bangunan lain, tempat, vesel atau kapal udara itu dan di situ mencari dan menyita apa-apa barang-barang yang munasabah disyaki boleh dikenakan lucut hak di bawah Akta ini, atau di bawah mana-mana peraturan-peraturan yang dibuat di bawahnya, atau yang mengenainya sesuatu kesalahan di bawah Akta ini disyaki telah dilakukan, dan apa-apa buku atau dokumen yang mungkin munasabah dipercayai sebagai mempunyai hubungan dengan perkara itu; dan

- (b) menangkap mana-mana orang yang berada dalam rumah kediaman, kedai atau bangunan lain, tempat, vesel atau kapal udara itu yang dalam miliknya barang-barang yang disebut di atas mungkin didapati atau yang mungkin munasabah disyaki oleh pegawai itu sebagai telah menyembunyi atau meletakkan barang-barang itu.
- (2) Pegawai itu boleh jika perlu—
- (a) memecah buka sesuatu pintu luar atau pintu dalam rumah kediaman, kedai atau bangunan, tempat, vesel atau kapal udara itu dan masuk ke dalamnya;
- (b) dengan cara kekerasan memasuki tempat, vesel atau kapal udara itu dan tiap-tiap bahagiannya;
- (c) membuang dengan kekerasan apa-apa yang menghalang ia masuk, mencari, menyita dan mengambil sebagaimana yang ia diberi kuasa untuk berbuat; dan
- (d) menahan tiap-tiap orang yang dijumpai di tempat, vesel atau kapal udara itu sehingga tempat, vesel atau kapal udara itu telah digeledah.
- (3) Jika oleh sebab jenis, saiz atau amaunnya tidak praktikal untuk mengeluarkan apa-apa barang-barang, dokumen atau benda yang disita di bawah seksyen ini, pegawai eksais boleh, dengan apa-apa cara, mengelak rumah kediaman, kedai atau bangunan lain, tempat, vesel atau kapal udara atau barang-barang, dokumen atau benda dalam rumah kediaman, kedai atau bangunan lain, tempat, vesel atau kapal udara itu dijumpai.
- (4) Seseorang yang, tanpa kuasa yang sah, memecah, mengganggu atau merosakkan lak yang disebut dalam subseksyen (3) atau mengeluarkan barang-barang, dokumen atau benda yang dilak itu, atau cuba untuk berbuat demikian, melakukan suatu kesalahan dan boleh, apabila disabitkan, dipenjarakan selama tempoh tidak melebihi lima tahun atau didenda tidak melebihi satu ratus ribu ringgit atau kedua-duanya.

**Bila pengeledahan boleh dilakukan tanpa waran**

**52.** Apabila didapati oleh seseorang pegawai eksais bahawa ada sebab yang munasabah bagi mempercayai bahawa dalam sesuatu rumah kediaman, kedai atau bangunan lain, tempat, vesel atau kapal udara ada disembunyi atau diletakkan apa-apa barang-barang yang boleh dikenakan lucut hak di bawah Akta ini atau di bawah mana-mana peraturan-peraturan yang dibuat di bawahnya, atau yang mengenainya sesuatu kesalahan di bawah Akta ini atau di bawah mana-mana peraturan-peraturan yang dibuat di bawahnya telah dilakukan, dan jika ia ada alasan yang munasabah bagi mempercayai bahawa oleh sebab kelambatan pada memperoleh sesuatu waran geledah barang-barang itu mungkin dipindahkan, maka pegawai itu boleh menjalankan dalam, pada dan berkenaan dengan rumah kediaman, kedai atau bangunan lain, tempat, vesel atau kapal udara itu semua kuasa yang tersebut dalam seksyen 51 dengan sepenuh dan seluas-luasnya seolah-olah ia telah diberi kuasa berbuat sedemikian oleh sesuatu waran yang dikeluarkan di bawah seksyen itu.

**Kuasa memberhentikan dan menggeledah kereta, vesel dan kapal udara**

**53.** (1) Mana-mana pegawai yang hak boleh memberhentikan dan memeriksa mana-mana kereta, vesel atau kapal udara bagi maksud menentukan sama ada apa-apa barang-barang berduti di bawah Akta ini ada terkandung di dalamnya, dan orang yang menguasai atau menjaga kereta, vesel atau kapal udara itu hendaklah, jika dikehendaki oleh pegawai itu, memberhentikan kereta itu dan membenarkan pegawai itu memeriksanya atau menggerak alih kereta, vesel atau kapal udara itu ke suatu tempat lain untuk digeledah, dan tidak boleh meneruskan perjalanan sehingga kebenaran untuk berbuat demikian telah diberi oleh pegawai itu.

(1A) Seseorang pegawai yang hak boleh—

- (a) menaiki mana-mana vesel atau pesawat udara dalam mana-mana pelabuhan kastam atau lapangan terbang kastam atau tempat atau dalam perairan wilayah;

- (b) menghendaki nakhoda vesel itu atau juruterbang pesawat udara itu memberikan apa-apa maklumat berhubung dengan vesel atau pesawat udara, kargo, stor, anak kapal, penumpang atau pelayaran sebagaimana yang disifatkannya perlu;
- (c) menyelongkar dan menggeledah semua bahagian vesel atau pesawat udara itu bagi mencari barang menyalahi eksais;
- (d) memeriksa semua barang di atas vesel atau pesawat udara itu dan semua barang yang sedang dimuatkan atau dipunggah pada masa itu;
- (e) meminta semua dokumen yang sepatutnya berada di atas vesel atau pesawat udara itu; dan
- (f) menghendaki semua atau mana-mana dokumen itu dibawa kepadanya bagi pemeriksaan,

dan nakhoda mana-mana vesel dan juruterbang mana-mana pesawat udara yang enggan membenarkan pegawai itu menaiki atau menggeledah vesel atau pesawat udara itu, atau enggan memberikan apa-apa maklumat atau mengemukakan apa-apa dokumen apabila diminta melakukan suatu kesalahan terhadap Akta ini.

(1B) Jika mana-mana tempat, kotak atau peti di atas vesel atau pesawat udara itu dikunci dan kunci tidak diberikan, pegawai itu boleh memecah buka mana-mana tempat, kotak atau peti itu.

(1C) Jika apa-apa barang dijumpai tersembunyi atas mana-mana vesel atau pesawat udara, barang-barang itu hendaklah disifatkan sebagai barang-barang menyalahi eksais.

(2) Orang yang menguasai atau menjaga sesuatu kereta, vesel atau kapal udara yang diperiksa di bawah peruntukan seksyen ini hendaklah atas permintaan pegawai yang hak membuka semua bahagian kereta, vesel atau kapal udara itu untuk diperiksa oleh pegawai yang hak itu dan mengambil segala langkah yang perlu untuk membolehkan

apa-apa pemeriksaan sebagaimana yang difikirkan perlu oleh pegawai itu dibuat.

(3) Walau apa pun mana-mana undang-undang bertulis yang berlawanan, seseorang pegawai kanan eksais boleh, jika difikirkannya perlu bagi menguatkuasakan Akta ini, mendirikan atau menempatkan atau menyebabkan supaya didirikan atau ditempatkan apa-apa pengadang di atas atau melintang sesuatu jalan atau lebuhraya atau dalam sesuatu tempat awam mengikut apa-apa cara sebagaimana yang difikirkannya patut; dan seseorang pegawai yang hak boleh mengambil segala langkah yang munasabah untuk mencegah mana-mana orang daripada melalui atau mana-mana kereta daripada dipandu melalui sesuatu pengadang itu termasuklah apa-apa langkah untuk mengejar dan menangkap mana-mana orang itu atau menghentikan mana-mana kenderaan itu jika, setelah membuat pertimbangan terhadap hal keadaan yang dihadapinya pada ketika itu, adalah jelas bahawa jika langkah sedemikian tidak diambil pelarian orang dan kenderaan itu untuk mengelakkan daripada dikesan atau selainnya adalah ketara.

(4) Mana-mana orang yang tidak mematuhi apa-apa isyarat yang munasabah daripada seseorang pegawai yang hak menghendaki orang atau kereta itu supaya berhenti sebelum tiba ke sesuatu pengadang itu adalah bersalah atas suatu kesalahan dan boleh dikenakan penjara selama suatu tempoh tidak melebihi dua belas bulan atau denda tidak melebihi satu ribu ringgit atau denda dan penjara itu kedua-duanya; dan seseorang pegawai yang hak boleh, tanpa waran, menangkap orang itu melainkan ia memberi nama dan alamatnya atau secara lain memuaskannya pegawai yang hak itu bahawa ia akan mematuhi dengan sewajarnya apa-apa saman atau tindakan lain yang mungkin diambil terhadapnya.

(5) Tiada seseorang pegawai yang hak boleh menjadi bertanggung atas apa-apa kerugian, kebencanaan atau kerosakan yang terkena pada mana-mana orang atau harta akibat ia mengambil langkah-langkah yang disebut dalam subseksyen (3).



**Akses kepada maklumat berekod atau data berkomputer**

**53A.** (1) Mana-mana pegawai eksais yang menjalankan kuasanya di bawah seksyen 51, 52 dan 53 hendaklah diberi akses kepada apa-apa maklumat berekod atau data berkomputer, sama ada disimpan dalam komputer atau selainnya.

(2) Sebagai tambahan, seseorang pegawai eksais yang menjalankan kuasanya di bawah seksyen 51, 52 dan 53—

(a) boleh memeriksa dan meneliti pengendalian mana-mana komputer dan apa-apa perkakas atau bahan yang berkaitan yang dia mempunyai sebab yang munasabah untuk mengesyaki digunakan atau telah digunakan berkaitan dengan maklumat atau data itu;

(aa) boleh membuat salinan atau mengambil cabutan dari maklumat berekod atau data berkomputer yang disebut dalam subseksyen (1) yang disifatkannya perlu; dan

(b) boleh menghendaki—

(i) orang yang pegawai eksais itu mempunyai sebab yang munasabah untuk mengesyaki menggunakan atau telah menggunakan komputer itu atau yang bagi pihaknya komputer itu digunakan atau telah digunakan sedemikian; atau

(ii) orang yang menjaga, atau selainnya terlibat dalam, pengendalian komputer, perkakas atau bahan itu,

supaya memberinya bantuan yang munasabah sebagaimana yang dikehendaki olehnya bagi maksud seksyen ini.

(3) Bagi maksud subseksyen (1), “akses” termasuklah diberi kata laluan, kod penyulitan, kod penyahsulitan, perisian atau perkakasan yang perlu dan apa-apa cara lain yang diperlukan untuk membolehkan maklumat berekod atau data berkomputer itu difahami.

(4) Mana-mana orang yang melanggar subseksyen (1) atau perenggan (2)(b) melakukan suatu kesalahan dan boleh, apabila disabitkan, dipenjara selama tempoh tidak melebihi lima tahun atau didenda tidak melebihi satu ratus ribu ringgit atau kedua-duanya.

### **Kuasa untuk membuka bungkusan dan memeriksa barang-barang**

**53B.** (1) Mana-mana pegawai yang hak boleh memeriksa apa-apa barang yang sedang diimport atau dieksport atau yang dimaksudkan untuk diimport dan boleh bagi maksud pemeriksaan itu membawa barang-barang itu ke pejabat kastam dan boleh membuka apa-apa bungkusan atau bekas.

(2) Seorang pegawai yang hak boleh menggunakan apa-apa peranti penjejakan atau pengesanan, instrumen tidak intrusif, atau apa-apa bentuk bantuan lain termasuk haiwan dalam melaksanakan kewajibannya di bawah Akta ini.

### **Pemeriksaan orang yang tiba di Malaysia**

**53c.** Mana-mana orang yang mendarat, atau hampir akan mendarat, atau baru sahaja mendarat, dari mana-mana vesel atau pesawat udara, atau meninggalkan mana-mana vesel atau pesawat udara dalam perairan wilayah, sama ada bagi maksud mendarat atau selainnya, atau memasuki Malaysia atau baru memasuki Malaysia melalui jalan raya atau kereta api hendaklah, apabila diminta oleh mana-mana pegawai yang hak, sama ada membenarkan diri, barang-barang dan bagasinya diperiksa oleh pegawai itu, atau bersama-sama barang-barang dan bagasi itu pergi bersama-sama pegawai itu ke pejabat kastam atau balai polis dan di sana membenarkan diri, barang-barang dan bagasinya diperiksa oleh seorang pegawai eksais:

Dengan syarat bahawa—

- (a) mana-mana orang yang meminta supaya dirinya diperiksa dengan kehadiran seorang pegawai kanan eksais tidak boleh diperiksa kecuali dengan kehadiran dan di bawah

penyeliaan pegawai itu, tetapi orang itu boleh ditahan sehingga pegawai itu tiba, atau dibawa ke mana-mana pejabat kastam atau balai polis tempat pegawai itu boleh dijumpai;

- (b) barang-barang dan bagasi mana-mana orang yang meminta untuk hadir apabila barang-barang dan bagasinya diperiksa dan dengan yang demikian menghadirkan dirinya dalam masa yang munasabah tidak boleh diperiksa kecuali dengan kehadirannya; dan
- (c) tiada perempuan boleh diperiksa kecuali oleh seorang perempuan lain dengan betul-betul mengambil kira kehendak kesopanan.

### **Penyitaan barang-barang hal perkara sesuatu kesalahan**

**54.** (1) Semua barang-barang yang berkenaan dengannya telah ada, atau ada, sebab yang munasabah bagi mengesyaki bahawa telah dilakukan sesuatu kesalahan terhadap Akta ini atau terhadap mana-mana peraturan-peraturan yang dibuat di bawahnya, atau sesuatu pelanggaran terhadap mana-mana daripada peruntukan-peruntukan Akta ini atau terhadap mana-mana peraturan-peraturan yang dibuat di bawahnya, atau terhadap sesuatu sekatan atau syarat yang tertakluk kepadanya atau yang atasnya sesuatu lesen atau permit telah diberi di bawah Akta ini, bersama dengan sesuatu bekas, bungkusan, pengangkut selain vesel yang tidak melebihi dua ratus tan berat-tan bersih yang didaftarkan atau kapal udara yang terlibat dalam pengangkutan antarabangsa yang dalamnya barang-barang itu telah dijumpai atau yang telah digunakan berhubung dengan kesalahan atau pelanggaran itu, dan mana-mana buku atau dokumen yang mungkin dipercayai dengan munasabah sebagai ada hubungan dengan kes itu, boleh disita oleh mana-mana pegawai eksais daripada orang itu di mana-mana tempat dalam Malaysia, dan sama ada di darat atau di perairan wilayah.

(2) Semua barang-barang itu dan bekas, bungkusan, kereta, vesel atau kapal udara itu hendaklah, seberapa cepat yang praktik,

diserahkan ke dalam jagaan pegawai yang hak berkewajipan untuk menerimanya.

(3) Apabila apa-apa barang-barang, kereta, vesel atau kapal udara disita di bawah Akta ini, pegawai yang menyita itu hendaklah dengan serta-merta memberi notis secara bertulis mengenai penyitaan itu dan alasan-alasan baginya kepada pemunya barang-barang, kereta, vesel atau kapal udara itu, jika diketahui, sama ada dengan menyerahkan notis itu kepada pemunya itu sendiri atau melalui pos berdaftar mengikut seksyen 42.

(3A) Jika oleh sebab jenis, saiz atau amaunnya tidak praktikal untuk mengeluarkan apa-apa barang-barang, kereta, vesel atau kapal udara yang disita di bawah seksyen ini, pegawai yang menyita itu boleh, dengan apa-apa cara, mengelak barang-barang, keretam vesel atau kapal udara itu, atau premis atau tempat yang di dalamnya barang-barang, kereta, vesel atau kapal udara itu dijumpai.

(3B) Seseorang yang, tanpa kuasa yang sah, memecah, mengganggu atau merosakkan lak yang disebut dalam subseksyen (3A) atau mengeluarkan apa-apa barang-barang, kereta, vesel atau kapal udara yang dilak itu, atau cuba untuk berbuat demikian, melakukan suatu kesalahan dan boleh, apabila disabitkan, dipenjarakan selama tempoh tidak melebihi lima tahun atau didenda tidak melebihi satu ratus ribu ringgit atau kedua-duanya.

(4) Peruntukan-peruntukan seksyen ini berhubung dengan penyitaan—

- (a) apa-apa barang-barang hendaklah dipakai bagi segala isi mana-mana bungkusan atau bekas yang dalamnya barang-barang itu dijumpai, dan bagi sesuatu benda yang digunakan bagi menyembunyikan barang-barang itu;
- (b) sesuatu vesel atau kapal udara hendaklah dipakai juga bagi takal, alat kelengkapan dan peralatan vesel atau kapal udara itu; dan

(c) sesuatu kereta hendaklah dipakai bagi semua alat kelengkapannya, dan bagi mana-mana binatang yang menarik kereta itu.

(5) (*Dipotong oleh Akta A781*).

### **Pemulangan atau pelupusan barang-barang**

**55.** (1) Jika apa-apa barang telah disita di bawah Akta ini, maka seseorang pegawai kanan eksais boleh, menurut budi bicaranya—

(a) memulangkan barang itu untuk sementara kepada pemunya atau kepada orang yang daripada milikan, jagaan atau kawalannya ia telah disita, atau kepada mana-mana orang yang difikirkan oleh pegawai kanan eksais berhak ke atasnya tertakluk kepada apa-apa terma dan syarat sebagaimana yang dikenakan oleh pegawai itu, dan tertakluk, bagaimanapun kepada sekuriti yang cukup diberikan hingga memuaskan hati pegawai itu bahawa barang-barang itu akan diserahkan balik kepadanya apabila permintaan dibuat olehnya dan bahawa terma-terma dan syarat-syarat tersebut, jika ada, akan dipatuhi; atau

(b) memulangkan barang-barang itu kepada pemunya atau kepada orang yang daripada milikan, jagaan atau kawalannya ia telah disita, atau kepada mana-mana orang yang difikirkan oleh pegawai kanan eksais berhak ke atasnya, dengan memberikan kebebasan kepada orang yang kepadanya barang-barang itu dipulangkan sedemikian untuk melupuskannya, dan pemulangan itu adalah tertakluk kepada terma dan syarat sebagaimana yang dikenakan oleh seorang pegawai kanan eksais dan sekuriti diberikan hingga memuaskan hati pegawai itu dengan amaun yang tidak kurang daripada amaun yang, pada pendapat pegawai itu, merupakan—

(i) bagi barang-barang berduti atau barang-barang menyalahi eksais, nilai barang-barang itu pada tarikh barang-barang itu dipulangkan sedemikian;

(ia) bagi barang-barang selain barang-barang yang disebut dalam subperenggan (i), nilai pasaran terbuka barang-barang itu;

(ii) duti eksais yang kena dibayar berkenaan dengannya, sekiranya ada; dan

(iii) apa-apa cukai yang kena dibayar berkenaan dengannya di bawah mana-mana undang-undang bertulis, sekiranya ada,

bagi pembayaran amaun yang dijamin sedemikian kepada Ketua Pengarah sekiranya mahkamah membuat suatu perintah bagi pelucuthakan amaun itu di bawah subseksyen 66(3) atau 67(4), atau sekiranya amaun itu dilucuthakkan di bawah seksyen 69, mengikut mana-mana yang berkenaan; dan

(c) menjual atau memusnahkan barang-barang itu, sebagaimana yang sesuai memandangkan hal-hal keadaan, jika ia makhluk hidup atau jika, pada pendapat pegawai kanan eksais, ia bersifat mudah rosak atau berbahaya atau mungkin cepat merosot dari segi kualiti atau nilainya, dan jika ia dijual sedemikian, dia hendaklah memegang hasil jualan itu untuk mematuhi keputusan apa-apa pendakwaan atau tuntutan, atau suatu pelucuthakan di bawah seksyen 69, mengikut mana-mana yang berkenaan.

(2) Mana-mana orang yang—

(a) gagal menyerahkan kepada pegawai kanan eksais, apabila diminta, barang-barang yang dipulangkan untuk sementara kepadanya di bawah perenggan (1)(a); atau

- (b) gagal mematuhi atau yang melanggar mana-mana terma atau syarat yang dikenakan di bawah perenggan (1)(a) atau (b),

adalah melakukan suatu kesalahan dan boleh, apabila disabitkan, dikenakan penjara selama tempoh tidak melebihi lima tahun atau denda tidak melebihi seratus ribu ringgit atau penjara dan denda itu kedua-duanya.

(3) Liabiliti jenayah mana-mana orang di bawah subseksyen (2) adalah sebagai tambahan kepada apa-apa liabiliti lain yang mungkin ditanggung oleh orang tersebut atau mana-mana orang lain di bawah terma-terma dan syarat-syarat yang berhubungan dengan pemulangan barang-barang di bawah perenggan (1)(a) atau (b).

(4) Peruntukan subseksyen (2) tidaklah terpakai bagi orang sedemikian, jika ada, yang menjadi penggerenti atau penjamin kepada orang yang kepadanya barang-barang itu dipulangkan di bawah perenggan (1)(a) atau (b).

(5) Menteri boleh, dari semasa ke semasa, sama ada secara am atau dalam apa-apa hal atau golongan hal yang tertentu, memberikan apa-apa arahan kepada Ketua Pengarah sebagaimana yang difikirkannya perlu atau suaimanfaat berkenaan dengan perjalanan kuasa-kuasa yang diberikan kepada pegawai kanan eksais di bawah subseksyen (1).

(6) Tiada seorang pun berhak mengekalkan apa-apa tindakan oleh sebab apa-apa perbuatan yang dilakukan atau apa-apa keputusan yang diambil oleh atau bagi pihak Menteri atau oleh atau bagi pihak seseorang pegawai kanan eksais di bawah seksyen ini dan tiada mahkamah mempunyai apa-apa bidang kuasa untuk melayani apa-apa tindakan sedemikian.

**Pengemukaan perakuan ahli analisis, atau pegawai kanan eksais, atau orang yang diberi kuasa oleh Menteri**

**55A.** (1) Dalam mana-mana prosiding berkenaan dengan apa-apa kesalahan terhadap Akta ini atau mana-mana peraturan-peraturan yang dibuat di bawahnya yang di dalamnya kewujudan, perihalan, pengelasan, komposisi, kuantiti, kualiti atau nilai, atau apa-apa perkara lain yang berhubungan dengan, mana-mana barang yang dipulangkan di bawah perenggan 55(1)(a) atau (b) atau dijual atau dimusnahkan di bawah perenggan (c) subseksyen tersebut, dipersoalkan, apa-apa dokumen yang dikemukakan oleh pendakwa yang berupa sebagai suatu perakuan berkenaan dengan mana-mana perkara sedemikian yang diberikan dan ditandatangani oleh—

- (a) mana-mana ahli analisis mengikut pengertian subseksyen 61(5); atau
- (b) pegawai kanan eksais; atau
- (c) mana-mana orang, tidak kira sama ada dia seorang pegawai awam ataupun tidak, yang diberi kuasa oleh atau bagi pihak Menteri, sama ada secara am atau dalam apa-apa hal tertentu, bagi maksud-maksud seksyen ini,

bolehlah diterima sebagai keterangan dan konklusifnya dokumen itu tidaklah boleh dipersoalkan atas alasan bahawa barang-barang yang berkenaan dengannya perakuan itu diberikan telah tidak dikemukakan di hadapan mahkamah sama ada sebahagiannya atau keseluruhannya, dan ia hendaklah menjadi keterangan tentang isi kandungannya, termasuk fakta-fakta yang dinyatakan di dalamnya, tanpa bukti tentang tandatangan pada perakuan sedemikian.

(2) Peruntukan seksyen ini hendaklah terpakai walau apa pun apa-apa jua yang terkandung dalam mana-mana undang-undang bertulis lain atau rukun keterangan yang bertentangan.

### **Kuasa untuk menangkap**

**56.** (1) Mana-mana pegawai eksais boleh menangkap tanpa waran—



- (a) mana-mana orang yang didapati melakukan atau cuba melakukan, atau mengguna khidmat atau membantu seseorang melakukan, atau bersubahat dalam melakukan, sesuatu kesalahan terhadap Akta ini atau terhadap mana-mana peraturan-peraturan yang dibuat di bawahnya;
- (b) mana-mana orang yang munasabah disyaki ada memiliki apa-apa barang-barang yang boleh dikenakan penyitaan di bawah Akta ini; dan
- (c) mana-mana orang yang munasabah disyaki sebagai telah didapati bersalah atas suatu kesalahan terhadap Akta ini atau terhadap mana-mana peraturan-peraturan yang dibuat di bawahnya;

dan boleh memeriksa atau menyebabkan supaya diperiksa mana-mana orang yang ditangkap sedemikian:

Dengan syarat bahawa tiada seseorang perempuan boleh diperiksa kecuali oleh seseorang perempuan lain dengan betul-betul mengambil kira kehendak kesopanan.

(2) Tiap-tiap orang yang ditangkap sedemikian hendaklah dibawa ke balai polis atau boleh ditahan dalam jagaan pegawai yang hak.

(2A) Pegawai yang hak boleh mengambil atau menyebabkan diambil gambar dan cap jari dan ibu jari mana-mana orang yang ditangkap di bawah subseksyen (1).

(3) Jika mana-mana orang yang boleh kena tangkap di bawah Akta ini tidak ditangkap pada masa melakukan kesalahan yang kerananya ia boleh kena tangkap sedemikian, atau jika selepas ditangkap ia melarikan diri maka ia boleh pada bila-bila masa selepas itu ditangkap dan tindakan diambil terhadapnya seolah-olah ia telah ditangkap pada masa melakukan kesalahan itu.

(4) Tertakluk kepada apa-apa syarat yang difikirkan patut oleh Ketua Pengarah, tiap-tiap orang yang ditangkap sedemikian boleh dilepaskan daripada jagaan—

- (a) apabila dia menandatangani apa-apa jumlah wang yang munasabah sebagaimana yang dikehendaki oleh seorang pegawai eksais yang hak;
  - (b) apabila dia menyempurnakan suatu bon, dengan suatu penjamin atau penjamin-penjamin, sebagaimana yang dikehendaki oleh seorang pegawai eksais yang hak; atau
  - (c) apabila dia menandatangani apa-apa jumlah wang yang munasabah sebagaimana yang dikehendaki oleh seorang pegawai eksais yang hak dan dia menyempurnakan suatu bon, dengan suatu penjamin atau penjamin-penjamin, sebagaimana yang dikehendaki oleh seorang pegawai eksais yang hak.
- (5) Mana-mana orang yang telah dilepaskan daripada jagaan di bawah subseksyen (4) boleh ditangkap tanpa waran oleh mana-mana pegawai eksais—
- (a) jika pegawai itu mempunyai alasan yang munasabah untuk mempercayai bahawa mana-mana syarat yang berdasarkannya atau yang tertakluk kepadanya orang itu telah dilepaskan atau selainnya dibenarkan dijamin telah atau mungkin dilanggar; atau
  - (b) apabila diberitahu secara bertulis oleh penjamin orang itu bahawa orang itu mungkin melanggar mana-mana syarat yang berdasarkannya atau yang tertakluk kepadanya orang itu telah dilepaskan dan bahawa penjamin itu hendak dibebaskan daripada obligasinya sebagai penjamin.
- (6) Jika seseorang yang ditangkap kerana sesuatu kesalahan di bawah Akta ini sedang menjalani hukuman pemenjaraan atau sedang ditahan di bawah mana-mana undang-undang yang berhubungan dengan tahanan pencegahan, atau selainnya berada dalam jagaan yang sah, dia hendaklah, apabila diperintahkan secara bertulis oleh seorang pegawai kanan eksais atau yang berpangkat lebih tinggi daripada Penolong Kanan Pengarah, dikemukakan di hadapan pegawai itu atau di hadapan mana-mana pegawai kanan eksais lain bagi maksud

penyiasatan, dan bagi maksud itu dia boleh diletakkan dalam jagaan sah selama tempoh yang tidak melebihi empat belas hari.

(7) Seseorang yang ditahan dalam jagaan yang sah di bawah subseksyen (6) atau selainnya di bawah mana-mana undang-undang bertulis boleh—

- (a) pada bila-bila masa dibawa kepada seorang pegawai kanan eksais bagi maksud penyiasatan; atau
- (b) dibawa ke mana-mana tempat lain bagi maksud penggeledahan tempat itu, atau penyitaan apa-apa barang-barang, atau mengenal pasti mana-mana orang bagi apa-apa maksud lain yang berhubungan dengan penyiasatan di bawah Akta ini.

### **Kuasa untuk memeriksa orang**

**56A.** (1) Seseorang pegawai kanan eksais yang menyiasat sesuatu kesalahan di bawah Akta ini boleh—

- (a) memerintahkan mana-mana orang yang mungkin mengetahui fakta-fakta dan hal keadaan kes supaya hadir di hadapannya bagi maksud diperiksa secara lisan berhubung dengan apa-apa perkara yang mungkin, pada pendapatnya, membantu dalam penyiasatan kesalahan itu; atau
- (b) memerintahkan mana-mana orang supaya mengemukakan di hadapannya apa-apa buku, dokumen atau apa-apa salinannya yang diperakui sah, atau apa-apa benda lain yang mungkin, pada pendapatnya, membantu dalam penyiasatan kesalahan itu.

(2) Perenggan (1)(b) tidak terpakai bagi buku jurubank.

(3) Seseorang yang kepadanya suatu perintah di bawah perenggan (1)(a) telah diberikan hendaklah—

- (a) hadir mengikut terma perintah itu untuk diperiksa, dan hendaklah terus hadir dari hari ke hari jika diarahkan sedemikian sehingga pemeriksaan itu selesai; dan
- (b) semasa pemeriksaan itu, kena menjawab semua soalan yang berhubungan dengan kes yang dikemukakan kepadanya dan terikat di sisi undang-undang untuk menyatakan yang benar, sama ada atau tidak jawapan itu dibuat keseluruhannya atau sebahagiannya bagi menjawab soalan tetapi dia boleh enggan menjawab apa-apa soalan yang jawapannya mempunyai kecenderungan untuk mendedahkannya kepada pertuduhan jenayah atau hukuman lucut hak.

(4) Seseorang yang telah diberi suatu perintah di bawah perenggan (1)(b) tidak boleh menyembunyikan, memusnahkan, mengubah, memindahkan dari Malaysia, atau membuat urusan tentang, menggunakan, atau melupuskan, apa-apa buku, dokumen atau benda yang dinyatakan dalam perintah itu, atau mengubah atau mencatitkan apa-apa catatan dalam mana-mana buku atau dokumen itu atau menyebabkan perbuatan itu dilakukan, atau membantu atau berkomplot untuk melakukan perbuatan itu.

(5) Seseorang yang telah diberi suatu perintah di bawah subseksyen (1) hendaklah mematuhi perintah itu dan kehendak subseksyen (3) dan (4) walau apa pun mana-mana undang-undang bertulis yang berlawanan.

(6) Sesuatu pernyataan yang dibuat oleh mana-mana orang yang disiasat di bawah Akta ini sama ada atau tidak suatu amaran telah diberikan kepadanya di bawah subseksyen 56B(3) hendaklah direkodkan secara bertulis oleh pegawai kanan eksais yang memeriksanya dan pernyataan yang direkodkan sedemikian hendaklah dibacakan kepada dan ditandatangani oleh orang itu, dan jika orang itu enggan menandatangani rekod itu, pegawai kanan eksais itu hendaklah mencatatkan pada rekod itu di bawah tandatangannya hakikat keengganannya itu dan sebab-sebabnya, jika ada, yang dinyatakan oleh orang yang diperiksa itu.

(7) Rekod sesuatu pemeriksaan yang dibuat semasa penyiasatan di bawah Akta ini atau mana-mana buku, dokumen atau benda yang dikemukakan di bawah perenggan (1)(b) atau selainnya semasa pemeriksaan di bawah perenggan (1)(a), hendaklah, walau apa pun mana-mana undang-undang bertulis yang berlawanan, boleh diterima sebagai keterangan dalam mana-mana prosiding di bawah Akta ini di mana-mana mahkamah—

(a) bagi suatu kesalahan di bawah Akta ini; atau

(b) bagi pelucuthakan harta menurut seksyen 66, 67 atau 69,

tanpa mengambil kira sama ada prosiding itu adalah terhadap orang yang diperiksa, atau yang mengemukakan buku, dokumen atau barang itu, atau terhadap mana-mana orang lain.

### **Kebolehterimaan pernyataan dalam keterangan**

**56B.** (1) Dalam mana-mana perbicaraan atau siasatan oleh sesuatu mahkamah tentang suatu kesalahan di bawah Akta ini, apa-apa pernyataan, sama ada pernyataan itu terjumlah kepada suatu pengakuan atau tidak atau sama ada pernyataan itu secara lisan atau bertulis, dibuat pada bila-bila masa, sama ada sebelum atau selepas orang itu dipertuduh dan sama ada semasa penyiasatan di bawah Akta ini atau tidak, dan sama ada atau tidak keseluruhannya atau sebahagiannya kerana menjawab soalan, oleh orang yang tertuduh kepada atau dengan didengar oleh mana-mana pegawai eksais, dan sama ada atau tidak diterjemahkan kepadanya oleh mana-mana pegawai eksais lain atau mana-mana orang lain, hendaklah, walau apa pun mana-mana undang-undang bertulis yang berlawanan, boleh diterima dalam perbicaraannya sebagai keterangan dan, jika orang itu mengemukakan dirinya sebagai saksi, mana-mana pernyataan sedemikian boleh digunakan dalam pemeriksaan balas dan bagi maksud mencabar kebolehpercayaannya.

(2) Tiada pernyataan yang dibuat di bawah subseksyen (1) boleh diterima atau digunakan dalam pemeriksaan balas atau bagi maksud mencabar kebolehpercayaan orang yang membuat pernyataan itu jika

pembuatan pernyataan itu ternyata pada mahkamah telah disebabkan oleh apa-apa dorongan, ugutan, atau janji yang berkaitan dengan pertuduhan terhadap orang itu yang datang daripada orang yang berkuasa dan mencukupi pada pendapat mahkamah itu untuk memberi orang itu alasan yang pada pendapatnya munasabah untuk menjangkakan bahawa dengan membuat pernyataan itu dia akan mendapat apa-apa faedah atau mengelakkan apa-apa durjana keduniaan yang berkaitan dengan prosiding terhadapnya.

(3) Jika mana-mana orang ditangkap bagi kesalahan di bawah Akta ini, dia hendaklah diberi amaran mengikut perkataan yang berikut atau perkataan-perkataan yang memberi makna yang serupa:

“Saya bertanggungjawab untuk memberi amaran kepada kamu bahawa kamu tidak diwajibkan berkata sesuatu atau menjawab apa-apa soalan, tetapi apa-apa yang kamu katakan, sama ada kerana menjawab soalan itu atau tidak, boleh diberikan dalam keterangan.”.

(4) Pernyataan yang dibuat oleh mana-mana orang yang dituduh bagi sesuatu kesalahan di bawah Akta ini yang dibuat sebelum ada masa untuk memberi amaran kepadanya tidak boleh dianggap tidak boleh diterima sebagai keterangan semata-mata kerana tiada amaran sedemikian telah diberikan jika amaran itu tetap diberikan dengan seberapa segera yang boleh.

(5) Walau apa pun apa-apa jua yang berlawanan yang terkandung dalam mana-mana undang-undang bertulis, seseorang yang dituduh melakukan kesalahan di bawah Akta ini yang baginya subseksyen (1) terpakai, tidak terikat untuk menjawab apa-apa soalan berhubung dengan kes itu selepas apa-apa amaran yang disebut dalam subseksyen (3) telah diberikan kepadanya.

### **Tatacara apabila penyiasatan tidak boleh diselesai dalam tempoh dua puluh empat jam**

**56c.** (1) Apabila mana-mana orang ditangkap dan ditahan dalam jagaan dan didapati bahawa penyiasatan tidak dapat diselesaikan

dalam tempoh dua puluh empat jam dan terdapat alasan bagi mempercayai bahawa tuduhan atau maklumat itu adalah kukuh, pegawai kanan eksais yang membuat penyiasatan itu di bawah Akta ini hendaklah dengan segera mengemukakan kepada Majistret sesalinan catatan dalam diari yang ditetapkan di bawah seksyen 56D berhubung dengan kes itu dan hendaklah pada masa yang sama mengemukakan orang itu di hadapan Majistret.

(2) Majistret yang di hadapannya seseorang itu dikemukakan di bawah seksyen ini boleh, sama ada ia mempunyai atau tidak mempunyai bidang kuasa untuk membicarakan kes itu, dari semasa ke semasa, membenarkan supaya penahanan orang itu dalam jagaan sebagaimana yang Majistret itu berpendapat sesuai untuk suatu tempoh yang tidak melebihi lima belas hari secara keseluruhannya.

(3) Jika Majistret itu tidak mempunyai bidang kuasa untuk membicarakan kes itu dan berpendapat penahanan selanjutnya tidak diperlukan, dia boleh memerintahkan supaya orang itu dikemukakan di hadapan Majistret yang mempunyai bidang kuasa itu atau, jika kes itu hanya boleh dibicarakan oleh Mahkamah Tinggi, di hadapannya sendiri atau Majistret yang lain yang mempunyai bidang kuasa dengan tujuan untuk menghantar kes itu untuk perbicaraan di Mahkamah Tinggi.

(4) Majistret yang membenarkan penahanan di bawah seksyen ini hendaklah merekodkan sebab-sebab dia berbuat demikian.

### **Catatan diari semasa penyiasatan**

**56D.** (1) Tiap-tiap pegawai eksais yang membuat penyiasatan di bawah Akta ini hendaklah dari hari ke hari membuat catatan prosidingnya dalam penyiasatan itu dalam suatu diari yang menyatakan—

- (a) masa arahan untuk penyiasatan, jika ada, sampai kepadanya;
- (b) masa dia memulakan dan menamatkan penyiasatan itu;

- (c) tempat atau tempat-tempat yang dilawati olehnya; dan
- (d) suatu pernyataan mengenai hal keadaan yang telah ditentukan melalui penyasatannya.

(2) Walau apa pun apa-apa jua yang terkandung dalam Akta Keterangan 1950, orang yang dituduh tidak berhak, sama ada sebelum atau semasa mana-mana prosiding di bawah Akta ini, meminta atau memeriksa apa-apa diari itu:

Dengan syarat bahawa jika pegawai eksais yang telah melakukan penyasatan itu merujuk kepada diari itu bagi maksud seksyen 159 atau 160 Akta Keterangan 1950, hanya catatan yang dirujuk oleh pegawai itu hendaklah ditunjukkan kepada orang yang dituduh itu, dan mahkamah hendaklah atas permintaan pegawai itu menyebabkan apa-apa catatan lain disembunyikan daripada pandangan atau dipadamkan.

### **Keterangan ejen provokasi boleh diterima**

**56E.** (1) Walau apa pun mana-mana rukun undang-undang atau peruntukan Akta ini atau mana-mana undang-undang bertulis lain yang berlawanan, tiada ejen provokasi boleh dianggap tidak boleh dipercayai hanya oleh sebab dia cuba untuk bersubahat atau telah bersubahat dalam melakukan suatu kesalahan oleh mana-mana orang di bawah Akta ini jika cubaan untuk bersubahat atau persubahatan itu adalah semata-mata bagi maksud mendapatkan keterangan terhadap orang itu.

(2) Walau apa pun mana-mana rukun undang-undang atau peruntukan Akta ini atau mana-mana undang-undang bertulis lain yang berlawanan, dan ejen provokasi itu ialah seorang pegawai eksais atau pegawai polis tidak kira apa jua pangkatnya, apa-apa pernyataan, sama ada lisan atau bertulis, yang dibuat kepada ejen provokasi oleh mana-mana orang yang kemudiannya dipertuduh atas suatu kesalahan di bawah Akta ini boleh diterima sebagai keterangan semasa perbicaraannya.



## BAHAGIAN XI

## PERUNTUKAN MENGENAI PERBICARAAN DAN PROSIDING

57. *(Dipotong oleh Akta A1112).*

**Majistret Kelas Satu mempunyai bidang kuasa penuh**

58. Walau apa pun mana-mana undang-undang bertulis yang berlawanan, Majistret Kelas Satu hendaklah mempunyai bidang kuasa bagi membicarakan sesuatu kesalahan di bawah Akta ini, dan bagi mengaward hukuman yang sepenuh baginya.

**Beban membuktikan**

59. Jika, dalam sesuatu pendakwaan berkenaan dengan apa-apa barang-barang yang disita kerana tidak dibayar duti eksais, atau kerana sebab lain penyitaan atau bagi mendapatkan apa-apa penalti atau penalti-penalti di bawah Akta ini, suatu pertikaian timbul mengenai sama ada duti telah dibayar berkenaan dengan barang-barang itu, sama ada barang-barang itu telah secara sah dikeluarkan, ditapai, disuling, disadap atau dikilang atau diimport, atau berkenaan dengan tempat daripada mana-mana barang-barang berduti telah dibawa atau di mana barang-barang berduti itu telah dimuat atau disimpan, maka dalam tiap-tiap satu kes itu, beban membuktikannya terletak pada pihak yang didakwa dalam pendakwaan itu.

**Perintah mahkamah**

59A. (1) Jika mana-mana orang didapati bersalah atas suatu kesalahan di bawah Akta ini, mahkamah yang di hadapannya orang itu didapati bersalah hendaklah memerintahkan orang itu supaya membayar kepada Ketua Pengarah amaun duti eksais yang genap masa dan kena dibayar atau penalti yang kena dibayar di bawah Akta ini, jika ada, sebagaimana yang diperakukan oleh Ketua Pengarah dan duti eksais atau penalti itu boleh didapatkan mengikut cara yang sama

sebagaimana yang diperuntukkan di bawah seksyen 283 Kanun Tatacara Jenayah.

(2) Bagi maksud subseksyen (1), mahkamah mempunyai bidang kuasa sivil setakat amaun duit eksais yang genap masa dan kena dibayar, dan perintah itu boleh dikuatkuasakan dalam semua keadaan sebagai suatu penghakiman muktamad mahkamah yang memihak kepada Ketua Pengarah.

(3) Jika mana-mana orang didapati tidak bersalah atas suatu kesalahan di bawah Akta ini telah membayar amaun duit eksais yang genap masa dan kena dibayar atau penalti yang kena dibayar menurut seksyen 82A berkenaan dengan kesalahan yang dipertuduh, mahkamah boleh memerintahkan supaya amaun yang telah dibayar itu dibayar balik kepada orang itu jika tiada notis rayuan difailkan.

**Pemeriksaan sebahagian barang-barang yang disita hendaklah diterima oleh mahkamah.**

**60.** (1) Apabila apa-apa barang yang disyaki sebagai berduti atau selainnya boleh kena disita telah disita, maka memadailah dibuka dan diperiksa lima peratus sahaja daripada setiap jenis bungkusan atau bekas yang mengandungi barang-barang itu.

(2) Jika didapati perlu untuk menguji mana-mana barang yang disita di bawah Akta ini, maka memadailah diuji hanya satu contoh yang tidak melebihi lima peratus isipadu atau berat barang-barang yang diperiksa di bawah subseksyen (1).

(3) Mahkamah hendaklah menganggap bahawa barang-barang yang terkandung dalam bungkusan-bungkusan atau bekas-bekas yang tidak dibuka itu adalah sama jenis, kuantiti dan kualitinya dengan barang-barang yang didapati dalam bungkusan-bungkusan atau bekas-bekas seumpamanya yang telah dibuka itu.

**Keterangan mengenai analisis boleh diberi secara bertulis**

**61.** (1) Dalam sesuatu pendakwaan di bawah Akta ini atau di bawah mana-mana peraturan-peraturan yang dibuat di bawahnya, sesuatu perakuan analisis yang berupa sebagai dibuat di bawah tandatangan seseorang ahli analisis adalah menjadi keterangan yang cukup mengenai fakta yang dinyatakan dalamnya apabila perakuan itu dikemukakan oleh pendakwa, melainkan jika pihak yang didakwa menghendaki supaya ahli analisis itu dipanggil sebagai seorang saksi dan dalam hal yang demikian ia hendaklah memberi notis mengenainya kepada pendakwa tidak kurang daripada tiga hari genap sebelum tarikh perbicaraan itu.

(2) Begitu juga sesuatu perakuan analisis yang berupa sebagai dibuat di bawah tandatangan seseorang ahli analisis adalah menjadi keterangan yang cukup mengenai fakta-fakta yang dinyatakan dalamnya apabila perakuan itu dikemukakan oleh pihak yang didakwa, melainkan jika pendakwa menghendaki supaya ahli analisis itu dipanggil sebagai seorang saksi, dalam hal yang demikian ia hendaklah memberi notis mengenainya kepada pihak yang didakwa tidak kurang daripada tiga hari genap sebelum tarikh perbicaraan itu.

(3) Suatu salinan perakuan yang tersebut dalam subseksyen (1) dan (2) hendaklah dihantar kepada pihak yang didakwa atau pendakwa sekurang-kurangnya sepuluh hari genap sebelum tarikh perbicaraan itu, dan jika ia tidak dihantar sedemikian maka mahkamah boleh menangguhkan perbicaraan itu dengan syarat yang difikirkannya patut.

(4) Ahli-ahli analisis adalah diwajibkan oleh Akta ini menyatakan perkara yang benar dalam perakuan analisis di bawah tandatangan mereka.

(5) Dalam seksyen ini, “penganalisis” ertinya—

- (a) seorang ahli kimia berdaftar di bawah Akta Ahli Kimia 1975 [Akta 158] atau seseorang yang diberi kuasa di bawah seksyen 23A Akta itu, atau pekerjaanya yang bekerja di bawah penyeliaannya;

- (b) seorang jurutera berdaftar di bawah Akta Pendaftaran Jurutera 1967 [Akta 138];
- (c) seorang ahli geologi berdaftar di bawah Akta Ahli Geologi 2008 [Akta 689];
- (d) Merinyu Timbang dan Sukat yang dilantik sebagai sedemikian di bawah mana-mana undang-undang bertulis yang berhubungan dengan timbang dan sukat yang berkuat kuasa di Malaysia;
- (e) ahli agronomi;
- (f) ahli kajitumbuhan;
- (g) ahli kajipenyakit tumbuh-tumbuhan; dan
- (h) ahli kajiserangga tumbuh-tumbuhan.

(5A) Menteri boleh, selepas berunding dengan Menteri berkaitan, melantik mana-mana orang yang berkelayakan atau golongan orang yang berkelayakan melalui pemberitahuan dalam *Warta* sebagai penganalisis bagi maksud seksyen ini.

(6) Jika seseorang ahli analisis dipanggil oleh pihak kena tuntutan sebagaimana yang diperuntukkan oleh subseksyen (1), dia hendaklah dipanggil atas perbelanjaan pihak kena tuntutan.

(7) Jika dalam sesuatu perbicaraan atau prosiding yang diadakan di bawah Akta ini adalah perlu untuk menentukan kandungan alkohol bagi apa-apa liquor, perakuan seseorang pegawai kanan eksais mengenai kandungan alkohol itu hendaklah diterima seolah-olah pegawai itu adalah seorang ahli analisis, dan bagi sesuatu kes seperti itu subseksyen (1), (4) dan (6) hendaklah terpakai dengan cara yang sama dan setakat yang sama seolah-olah pegawai tersebut adalah seorang ahli analisis.

**Peruntukan keterangan**

**61A.** (1) Bagi maksud apa-apa prosiding di bawah Akta ini, apa-apa pernyataan yang berupa sebagai telah ditandatangani oleh Ketua Pengarah atau mana-mana pegawai eksais yang diberi kuasa oleh Ketua Pengarah yang menjadi sebahagian daripada atau yang dilampirkan kepada maklumat, tuntutan atau pernyataan tuntutan itu, hendaklah menjadi keterangan *prima facie* mengenai apa-apa fakta yang dinyatakan dalamnya.

(2) Jika suatu transkrip mengenai apa-apa butir-butir yang terkandung dalam suatu akuan atau dokumen lain yang berhubungan dengan duti eksais diperaku dengan ditandatangani oleh Ketua Pengarah atau mana-mana pegawai eksais yang diberi kuasa oleh Ketua Pengarah sebagai suatu salinan benar butir-butir itu, transkrip itu hendaklah menjadi keterangan *prima facie* sebagai bukti butir-butir itu.

(3) Tiada pernyataan yang dibuat atau dokumen yang dikemukakan oleh atau bagi pihak mana-mana orang tidak boleh diterima dalam keterangan terhadap orang itu dalam apa-apa prosiding terhadapnya yang seksyen ini terpakai baginya semata-mata oleh sebab bahawa orang itu telah atau mungkin telah didorong untuk membuat pernyataan itu atau mengemukakan dokumen itu atas apa-apa dorongan atau janji yang diberi atau dibuat secara sah oleh mana-mana orang yang mempunyai apa-apa kewajipan rasmi di bawah, atau diambil kerja dalam pentadbiran Akta ini.

(4) Tiada apa-apa jua dalam Akta ini boleh menjejaskan perjalanan kuat kuasa Bab IX Bahagian III Akta Keterangan 1950.

(5) Bagi maksud perenggan 74(1)(e) dan seksyen 74B dan 74C, jika dalam apa-apa prosiding dibuktikan bahawa apa-apa pernyataan atau catatan palsu telah dibuat dalam apa-apa akuan yang diberikan di bawah Akta ini oleh atau bagi pihak mana-mana orang, atau dalam apa-apa buku akaun atau rekod mana-mana orang—

(a) orang itu hendaklah dianggap, sehingga dibuktikan sebaliknya, telah membuat pernyataan atau catatan palsu itu

atau telah menyebabkan pernyataan atau catatan palsu itu dibuat atau telah membenarkan ia dibuat dengan niat untuk mengelak pembayaran duti eksais atau untuk memperoleh suatu pemulangan balik atau pulangan cukai bagi duti eksais yang orang itu tidak berhak kepadanya, mengikut mana-mana yang berkenaan; dan

- (b) mana-mana orang lain yang membuat apa-apa pernyataan atau catatan palsu itu hendaklah dianggap, sehingga dibuktikan sebaliknya, telah membuat pernyataan atau catatan palsu itu dengan niat untuk membantu orang yang disebut dalam perenggan (a) untuk mengelak pembayaran duti eksais atau untuk memperoleh pemulangan balik atau pulangan cukai bagi duti eksais yang orang yang disebut dalam perenggan (a) itu tidak berhak kepadanya.

(6) Walau apa pun apa-apa yang berlawanan dalam mana-mana undang-undang bertulis, jika mana-mana pegawai eksais telah memperoleh apa-apa dokumen atau keterangan lain dalam melaksanakan kuasanya di bawah Akta ini, dokumen atau salinan dokumen itu atau keterangan lain itu, mengikut mana-mana yang berkenaan, hendaklah menjadi keterangan *prima facie* dalam apa-apa prosiding di bawah Akta ini.

(7) Jika apa-apa dokumen yang hendak digunakan dalam apa-apa prosiding terhadap mana-mana orang bagi sesuatu kesalahan di bawah Akta ini adalah dalam bahasa selain bahasa kebangsaan atau bahasa Inggeris, terjemahan dokumen itu dalam bahasa kebangsaan atau bahasa Inggeris hendaklah diterima sebagai keterangan jika terjemahan itu disertai dengan suatu perakuan orang yang menterjemahkan dokumen itu yang menyatakan bahawa terjemahan itu ialah terjemahan yang tepat, benar dan betul dan terjemahan itu telah dibuat oleh orang itu atas kehendak mana-mana pegawai eksais.

(8) Subseksyen (7) hendaklah terpakai bagi suatu dokumen yang diterjemahkan, tidak kira sama ada dokumen itu telah dibuat di dalam atau di luar Malaysia, atau sama ada terjemahan itu telah dibuat di dalam atau di luar Malaysia, atau sama ada milikan dokumen itu telah

diperoleh oleh mana-mana pegawai eksais di dalam atau di luar Malaysia.

### **Bukti mengenai pendaftaran atau pelesenan kenderaan dalam Malaysia dan Singapura**

**62.** Jika adalah berkaitan dalam sesuatu pendakwaan di bawah Akta ini supaya dipastikan butir-butir mengenai pendaftaran dan pelesenan sesuatu kenderaan yang didaftarkan atau dilesen dalam sesuatu pelabuhan atau tempat dalam Malaysia atau Singapura, sesuatu perakuan yang berupa sebagai ditandatangani oleh pegawai yang bertanggungjawab atas pendaftaran atau pelesenan itu di bawah mana-mana undang-undang bertulis yang pada masa itu berkuat kuasa dalam Malaysia atau mana-mana bahagian daripadanya atau dalam Singapura hendaklah menjadi keterangan *prima facie* mengenai segala butir berkenaan dengan pendaftaran atau pelesenan yang terkandung dalamnya, dan beban membuktikan ketidakbetulan apa-apa butir yang dinyatakan dalam perakuan itu hendaklah terletak atas orang yang menafikan kebetulan butir-butir itu.

### **Bukti tentang tanan atau binaan sesuatu pesawat**

**62A.** (1) Jika dalam mana-mana pendakwaan di bawah Akta ini atau mana-mana peraturan-peraturan yang dibuat di bawahnya, adalah relevan untuk menentukan tanan atau binaan atau butir-butir lain yang memperihalkan identiti sesuatu pesawat, dan jika mana-mana butir ini yang berhubungan dengan identiti pesawat itu dipersoalkan, maka apa-apa dokumen yang dikemukakan oleh pihak pendakwa yang berupa sebagai suatu perakuan berkenaan dengan apa-apa perkara sedemikian yang diberikan dan ditandatangani oleh mana-mana pegawai yang bertanggungjawab bagi perkara sedemikian di bawah mana-mana undang-undang bertulis yang sedang berkuat kuasa di Malaysia hendaklah boleh diterima sebagai keterangan, dan perakuan itu hendaklah menjadi keterangan tentang kandungannya, termasuk fakta yang dinyatakan di dalamnya, tanpa bukti tandatangan pada perakuan itu.

(2) Peruntukan seksyen ini hendaklah terpakai walau apa pun apa-apa jua yang terkandung dalam mana-mana undang-undang bertulis atau rukun keterangan lain yang berlawanan.

### **Bukti tentang ketepatan kompas, radar, dsb.**

**62B.** Jika dalam mana-mana prosiding perlu dibuktikan ketepatan sesuatu kompas, radar atau apa-apa alat pelayaran lain, sesuatu perakuan yang berupa sebagai ditandatangani oleh seorang syahbandar atau mana-mana pegawai yang dilantik oleh Menteri yang bertanggungjawab berkenaan dengan kompas, radar atau apa-apa alat pelayaran lain itu, hendaklah boleh diterima oleh mahkamah sebagai bukti *prima facie* tentang fakta yang diperakui dalam perakuan itu.

### **Bukti tentang duti timbal balas, anti-lambakan dan perlindungan yang kena dibayar**

**62c.** Jika dalam mana-mana prosiding perlu dibuktikan amaun duti timbal balas, anti-lambakan atau perlindungan yang kena dibayar, pengemukaan suatu perakuan yang ditandatangani oleh Ketua Pengarah yang menyatakan amaun duti yang kena dibayar itu hendaklah menjadi kuasa yang cukup bagi mahkamah untuk memberikan penghakiman bagi amaun itu.

### **Cara penyitaan tidak boleh disiasat dalam perbicaraan atau dalam rayuan kepada Mahkamah Tinggi**

**63.** Dalam sesuatu perbicaraan di hadapan mana-mana mahkamah, dan dalam sesuatu prosiding atas rayuan kepada Mahkamah Tinggi, berhubung dengan penyitaan barang-barang yang tertakluk kepada lucut hak di bawah Akta ini mahkamah hendaklah terus mengadakan perbicaraan itu atau mendengar rayuan itu hanya mengenai merit kes itu tanpa menyiasat tentang cara atau gaya sesuatu penyitaan itu dibuat kecuali setakat mana cara dan gaya penyitaan itu boleh menjadi keterangan mengenai merit kes itu.



**Kewajipan kerahsiaan**

**63A.** (1) Kecuali sebagaimana yang diperuntukkan di bawah seksyen 64, nama, alamat, nombor kad pengenalan dan nombor pasport seseorang pemberi maklumat dan isi maklumat yang diterima daripada seseorang pemberi maklumat hendaklah dirahsiakan dan tidak boleh dizahirkan oleh mana-mana pegawai yang hak atau mana-mana orang yang dalam perjalanan biasa tugasnya memperoleh atau mengawal atau mendapat akses kepada maklumat itu kepada mana-mana orang kecuali pegawai eksais ditetapkan yang diberi kuasa oleh Ketua Pengarah.

(2) Mana-mana orang yang tidak mematuhi subseksyen (1) adalah bersalah atas suatu kesalahan terhadap Akta ini dan boleh, apabila disabitkan, dikenakan denda tidak melebihi lima ratus ribu ringgit atau penjara selama tempoh tidak melebihi tujuh tahun atau denda dan penjara itu kedua-duanya.

**Perlindungan pemberi maklumat daripada diketahui**

**64.** (1) Kecuali sebagaimana yang diperuntukkan kemudian daripada ini, tiada seseorang saksi dalam sesuatu prosiding sivil atau jenayah boleh diwajibkan atau dibenarkan menzahir nama atau alamat seseorang pemberi maklumat, atau isi maklumat yang diterima daripadanya, atau menyatakan apa-apa perkara yang mungkin menyebabkan ia diketahui.

(2) Jika sesuatu buku, dokumen atau kertas, yang menjadi keterangan atau boleh dikenakan pemeriksaan dalam mana-mana jua prosiding sivil atau jenayah, adalah mengandungi sesuatu catatan dalam mana seseorang pemberi maklumat dinamakan atau diperihalkan atau yang mana mungkin menyebabkan ia diketahui, maka mahkamah hendaklah menyebabkan semua bahagian itu dipadamkan atau ditutup supaya tidak dapat dilihat setakat mana yang perlu bagi melindungi pemberi maklumat itu daripada diketahui.

(3) Jika dalam perbicaraan sesuatu kesalahan terhadap Akta ini atau terhadap mana-mana peraturan-peraturan yang dibuat di

bawahnya, mahkamah, selepas menyiasat dengan sepenuhnya mengenai kes itu, mempercayai bahawa pemberi maklumat itu dengan sengaja membuat dalam pengaduannya suatu pernyataan matan yang diketahui atau dipercayainya sebagai palsu atau tidak dipercayainya sebagai benar, atau jika dalam sesuatu prosiding lain mahkamah berpendapat bahawa keadilan tidak dapat berhasil dengan sepenuhnya antara pihak-pihak dalam prosiding itu tanpa dizahirkan pemberi maklumat itu, maka adalah sah bagi mahkamah menghendaki dikemukakan pengaduan asal itu, jika secara bertulis, dan membenarkan penyiasatan dan menghendaki penzahiran sepenuhnya mengenai pemberi maklumat itu.

### **Kerahsiaan maklumat**

**64A.** (1) Mana-mana orang yang mempunyai apa-apa kewajipan rasmi atau yang dilantik atau yang diambil kerja di bawah Akta ini, hendaklah menganggap dan menguruskan semua maklumat, dokumen atau akuan yang berhubungan dengan pengimportan, pengeksportan, penilaian atau penjenisan apa-apa barang-barang sebagai rahsia.

(2) Tertakluk kepada subseksyen (4), mana-mana orang yang mempunyai milikan atau kawalan ke atas apa-apa dokumen, maklumat atau akuan, atau salinannya, yang berhubungan dengan pengimportan, pengeksportan, penilaian atau penjenisan apa-apa barang-barang, yang pada bila-bila masa, selain bagi maksud Akta ini atau dengan kuasa nyata Ketua Pengarah—

- (a) menyampaikan maklumat itu atau apa-apa yang terkandung dalam dokumen atau akuan itu, atau salinannya, kepada mana-mana orang; atau
- (b) membiarkan atau membenarkan mana-mana orang untuk mempunyai akses kepada apa-apa maklumat itu atau kepada apa-apa yang terkandung dalam dokumen atau akuan itu, atau salinannya,

melakukan suatu kesalahan dan boleh, apabila disabitkan, dipenjarakan selama tempoh tidak melebihi lima tahun atau didenda tidak melebihi satu ratus ribu ringgit atau kedua-duanya.

(3) Tiada seorang pun yang mempunyai apa-apa kewajipan rasmi atau yang dilantik atau yang diambil kerja di bawah Akta ini boleh dikehendaki—

- (a) untuk mengemukakan dalam apa-apa perkara atau prosiding dalam mana-mana mahkamah atau tribunal apa-apa maklumat, dokumen atau akuan; atau
- (b) untuk mendedahkan atau menyampaikan dalam perkara atau prosiding itu apa-apa perkara atau benda, yang dibawa kepada pengetahuannya dalam pelaksanaan kewajibannya di bawah Akta ini,

kecuali sebagaimana yang perlu bagi maksud melaksanakan peruntukan Akta ini, atau bagi memulakan suatu pendakwaan, atau dalam perjalanan suatu pendakwaan bagi mana-mana kesalahan yang dilakukan di bawah Akta ini.

(4) Ketua Pengarah boleh menghantar atau menyampaikan apa-apa maklumat atau dokumen yang disebut dalam subseksyen (2) sebagaimana yang difikirkannya suai manfaat atau perlu untuk membenarkan pendedahan maklumat tertentu kepada mana-mana orang.

### **Barang-barang yang boleh dikenakan penyitaan boleh dikenakan lucut hak**

**65.** (1) Semua barang-barang yang boleh dikenakan penyitaan di bawah Akta ini boleh dikenakan lucut hak.

(2) Bagi maksud seksyen ini dan seksyen 66, 67, 68 dan 69 perkataan “barang-barang” hendaklah disifatkan termasuk bekas dan pengangkut selain vesel yang melebihi dua ratus tan berat-tan bersih yang didaftarkan.

(3) Semua benda yang dilucut hak hendaklah diserahkan kepada pegawai yang hak dan hendaklah dilupuskan mengikut arahan Ketua Pengarah.

**Mahkamah hendaklah memerintahkan barang-barang yang disita dilupuskan**

**66.** (1) Sesuatu perintah bagi lucut hak atau pelepasan sesuatu benda yang boleh dikenakan lucut hak di bawah peruntukan Akta ini hendaklah dibuat oleh mahkamah yang di hadapannya sesuatu pendakwaan mengenainya telah diadakan.

(2) Suatu perintah bagi lucut hak barang-barang hendaklah dibuat jika dibuktikan dengan memuaskan hati mahkamah bahawa sesuatu kesalahan terhadap Akta ini atau terhadap mana-mana peraturan-peraturan yang dibuat di bawahnya telah dilakukan dan bahawa barang-barang itu adalah hal perkara, atau telah digunakan dalam melakukan, kesalahan itu walaupun tiada seorang pun telah disabitkan atas kesalahan itu.

(3) Amaun yang dijamin di bawah perenggan 55(1)(a) atau (b) atau amaun yang dihasilkan melalui jualan di bawah perenggan (1)(c) tersebut hendaklah dilucuthakkan oleh mahkamah jika dibuktikan hingga memuaskan hati mahkamah bahawa suatu kesalahan terhadap Akta ini atau mana-mana peraturan-peraturan yang dibuat di bawahnya telah dilakukan dan bahawa barang-barang yang berkenaan dengannya amaun itu telah dijamin atau dihasilkan melalui jualan, mengikut mana-mana yang berkenaan, adalah menjadi hal perkara, atau telah digunakan dalam melakukan, kesalahan itu walaupun tiada seorang pun mungkin telah disabitkan atas kesalahan itu.

**Barang-barang yang disita yang berkenaan dengannya tiada pendakwaan, atau hasil jualan, adalah terlucut hak jika tidak dituntut dalam masa satu bulan**

**67.** (1) Jika tidak ada pendakwaan berkenaan dengan apa-apa barang yang disita di bawah Akta ini, barang-barang itu atau hasil jualan

barang-barang itu yang dipegang menurut perenggan 55(1)(c) hendaklah diambil dan disifatkan terlucut hak apabila tamat tempoh tiga puluh hari dari tarikh notis barang-barang itu disita melainkan jika, sebelum tamat tempoh itu—

- (a) tuntutan terhadap barang-barang itu atau hasil jualan barang-barang itu dibuat di bawah subseksyen (2);
- (b) suatu permohonan bertulis dibuat bagi pemulangan barang-barang itu di bawah perenggan 55(1)(a) atau (b); atau
- (c) barang-barang itu dipulangkan di bawah perenggan (a) atau (b) yang tersebut.

(2) Mana-mana orang yang menuntut bahawa dialah pemunya barang-barang itu atau hasil jualan barang-barang itu, mengikut mana-mana yang berkenaan, dan bahawa barang-barang atau hasil jualan itu tidak boleh dikenakan perlucuthakan boleh memberikan notis bertulis kepada pegawai kanan eksais bahawa dia menuntut barang-barang atau hasil jualan itu.

(3) Jika terdapat suatu tuntutan atau suatu permohonan bertulis yang dibuat dalam tempoh tiga puluh hari yang disebut dalam subseksyen (1) dan tiada pendakwaan dibuat mengenai barang-barang itu, pegawai kanan eksais itu hendaklah, pada tamatnya tempoh tiga puluh hari, merujuk tuntutan atau permohonan itu kepada Ketua Pengarah.

(3A) Apabila dirujuk oleh pegawai kanan eksais di bawah subseksyen (3), Ketua Pengarah boleh mengarahkan pegawai kanan eksais itu—

- (a) untuk melepaskan barang-barang itu atau hasil jualan barang-barang itu atau sekuriti yang diberikan di bawah perenggan 55(1)(a) atau (b); atau
- (b) melalui pemakluman dalam borang yang ditetapkan, supaya merujuk perkara itu kepada Majistret Kelas Satu untuk keputusannya.

(4) Majistret Kelas Satu itu hendaklah mengeluarkan saman yang menghendaki orang yang menuntut bahawa dialah pemunya barang-barang itu atau hasil jualan barang-barang itu, dan orang yang daripadanya barang-barang itu disita, hadir di hadapannya, dan apabila mereka hadir atau ingkar hadir, selepas dibuktikan penyampaian sewajarnya saman itu, Majistret Kelas Satu itu hendaklah terus memeriksa perkara itu, dan apabila ada bukti bahawa suatu kesalahan terhadap Akta ini atau mana-mana peraturan-peraturan yang dibuat di bawahnya telah dilakukan dan bahawa barang-barang itu menjadi hal perkara, atau telah digunakan dalam melakukan, kesalahan itu, hendaklah memerintahkan supaya barang-barang itu atau hasil jualan barang-barang itu atau amaun yang dijamin di bawah perenggan 55(1)(a) atau (b), mengikut mana-mana yang berkenaan, dilucuthakkan, atau jika bukti sedemikian, boleh memerintahkan supaya dilepaskan barang-barang itu atau hasil jualan barang-barang itu atau apa-apa sekuriti yang diberikan di bawah perenggan 55(1)(a) atau (b), mengikut mana-mana yang berkenaan.

(5) Dalam apa-apa prosiding di bawah subseksyen 59(4), hendaklah terpakai bagi orang yang menuntut bahawa dialah pemunya barang-barang itu dan bagi orang yang daripadanya barang-barang itu disita seolah-olah pemunya atau orang itu menjadi pihak yang didakwa dalam sesuatu pendakwaan di bawah Akta ini.

**Barang-barang atau amaun terlucut hak boleh diserahkan atau dibayar balik kepada pemunya atau orang lain**

**68.** Menteri boleh, apabila permohonan dibuat kepadanya secara bertulis melalui Ketua Pengarah, memerintahkan supaya—

(a) apa-apa barang yang disita di bawah Akta ini; atau

(b) apa-apa amaun yang dijamin di bawah perenggan 55(1)(a) atau amaun yang dihasilkan melalui jualan di bawah perenggan (1)(c) yang tersebut itu,

sama ada yang terlucut hak atau yang diambil atau yang disifatkan terlucut hak menurut seksyen 66, 67 atau 69, diserahkan, atau dibayar

balik, mengikut mana-mana yang berkenaan, kepada pemunya atau orang lain yang berhak kepadanya apabila dibayar amaun dan atas terma-terma dan syarat-syarat yang difikirkannya patut:

Dengan syarat bahawa apa-apa permohonan sedemikian hendaklah dibuat sebelum tamat tempoh satu bulan dari tarikh barang-barang itu atau amaun itu terlucut hak atau diambil atau disifatkan terlucut hak, mengikut mana-mana yang berkenaan.

### **Pengkompaunan kesalahan**

**69.** (1) Menteri boleh, dengan kelulusan Pendakwa Raya, membuat peraturan-peraturan menetapkan—

- (a) apa-apa kesalahan di bawah Akta ini atau perundangan subsidiari di bawahnya sebagai suatu kesalahan yang boleh dikompaun;
- (b) kriteria untuk mengkompaun kesalahan itu; dan
- (c) cara dan tatacara untuk mengkompaun kesalahan itu.

(2) Mana-mana pegawai kanan eksais boleh, dengan keizinan bertulis Pendakwa Raya, mengkompaun apa-apa kesalahan yang dilakukan oleh mana-mana orang di bawah Akta ini dan ditetapkan sebagai suatu kesalahan yang boleh kompaun dengan membuat suatu tawaran bertulis kepada orang yang disyaki melakukan kesalahan itu untuk mengkompaun kesalahan itu dengan membayar kepada Ketua Pengarah suatu amaun wang yang tidak melebihi lima puluh peratus daripada amaun denda maksimum bagi kesalahan itu dalam tempoh yang dinyatakan dalam tawaran itu.

(3) Suatu tawaran di bawah subseksyen (2) boleh dibuat pada bila-bila masa selepas kesalahan itu dilakukan, tetapi sebelum apa-apa pendakwaan ke atasnya dimulakan, dan jika amaun yang dinyatakan dalam tawaran itu tidak dibayar dalam tempoh yang dinyatakan dalam tawaran itu atau dalam apa-apa tempoh yang dilanjutkan sebagaimana yang dibenarkan oleh Ketua Pengarah, pendakwaan bagi kesalahan itu

boleh dimulakan pada bila-bila masa selepas itu terhadap orang yang kepadanya tawaran itu dibuat.

(4) Jika suatu kesalahan telah dikompaun di bawah subseksyen (2), tiada pendakwaan boleh dimulakan selepas itu berkenaan dengan kesalahan itu terhadap orang yang kepadanya tawaran untuk mengkompaun itu dibuat.

(5) Apabila amaun wang itu dibayar dan jika apa-apa barang-barang telah disita dan barang-barang itu—

(a) ialah barang-barang berduti kilangan tempatan, barang-barang itu atau amaun yang dijamin di bawah perenggan 55(1)(a) atau (b) atau amaun yang dihasilkan melalui jualan di bawah perenggan 55(1)(c), mengikut mana-mana yang berkenaan, hendaklah dilucut hak dan tiada prosiding selanjutnya boleh diambil terhadap barang-barang itu;

(b) ialah barang-barang import berduti, barang-barang itu atau amaun yang dijamin di bawah perenggan 55(1)(a) atau (b) atau amaun yang dihasilkan melalui jualan di bawah perenggan 55(1)(c), mengikut mana-mana yang berkenaan, hendaklah dilucut hak melainkan jika duti eksais yang kena dibayar telah dibayar dalam masa tiga puluh hari dari tarikh pembayaran amaun wang itu.

(6) Walau apa pun perenggan (5)(a), Ketua Pengarah boleh atas permohonan orang itu melepaskan barang-barang itu atau memulangkan amaun yang dihasilkan melalui jualan, mengikut mana-mana yang berkenaan, apabila dibayar amaun wang itu dan atas terma dan syarat-syarat yang difikirkan patut oleh Ketua Pengarah.

### **Kos memegang barang-barang, dokumen atau benda yang disita**

**69A.** Jika apa-apa barang-barang, dokumen atau benda yang disita di bawah Akta ini dipegang dalam jagaan pegawai eksais sementara menunggu penyelesaian mana-mana prosiding berkenaan dengan suatu kesalahan di bawah Akta ini, kos memegang barang-barang,



dokumen atau benda itu dalam jagaan hendaklah, dalam keadaan mana-mana orang didapati bersalah melakukan suatu kesalahan, menjadi hutang kena dibayar kepada Kerajaan oleh orang itu dan hendaklah didapatkan balik dengan sewajarnya.

**Tiada apa-apa kos atau ganti rosak yang timbul daripada penyitaan boleh dituntut melainkan jika penyitaan tanpa sebab yang berpatutan**

70. Tiada seorang pun boleh, dalam sesuatu prosiding di hadapan sesuatu mahkamah berkenaan dengan penyitaan apa-apa barang-barang yang disita pada menjalankan atau pada berupa menjalankan sesuatu kuasa yang diberi di bawah Akta ini, berhak mendapat kos-kos prosiding itu atau apa-apa ganti rosak atau relif lain selain daripada sesuatu perintah untuk dipulangkan barang-barang itu atau dibayar nilai barang-barang itu melainkan jika penyitaan itu telah dilakukan tanpa sebab yang berpatutan.

## BAHAGIAN XII

### KESALAHAN DAN PENALTI

**Penalti bagi membuat pernyataan tidak betul dan bagi memalsukan dokumen**

71. Sesiapa jua yang—

- (a) membuat, secara lisan atau bertulis, atau menandatangani sesuatu pernyataan, perakuan atau dokumen lain yang dikehendaki oleh Akta ini, yang mana adalah tidak benar atau tidak betul mengenai apa-apa butir;
- (b) membuat, secara lisan atau bertulis, atau menandatangani sesuatu pernyataan atau dokumen yang dibuat untuk dipertimbangkan oleh mana-mana pegawai eksais mengenai sesuatu permohonan yang dikemukakan

kepadanya, yang mana adalah tidak benar atau tidak betul mengenai apa-apa butir;

- (c) melancarkan atau menyebabkan dilancarkan atau memalsukan atau menyebabkan dipalsukan apa-apa dokumen yang dikehendaki atau mungkin dikehendaki di bawah Akta ini atau digunakan dalam transaksi apa-apa urusan atau perkara yang berhubungan dengan eksais, atau menggunakan atau menyebabkan digunakan atau dalam apa-apa cara membantu dalam penggunaan dokumen yang dilancarkan atau dipalsukan itu;
- (d) secara fraud mengubah sesuatu dokumen atau melancarkan meteri, tandatangan, tandatangan ringkas atau tanda lain bagi, atau yang digunakan oleh, seseorang pegawai eksais untuk mengesahkan sesuatu dokumen itu atau untuk sekuriti bagi apa-apa barang-barang atau bagi apa-apa maksud lain pada menjalankan urusan berhubungan dengan eksais;
- (e) yang dikehendaki oleh Akta ini supaya membuat suatu akuan barang-barang berduti yang diimport, tidak membuat akuan itu sebagaimana yang dikehendaki; atau
- (f) tidak atau enggan mengemukakan kepada seorang pegawai yang hak apa-apa dokumen yang dikehendaki supaya dikemukakan di bawah subseksyen 41(3),

melakukan kesalahan dan boleh, apabila disabitkan, didenda tidak melebihi lima ratus ribu ringgit atau dipenjarakan selama tempoh tidak melebihi tujuh tahun atau kedua-duanya.

**Peruntukan khas berhubungan dengan pernyataan, dsb. yang tidak betul, di bawah seksyen 71**

**72.** (1) Apabila sesuatu pernyataan atau pengakuan itu, sama ada secara lisan atau bertulis, atau sesuatu perakuan atau lain-lain dokumen itu sebagaimana yang disebut dalam perenggan 71(a), (b), (c) dan (e)

telah dibuktikan sebagai tidak benar atau tidak betul atau dilancang atau dipalsukan pada kesemuanya atau pada sebahagiannya, maka tidaklah menjadi pembelaan mengatakan bahawa pernyataan atau pengakuan, perakuan atau dokumen lain itu telah dibuat atau digunakan dengan tidak sengaja atau tanpa niat jenayah atau fraud, atau bahawa orang yang menandatangani itu tidak sedar akan, atau tidak faham akan kandungan, dokumen itu; atau jika sesuatu pernyataan atau pengakuan telah dibuat atau direkodkan dalam Bahasa Kebangsaan atau dalam Bahasa Inggeris secara diterjemahkan daripada sesuatu bahasa lain bahawa pernyataan atau pengakuan itu telah salah diterjemahkan oleh atau tidak diterjemahkan dengan sepenuhnya oleh seseorang jurubahasa yang diadakan oleh orang yang membuat akuan itu.

(2) Bagi maksud seksyen 71 dan seksyen ini, “dipalsukan” berhubung dengan sesuatu dokumen hendaklah disifatkan sebagai meliputi sesuatu dokumen yang tidak benar atau tidak betul dalam apa-apa butir matan, dan “memalsukan” mempunyai erti yang serupa.

### **Penalti bagi enggan menjawab soalan atau bagi memberi maklumat palsu**

**73.** (1) Sesiapa jua, yang dikehendaki oleh Akta ini memberi apa-apa maklumat yang mungkin munasabah dikehendaki daripadanya oleh pegawai yang hak dan yang adalah dalam kuasanya untuk memberi, atau mengemukakan kepada pegawai itu dokumen-dokumen yang adalah dalam kuasanya untuk mengemukakan, enggan memberi maklumat itu atau memberi sebagai benar maklumat yang ia ketahui atau ada sebab mempercayai sebagai palsu, atau enggan mengemukakan dokumen itu boleh, apabila disabitkan, dipenjarakan selama tempoh tidak melebihi lima tahun atau didenda tidak melebihi satu ratus ribu ringgit atau kedua-duanya.

(2) Apabila sesuatu maklumat itu dibuktikan sebagai tidak benar atau tidak betul pada kesemuanya atau pada sebahagiannya, maka tidaklah menjadi pembelaan mengatakan bahawa maklumat itu atau mana-mana bahagian daripadanya telah diberi dengan tidak sengaja atau tanpa niat jenayah atau fraud, atau telah salah diterjemahkan atau

tidak diterjemahkan dengan sepenuhnya oleh seseorang jurubahasa yang diadakan oleh pemberi maklumat itu.

**Penalti bagi perbuatan melarikan duti eksais dan bagi mengilang secara menyalahi undang-undang barang-barang berduti**

74. (1) Sesiapa jua yang—

- (a) secara berlawanan dengan peruntukan Akta ini menerima masuk ke dalam atau ada dalam milik, jagaan atau kawalannya apa-apa barang-barang yang atasnya duti eksais yang boleh dilevi di sisi undang-undang tidak dibuktikan sebagai telah dibayar atau yang telah disuling, ditapai ataupun dikilang atau diimport dengan menyalahi undang-undang;
- (b) membantu ataupun mengambil bahagian dalam memindahkan atau mengeluarkan dengan menyalahi undang-undang apa-apa barang-barang berduti daripada sesuatu tempat suling, bruari atau tempat pengilangan lain barang-barang berduti atau daripada mana-mana gudang berlesen atau kawalan eksais atau tempat keselamatan dalam mana barang-barang berduti mungkin telah diletakkan;
- (c) dengan diketahuinya melindungi, menyimpan, menyembunyi atau memiliki, atau membenar, membiar, menyebabkan atau mendapatkan supaya dilindungi, disimpan atau disembunyikan apa-apa barang-barang berduti yang telah dipindahkan dengan menyalahi undang-undang;
- (d) dengan diketahuinya mengambil bahagian dengan apa-apa cara dalam mengangkut, memindah, meletak atau menguruskan apa-apa barang-barang berduti dengan niat hendak memfraud Kerajaan daripada mendapat apa-apa duti atasnya, atau hendak mengecewakan mana-mana daripada peruntukan Akta ini;

- (e) dengan diketahuinya mengambil bahagian dengan apa-apa cara dalam melarikan atau cuba melarikan apa-apa duti eksais secara fraud;
- (f) dengan diketahuinya mengambil bahagian dengan apa-apa cara dalam menyuling, menapai ataupun mengilang apa-apa barang-barang berduti, atau mengilang apa-apa tembakau, bersalahan dengan peruntukan seksyen 20;
- (g) kecuali dengan kuasa yang sah, membuka, memecah, mengubah atau dengan apa-apa cara mengganggu apa-apa mangga, meteri, tanda atau ikatan lain yang dipasang oleh seseorang pegawai yang hak;
- (h) tanpa sebab yang berpatutan mengganggu dengan apa-apa cara sesuatu vesel, kapal udara, kereta, alat atau benda lain yang digunakan untuk apa-apa maksud berkenaan dengan eksais;
- (i) yang terlibat dalam mengimport apa-apa barang menyalahi eksais sama ada barang menyalahi eksais itu dikapalkan, diturunkan dari kapal, dihantar serah atau tidak;
- (j) mengkapalkan, menurunkan dari kapal, menghantar serah atau membantu atau terlibat dalam mengkapalkan, menurunkan dari kapal atau menghantarserahkan apa-apa barang menyalahi eksais; atau
- (k) selaku seorang penumpang atau orang lain didapati mempunyai dalam bagasinya atau pada dirinya atau selainnya dalam miliknya, selepas menafikan bahawa dia mempunyai apa-apa barang berduti dalam bagasinya atau pada dirinya atau selainnya dalam miliknya, apa-apa barang berduti,

melakukan suatu kesalahan dan apabila disabitkan boleh dikenakan—

(i) dalam hal barang-barang yang dikilangkan secara tempatan selain rokok yang mengandungi tembakau dan liquor yang memabukkan—

(A) bagi kesalahan pertama, denda tidak kurang daripada sepuluh kali amaun duti eksais atau lima puluh ribu ringgit, mengikut mana-mana amaun yang lebih besar, dan tidak lebih daripada dua puluh kali amaun duti eksais atau lima ratus ribu ringgit, mengikut mana-mana amaun yang lebih besar, atau pemenjaraan selama tempoh tidak melebihi lima tahun atau kedua-duanya; dan

(B) bagi kesalahan kedua atau mana-mana kesalahan yang berikutnya, denda tidak kurang daripada dua puluh kali amaun duti eksais atau satu ratus ribu ringgit, mengikut mana-mana amaun yang lebih besar, dan tidak lebih daripada empat puluh kali amaun duti eksais atau satu juta ringgit, mengikut mana-mana amaun yang lebih besar, atau pemenjaraan selama tempoh tidak melebihi tujuh tahun atau kedua-duanya:

Dengan syarat bahawa apabila tiada duti eksais terlibat atau amaun duti eksais tidak dapat ditentukan, penalti itu boleh merupakan denda tidak melebihi lima ratus ribu ringgit atau pemenjaraan selama tempoh tidak melebihi lima tahun atau kedua-duanya;

(ii) dalam hal barang-barang yang diimport selain rokok yang mengandungi tembakau dan liquor yang memabukkan—

(A) bagi kesalahan pertama, denda tidak kurang daripada sepuluh kali amaun duti eksais atau lima puluh ribu ringgit, mengikut mana-mana amaun yang lebih besar, dan tidak lebih daripada dua puluh kali amaun duti eksais atau lima ratus ribu ringgit, mengikut mana-mana amaun yang lebih besar, atau

pemenjaraan selama tempoh tidak melebihi lima tahun, atau kedua-duanya; dan

- (B) bagi kesalahan kedua atau mana-mana kesalahan yang berikutnya, denda tidak kurang daripada dua puluh kali amaun duti eksais atau satu ratus ribu ringgit, mengikut mana-mana amaun yang lebih besar, dan tidak lebih daripada empat puluh kali amaun duti eksais atau satu juta ringgit, mengikut mana-mana amaun yang lebih besar, atau pemenjaraan selama tempoh tidak melebihi tujuh tahun, atau kedua-duanya:

Dengan syarat bahawa jika amaun duti eksais itu tidak dapat ditentukan, penalti itu boleh merupakan denda tidak melebihi lima ratus ribu ringgit atau pemenjaraan selama tempoh tidak melebihi lima tahun atau kedua-duanya;

- (iii) dalam hal rokok yang mengandungi tembakau atau liquor yang memabukkan yang dikilangkan secara tempatan—

- (A) bagi kesalahan pertama, denda tidak kurang daripada sepuluh kali amaun duti eksais atau satu ratus ribu ringgit, mengikut mana-mana amaun yang lebih besar, dan tidak lebih daripada dua puluh kali amaun duti eksais atau lima ratus ribu ringgit, mengikut mana-mana amaun yang lebih besar, atau pemenjaraan selama tempoh tidak kurang daripada enam bulan dan tidak melebihi lima tahun atau kedua-duanya; dan
- (B) bagi kesalahan kedua atau mana-mana kesalahan yang berikutnya, denda tidak kurang daripada dua puluh kali amaun duti eksais atau dua ratus ribu ringgit, mengikut mana-mana amaun yang lebih besar, dan tidak lebih daripada empat puluh kali amaun duti eksais atau satu juta ringgit, mengikut mana-mana amaun yang lebih besar, atau

pemenjaraan selama tempoh tidak kurang daripada enam bulan dan tidak melebihi tujuh tahun atau kedua-duanya; dan

(iv) dalam hal rokok yang mengandungi tembakau atau liquor yang memabukkan yang diimport—

(A) bagi kesalahan pertama, denda tidak kurang daripada sepuluh kali amaun duti eksais atau satu ratus ribu ringgit, mengikut mana-mana amaun yang lebih besar, dan tidak lebih daripada dua puluh kali amaun duti eksais atau lima ratus ribu ringgit, mengikut mana-mana amaun yang lebih besar, atau pemenjaraan selama tempoh tidak kurang daripada enam bulan dan tidak melebihi lima tahun atau kedua-duanya; dan

(B) bagi kesalahan kedua atau mana-mana kesalahan yang berikutnya, denda tidak kurang daripada dua puluh kali amaun duti eksais atau dua ratus ribu ringgit, mengikut mana-mana amaun yang lebih besar, dan tidak lebih daripada empat puluh kali amaun duti eksais atau satu juta ringgit, mengikut mana-mana amaun yang lebih besar, atau pemenjaraan selama tempoh tidak kurang daripada enam bulan dan tidak melebihi tujuh tahun atau kedua-duanya.

(2) Dalam sesuatu pendakwaan di bawah seksyen ini, apa-apa barang-barang berduti hendaklah disifatkan sebagai barang-barang berduti dengan diketahui oleh pihak yang didakwa melainkan jika dibuktikan sebaliknya oleh pihak yang didakwa itu.

### **Penalti bagi kesalahan yang berhubungan dengan data yang disimpan dalam komputer**

**74A.** (1) Mana-mana orang yang, tanpa kuasa yang diberikan oleh Ketua Pengarah—



- (a) memusnahkan, merosakkan, memadamkan, mengubah atau memanipulasi data yang disimpan dalam, atau digunakan berkaitan dengan, suatu komputer;
- (b) memasukkan ke dalam, atau merekod atau menyimpan di dalam, suatu komputer dengan apa-apa cara data bagi maksud—
  - (i) memusnahkan, merosakkan, memadamkan, mengubah atau memanipulasi data lain yang disimpan dalam komputer itu; atau
  - (ii) mengusik, mengganggu atau menghalang penggunaan sah komputer itu, atau data yang disimpan di dalam komputer itu; atau
- (c) dengan cara lain menggunakan komputer,

yang maksud atau kesannya adalah untuk mengurangkan, mengelak atau lari daripada apa-apa tanggungan terhadap duti eksais, yang dikenakan atau yang sepatutnya dikenakan oleh Akta ini, atau untuk menggagalkan mana-mana peruntukan Akta ini melakukan suatu kesalahan dan boleh, apabila disabitkan, dikenakan denda tidak melebihi satu ratus ribu ringgit atau dipenjarakan selama tempoh tidak melebihi lima tahun atau kedua-duanya.

(2) Dalam seksyen ini, “data” termasuklah apa-apa program komputer atau sebahagian daripada suatu program komputer.

### **Penalti bagi kesalahan yang berhubungan dengan tuntutan pulangan cukai**

**74B.** Mana-mana orang yang memperoleh, atau melakukan apa-apa yang membolehkan mana-mana orang lain memperoleh, apa-apa amaun melalui pulangan cukai apa-apa duti eksais berkenaan dengan apa-apa barang-barang yang tidak dibayar atau dibenarkan secara sah mengenainya, atau yang lebih tinggi daripada amaun yang dibayar atau

dibenarkan melakukan suatu kesalahan dan boleh, apabila disabitkan, didenda tidak melebihi tiga kali ganda amaun duti itu atau lima ratus ribu ringgit, mengikut mana-mana amaun yang lebih besar, atau dipenjarakan selama tempoh tidak melebihi tujuh tahun atau kedua-duanya.

### **Penalti bagi kesalahan yang berhubungan dengan tuntutan pemulangan balik**

**74c.** Mana-mana orang yang memperoleh, atau melakukan apa-apa yang membolehkan mana-mana orang lain memperoleh, pemulangan balik apa-apa wang di bawah perenggan 11(2)(b) atau seksyen 13, bagi apa-apa amaun melebihi amaun yang sepatutnya dipulangkan balik, melakukan suatu kesalahan dan boleh, apabila disabitkan, didenda tidak melebihi tiga kali ganda amaun melebihi amaun yang sepatutnya dipulangkan balik itu atau lima ratus ribu ringgit, mengikut mana-mana amaun yang lebih besar, atau dipenjarakan selama tempoh tidak melebihi tujuh tahun atau kedua-duanya.

### **Penalti bagi memiliki alat suling, dsb.**

**75.** Tiap-tiap orang, lain daripada seseorang yang dilesen atau dikecualikan daripada dilesen di bawah subseksyen 20(1), yang dengan diketahuinya menyimpan atau ada dalam miliknya sesuatu alat suling, perkakas atau alat lain untuk menyuling, menapai ataupun mengilang barang-barang berduti atau apa-apa jentera untuk mengilang tembakau, boleh, apabila disabitkan, dipenjarakan selama tempoh tidak melebihi tiga tahun, atau didenda tidak kurang daripada lima ribu ringgit tetapi tidak melebihi dua puluh ribu ringgit, atau penjara dan denda itu kedua-duanya.

### **Penalti bagi menjual liquor tanpa lesen**

**76.** Seseorang yang menjual liquor yang memabukkan dengan apa-apa cara melainkan dengan mengikut sesuatu lesen yang dikeluarkan di bawah subseksyen 35(1) boleh, apabila disabitkan, didenda tidak melebihi lima puluh ribu ringgit.

**Penalti bagi menyerang atau menghalang pegawai eksais dan merebut kembali barang**

77. Tiap-tiap orang yang—

- (a) menyerang, menghalang, menggalang, mengugut atau mencabul seseorang pegawai eksais, atau pekhidmat awam lain, atau seseorang yang bertindak bagi membantunya, atau yang diguna khidmat dengan sewajarnya untuk mencegah kesalahan di bawah Akta ini, bagi melaksanakan kewajipannya atau bagi menyita dengan sewajarnya apa-apa barang yang boleh dikenakan penyitaan di bawah Akta ini;
- (b) merebut kembali atau berusaha merebut kembali atau menyebabkan supaya direbutkan kembali, apa-apa jua yang telah disita dengan sewajarnya atau mana-mana orang yang telah ditahan; atau
- (c) sebelum atau selepas sesuatu penyitaan, menebuk, memecah atau pun memusnahkan mana-mana vesel, bekas, pemuat atau bungkusan, atau kandungannya, untuk mencegah ia daripada disita atau diperoleh,

adalah bersalah atas suatu kesalahan dan boleh—

- (i) apabila disabitkan kali pertama, dipenjarakan selama tempoh tidak melebihi lima tahun atau denda tidak melebihi lima ratus ribu ringgit atau kedua-duanya; dan
- (ii) apabila disabitkan kali kedua atau kali kemudiannya, dipenjarakan selama tempoh tidak melebihi tujuh tahun atau denda tidak melebihi satu juta ringgit atau kedua-duanya.

**Penalti bagi menerima atau menawarkan rasuah dan bagi menyalahgunakan kuasa**

**78.** (1) Jika mana-mana pegawai eksais atau orang lain yang diguna khidmat dengan sewajarnya untuk mencegah kesalahan di bawah Akta ini—

- (a) melakukan sesuatu penyitaan dengan berpakat sulit atau menyerahkan balik apa-apa barang, atau membuat sesuatu perjanjian untuk menyerahkan balik atau supaya jangan menyita pengangkut atau apa-apa barang yang boleh dikenakan penyitaan;
- (b) menerima, bersetuju menerima, atau cuba memperoleh apa-apa rasuah, ganjaran, balasan atau hadiah kerana mencuaikan atau tidak melaksanakan kewajipannya;
- (c) berkomplot dengan atau membiarkan mana-mana orang melakukan sesuatu perbuatan atau perkara dengan mana hasil eksais adalah atau mungkin difraudkan, atau yang mana adalah berlawanan dengan Akta ini atau dengan pelaksanaan yang sewajarnya akan kewajipannya; atau
- (d)
  - (i) dengan diketahuinya menuntut daripada mana-mana orang suatu amaun lebih daripada duti yang dibenarkan;
  - (ii) menahan untuk kegunaannya sendiri atau untuk apa-apa kegunaan lain sesuatu bahagian daripada amaun duti yang telah dipungut;
  - (iii) mengemukakan suatu penyata palsu, sama ada secara lisan atau bertulis, mengenai amaun duti yang telah dipungut atau diterima olehnya;
  - (iv) memfraud mana-mana orang, menggelapkan apa-apa wang, atau pun menggunakan kedudukannya untuk menguruskan eksais secara salah; atau
  - (v) dengan tidak diberi kuasa di bawah Akta ini memungut atau cuba memungut duti,

tiap-tiap pegawai yang melakukan kesalahan sedemikian adalah bersalah atas suatu kesalahan terhadap Akta ini dan boleh, apabila disabitkan, dipenjarakan selama tempoh tidak melebihi lima tahun atau denda tidak melebihi lima ratus ribu ringgit atau penjara dan denda itu kedua-duanya.

(2) Mana-mana pegawai eksais yang didapati semasa bertugas ada dalam miliknya apa-apa wang bersalahan dengan apa-apa peraturan-peraturan jabatan yang dikeluarkan secara bertulis hendaklah dianggap, sehingga dibuktikan sebaliknya, sebagai telah menerima wang itu bersalahan dengan subseksyen (1).

(3) Jika seseorang pegawai eksais mempunyai syak yang munasabah bahawa seseorang pegawai eksais lain yang lebih rendah pangkatnya daripadanya mempunyai dalam miliknya apa-apa wang yang diterima dengan melanggar perenggan (1)(b) dia boleh memeriksa pegawai lain itu.

### **Kesalahan yang penalti tidak ada diperuntukkan baginya**

**79.** Tiap-tiap ketinggalan atau kecuaiian daripada mematuhi dan tiap-tiap perbuatan yang dilakukan atau cuba dilakukan berlawanan dengan Akta ini atau mana-mana peraturan-peraturan yang dibuat di bawahnya, atau apa-apa pelanggaran syarat dan sekatan yang tertakluk kepadanya, atau yang atasnya, sesuatu lesen atau permit adalah dikeluarkan atau apa-apa pengecualian diberikan di bawah Akta ini, adalah suatu kesalahan terhadap Akta ini dan berkenaan dengan sesuatu kesalahan itu yang tidak ada apa-apa penalti diperuntukkan baginya dengan nyata, pesalah itu boleh, apabila disabitkan, dikenakan denda tidak lebih daripada lima puluh ribu ringgit atau pemenjaraan selama suatu tempoh tidak lebih daripada lima tahun atau kedua-duanya.

### **Cubaan dan persubahatan**

**80.** Sesiapa jua yang cuba melakukan sesuatu kesalahan yang boleh dihukum di bawah Akta ini, atau yang bersubahat melakukan sesuatu

kesalahan itu, hendaklah dihukum dengan hukuman yang diperuntukkan bagi kesalahan itu.

### **Dihukum penjara kerana tidak membayar denda**

**81.** Walau apa pun peruntukan Kanun Tatacara Jenayah [*Akta 593*], tempoh penjara yang dikenakan oleh sesuatu mahkamah kerana tidak membayar sesuatu denda di bawah Akta ini atau di bawah mana-mana peraturan-peraturan yang dibuat di bawahnya atau kerana tidak ada sesuatu tahanan-harta yang mencukupi bagi menjelaskan sesuatu denda itu, ialah sesuatu tempoh yang pada pendapat mahkamah adil bagi kes itu, tetapi bagaimanapun tidak boleh lebih daripada maksimum yang ditetapkan mengikut skala yang berikut:

<b>Jika denda itu—</b>	<b>tempoh itu boleh dilanjutkan sehingga</b>
tidak melebihi lima ribu ringgit	dua bulan
melebihi lima ribu ringgit tetapi tidak melebihi sepuluh ribu ringgit	empat bulan
melebihi sepuluh ribu ringgit tetapi tidak melebihi dua puluh ribu ringgit	enam bulan

dengan tambahan dua bulan bagi tiap-tiap sepuluh ribu ringgit selepas dua puluh ribu ringgit yang pertama bagi denda itu sehingga sampai suatu tempoh maksimum selama enam tahun:

Dengan syarat sentiasa bahawa—

- (a) jika sebelum tamat tempoh penjara itu sesuatu kadar denda itu dibayar atau dilevi tidak kurang daripada kadar bahagian tempoh yang belum tamat itu, maka penjara itu hendaklah tamat;
- (b) jika seseorang dihukum denda dan penjara kedua-duanya, dan denda yang tidak dibayar itu ditukar kepada penjara, maka penjara itu hendaklah menjadi tambahan kepada penjara yang diperintahkan oleh hukuman yang asal itu.

### **Tanggungjawab bersama dan berasingan pengarah, dsb.**

**81A.** (1) Jika apa-apa duti eksais kena dibayar oleh—

- (a) syarikat;
- (b) firma; atau
- (c) pertubuhan, persatuan atau kumpulan orang yang lain,

maka, walau apa pun apa-apa jua yang berlawanan dalam Akta ini atau dalam mana-mana undang-undang bertulis yang lain, pengarah syarikat itu atau pekongsi firma itu atau anggota pertubuhan, persatuan atau kumpulan orang yang lain itu, mengikut mana-mana yang berkenaan, hendaklah, bersama dengan syarikat, firma, pertubuhan, persatuan atau kumpulan orang yang lain itu bertanggungjawab bersama dan berasingan bagi duti eksais yang kena dibayar.

(2) Berkenaan dengan sesuatu syarikat yang sedang digulungan, pengarah syarikat itu hanya bertanggungjawab sedemikian jika aset syarikat itu tidak mencukupi untuk menjelaskan amaun yang kena dibayar, selepas membayar apa-apa jumlah wang yang mempunyai keutamaan di bawah Akta Syarikat 1965 berhubung dengan penggunaan aset syarikat itu dalam penggulungan itu.

**Kesalahan oleh kumpulan orang dan oleh pekhidmat dan ejen**

**82.** (1) Jika sesuatu kesalahan terhadap Akta ini atau terhadap mana-mana peraturan-peraturan yang dibuat di bawahnya telah dilakukan oleh sesuatu syarikat, sesuatu firma, sesuatu pertubuhan, sesuatu persatuan atau kumpulan orang yang lain, mana-mana orang yang pada masa kesalahan itu dilakukan adalah seorang pengarah, pengurus, setiausaha atau pegawai lain yang seumpamanya atau seseorang pekongsi syarikat, firma, pertubuhan, persatuan atau kumpulan orang yang lain itu atau telah berupa sebagai bertindak atas sifat itu hendaklah disifatkan sebagai bersalah atas kesalahan itu melainkan jika ia membuktikan bahawa kesalahan itu telah dilakukan tanpa dipersetujui atau dibiarkannya dan bahawa ia telah menjalankan segala usaha bagi mencegah kesalahan itu daripada dilakukan sebagaimana yang patut dijalankan olehnya, memandang kepada jenis tugasnya atas sifat itu dan kepada semua hal keadaan itu.

(2) Jika mana-mana orang patut dikenakan di bawah Akta ini, atau di bawah mana-mana peraturan-peraturan yang dibuat di bawahnya, sesuatu hukuman, penalti atau lucut hak bagi sesuatu perbuatan, ketinggalan, kecuaiian atau kemungkiran, ia boleh dikenakan hukuman, penalti atau lucut hak yang sama bagi tiap-tiap perbuatan, ketinggalan, kecuaiian atau kemungkiran seseorang kerani, penjawat atau ejen, atau kerani atau penjawat ejen itu, dengan syarat bahawa perbuatan, ketinggalan, kecuaiian atau kemungkiran itu telah dilakukan oleh kerani atau penjawat itu pada masa menjalankan pekerjaannya, atau oleh ejen itu apabila bertindak bagi pihak orang itu, atau oleh kerani atau penjawat ejen itu apabila bertindak pada masa menjalankan pekerjaannya dalam hal keadaan yang jika sekiranya perbuatan, ketinggalan, kecuaiian atau kemungkiran itu dilakukan oleh ejen itu prinsipalnya akan tetap bertanggung di bawah seksyen ini.

**Duti eksais, dsb., hendaklah kena dibayar walau apa pun apa-apa prosiding, dsb.**

**82A.** Pemulaan prosiding atau pengenaan suatu penalti, denda atau tempoh pemenjaraan di bawah Akta ini, atau pengkompaunan suatu kesalahan di bawah seksyen 69, tidak melepaskan mana-mana orang



daripada tanggungan untuk membayar duti eksais, surcaj, penalti, fi atau wang lain di bawah Akta ini.

### **Hadiah**

**83.** Ketua Pengarah boleh memerintahkan apa-apa hadiah yang difikirkannya patut dibayar kepada seseorang pegawai eksais atau orang lain bagi perkhidmatan yang diberi berhubung dengan mendapatkan diketahui perbuatan melarikan duti eksais atau perkara lain mengecewakan Akta ini dan boleh berkenaannya dengan sesuatu penyitaan yang dibuat di bawah Akta ini memerintahkan dibayar apa-apa hadiah yang difikirkannya patut kepada orang yang melakukan penyitaan itu atau yang dengan bantuannya penyitaan itu telah dilakukan.

### **Tindakan pegawai awam tidak menjadi kesalahan**

**84.** Tiada apa-apa jua yang dilakukan oleh seseorang pegawai awam pada masa menjalankan kewajibannya boleh disifatkan sebagai suatu kesalahan di bawah Akta ini.

## **BAHAGIAN XIII**

### **PERATURAN-PERATURAN**

#### **Kuasa untuk membuat peraturan-peraturan**

**85.** (1) Menteri boleh membuat peraturan-peraturan bagi menguatkuasakan Akta ini.

(2) Khususnya, dan tanpa menyentuh keluasan kuasa yang tersebut di atas, peraturan-peraturan itu boleh—

(a) mengatur kuasa dan kewajipan yang hendaklah dijalankan dan dilaksanakan oleh pegawai eksais;

- (b) mengatur perjalanan semua perkara berhubung dengan pemungutan duti eksais;
- (ba) mengawal selia pengendalian semua perkara yang berhubungan dengan ketetapan kastam;
- (bb) menetapkan dan mengenakan fi yang berhubungan dengan ketetapan kastam dan memperuntukkan cara pungutan dan bayaran fi itu;
- (bc) menetapkan borang yang hendaklah digunakan bagi maksud ketetapan kastam;
- (bd) menentukan nilai bagi maksud pungutan duti eksais;
- (c) mengatur perjalanan urusan Lembaga Pelesenan, pengeluaran dan pindah milik lesen di bawah kuasa Lembaga itu dan bayaran bagi lesen atau bagi pindah milik lesen itu;
- (d) mengatur pengurusan premis berlesen oleh Lembaga Pelesenan;
- (e) menetapkan borang yang hendak digunakan di bawah dan bagi maksud yang berhubung dengan Akta ini;
- (f) menetapkan hari dan waktu dalam masa mana sesuatu pejabat eksais, gudang eksais awam atau gudang berlesen boleh dibuka untuk urusan;
- (g) mengatur peletakan, jagaan dan penarikan balik barang dalam dan daripada gudang eksais awam dan gudang berlesen, dan pengurusan dan pengawalan barang itu;
- (h) *(Dipotong oleh Akta A1594)*;
- (i) mengatur pembinaan, pemeriksaan, penyeliaan, pengurusan dan pengawalan premis berlesen di bawah seksyen 20 dan pasangan, alat, jentera dan perkakas yang

disenggara dalamnya, termasuk meteri dan timbang, lampu, tangga, dan alat kelengkapan lain yang perlu bagi membolehkan seseorang pegawai yang hak mengira atau menyemak dengan menimbang, mengukur atau menyukat, semua barang-barang atau bahan berduti dalam premis itu;

- (j) mengatur waktu dalam masa mana pengilangan boleh atau tidak boleh dilakukan dan dalam masa mana barang-barang boleh dipindahkan daripada premis berlesen di bawah Akta ini;
- (k) menetapkan tempat kediaman yang hendak diadakan dengan percuma oleh pengilang berlesen di bawah seksyen 20 bagi mana-mana pegawai eksais sebagaimana yang difikirkan perlu oleh Ketua Pengarah bagi pengawalan premis berlesen itu;
- (l) mengatur pencampuran, pensebatian, pengubahan dan pembotolan liquor yang memabukkan, dan menetapkan bayaran yang hendak dibayar bagi pembotolan liquor yang memabukkan yang berduti dan boleh mengadakan peruntukan bagi mengawal peredaran liquor yang memabukkan ke dan dari sesuatu tempat suling atau sesuatu tempat pengilangan yang ditentukan dalam sesuatu lesen yang dikeluarkan di bawah seksyen 20;
- (m) menetapkan buku yang hendak disimpan oleh pengilang berlesen dan pemegang lesen;
- (n) mengatur pengeluaran dan pindah milik lesen;
- (o) menetapkan kadar dan cara memungut bayaran kerja lebih masa yang hendak dibayar apabila pegawai yang hak dikehendaki bekerja di luar waktu yang berpatutan yang ditetapkan dan syarat-syarat di bawah mana kerja lebih masa itu boleh dibenarkan;
- (p) menetapkan kesalahan-kesalahan yang boleh dikompaun, kriteria bagi pengkompaunan kesalahan-kesalahan yang

boleh dikompaun dan cara bagaimana kesalahan itu boleh dikompaun dan menetapkan pegawai yang boleh mengkompaunkannya;

- (q) menetapkan penalti bagi sesuatu pelanggaran atau kemungkiran mematuhi mana-mana daripada peraturan-peraturan yang dibuat di bawah seksyen ini atau sekatan atau syarat sesuatu lesen atau kebenaran yang diberi di bawah peraturan-peraturan itu:

Dengan syarat bahawa tiada sesuatu penalti itu boleh lebih daripada penalti yang ditetapkan di bawah seksyen 79;

- (r) mengatur pengeluaran, penyimpanan, penggunaan dan penggudangan keluaran petroleum di premis termasuk kilang penapis dan pemindahan barang itu ke atau dari premis itu;
- (ra) mengawal selia segala perkara yang berhubungan dengan barang-barang yang tertakluk kepada duti eksais semasa pengimportan; dan
- (s) menetapkan apa-apa jua yang hendaklah atau boleh ditetapkan di bawah Akta ini.

### **Kuasa untuk mewakilkan**

**86.** Menteri boleh, melalui pemberitahuan dalam *Warta* dan tertakluk kepada syarat dan sekatan yang ditetapkan dalam pemberitahuan itu, mewakilkan penjalanan kuasa atau pelaksanaan kewajipan yang diberi atau ditanggungkan ke atasnya oleh Akta ini kepada mana-mana orang yang diperihalkan dengan nama atau jawatan:

Dengan syarat bahawa perwakilan itu tidak boleh menyentuh penjalanan mana-mana kuasa itu atau pelaksanaan mana-mana kewajipan itu oleh Menteri.

## BAHAGIAN XIV

PERUNTUKAN KHAS BERKENAAN  
DENGAN LABUAN**Tafsiran**

**87.** Dalam Bahagian ini, melainkan jika kandungan ayatnya menghendaki makna yang lain—

“kawasan utama kastam” ertinya Malaysia tidak termasuk Labuan, Langkawi, Tioman dan Pangkor;

“Labuan” ertinya Pulau Labuan dan pulau-pulau naungannya iaitu Rusukan Besar, Rusukan Kechil, Keraman, Burong, Papan dan Daat.

**Barang-barang kena duti di Labuan**

**88.** Peruntukan-peruntukan Akta ini tidaklah terpakai bagi barang-barang yang dikilang di atau diimport masuk ke Labuan, selain barang-barang yang boleh diisytiharkan oleh Menteri dari semasa ke semasa melalui perintah yang disiarkan dalam *Warta*.

**Barang-barang dikilang di Labuan hendaklah disifatkan sebagai barang-barang dikilang di luar Malaysia**

**89.** Barang-barang yang tertakluk kepada duti eksais, lain daripada barang-barang yang tersebut dalam seksyen 88, apabila dikilang di Labuan hendaklah disifatkan sebagai dikilang di luar Malaysia dan apabila dipindahkan dari Labuan ke wilayah lain dalam Malaysia hendaklah disifatkan sebagai diimport ke wilayah itu dan peruntukan Akta Kastam 1967 hendaklah terpakai.

**Barang-barang dikilang di Wilayah Persekutuan lain hendaklah disifatkan sebagai dieksport apabila dipindahkan ke Labuan**

**90.** Barang-barang yang tertakluk kepada duti eksais, lain daripada barang-barang yang tersebut dalam seksyen 88, apabila dikilang di lain-lain Wilayah Persekutuan dan apabila dipindahkan ke Labuan hendaklah disifatkan sebagai diekspor dari wilayah itu ke suatu tempat di luar Malaysia bagi maksud seksyen 19 dan perenggan 28(d).

**Duti eksais ke atas barang-barang yang diimport masuk ke Labuan atau diangkut ke atau dari Labuan atau ke kawasan utama kastam**

**90A.** (1) Walau apa pun apa-apa jua yang berlawanan yang terkandung dalam Akta ini—

- (a) tiada duti eksais kena dibayar ke atas apa-apa barang yang diimport masuk ke Labuan, selain barang-barang yang diisytiharkan oleh Menteri dari semasa ke semasa melalui perintah yang disiarkan dalam *Warta*;
- (b) duti eksais hendaklah kena dibayar ke atas semua barang berduti yang diangkut ke kawasan utama kastam dari Labuan bagi segala maksud seolah-olah pengangkutan ke kawasan utama kastam itu ialah pengimportan ke dalam Malaysia;
- (c) Menteri boleh, melalui perintah, menetapkan erti perkataan “nilai” berhubung dengan barang-barang yang diangkut dari Labuan ke kawasan utama kastam.

(2) Subseksyen 6(2), (3), (4), dan (5) hendaklah terpakai bagi apa-apa perintah yang dibuat oleh Menteri di bawah perenggan (1)(a).

(3) Tiada apa-apa jua dalam seksyen ini boleh menjadikan tidak terpakai bagi Labuan apa-apa duti eksais lain yang boleh ditetapkan oleh Menteri di bawah subseksyen 6(1).

**Pengangkutan barang-barang ke atau dari Labuan dari atau ke kawasan utama kastam**

**90B.** Jika barang-barang diangkut—

(a) dari Labuan ke kawasan utama kastam; atau

(b) dari kawasan utama kastam ke Labuan,

peruntukan Akta ini hendaklah, dengan apa-apa ubah suaian dan penyesuaian sebagaimana yang perlu, terpakai seolah-olah barang-barang itu telah diimport masuk ke dalam atau, mengikut mana-mana yang berkenaan, dieksport dari, kawasan utama kastam dari atau ke suatu tempat di luar Malaysia, dan tanpa menjejaskan keluasan makna di atas, peruntukan Bahagian X hendaklah terpakai bagi barang-barang yang diangkut ke atau dari Labuan dari atau ke kawasan utama kastam dan bagi orang dan kenderaan, vesel dan kapal udara yang mengangkut barang-barang itu.

**Akuan tentang barang-barang yang diangkut dari Labuan ke kawasan utama kastam**

**90c.** Orang yang menjaga mana-mana kenderaan, vesel atau kapal udara yang di dalamnya barang-barang diangkut dari Labuan ke kawasan utama kastam hendaklah membuat suatu akuan yang pada keseluruhan isinya mengikut borang yang ditetapkan dengan memberikan butir-butir barang yang diangkut dalam kenderaan, vesel atau kapal udara itu.

**Barang-barang berduti hendaklah disifatkan sebagai tidak berduti semasa berada di Labuan**

**90d.** Apa-apa barang berduti, selain yang diisytiharkan oleh Menteri di bawah perenggan 90A(1)(a) atau disifatkan sebagai telah diisytiharkan oleh Menteri di bawah perenggan itu, hendaklah, semasa berada di Labuan, disifatkan sebagai barang-barang tidak berduti dan peruntukan Akta ini hendaklah ditafsirkan sewajarnya.

**Pemungutan duti di Labuan**

**90E.** Dalam membuat peraturan-peraturan di bawah seksyen 85 Menteri boleh membuat peruntukan—

- (a) bagi pemungutan di Labuan duti eksais yang kena dibayar berkenaan dengan barang-barang yang diangkut atau hampir hendak diangkut dari atau ke Labuan ke atau dari kawasan utama kastam;
- (b) bagi batasan atau sekatan tentang vesel dan pesawat udara yang boleh digunakan untuk mengangkut barang-barang itu; dan
- (c) bagi pelesenan atau pengawalan orang atau kenderaan, vesel atau kapal udara yang mengangkut barang-barang itu.

**Pemakaian peruntukan yang berhubungan dengan pulang balik bagi barang-barang yang diangkut ke Labuan**

**90F.** Peruntukan yang berhubungan dengan pulang balik di bawah Akta ini hendaklah terpakai bagi barang-barang (selain barang-barang yang diisytiharkan oleh Menteri di bawah perenggan 90A(1)(a) atau disifatkan sebagai telah diisytiharkan oleh Menteri di bawah perenggan itu), yang diangkut dari kawasan utama kastam ke Labuan seolah-olah barang-barang itu telah dieksport semula.

**BAHAGIAN XV****PERUNTUKAN KHAS BERKENAAN  
DENGAN SABAH DAN SARAWAK****Perjanjian antara Sabah dengan Sarawak berhubung dengan pemindahan barang-barang**

**91.** (1) Walau apa pun yang berlawanan dalam Akta ini apa-apa perjanjian yang berkuat kuasa mengenai Sabah dan Sarawak berhubung



dengan pemindahan barang-barang antara Negeri itu hendaklah, melainkan jika selainnya diarahkan oleh Menteri, berkuat kuasa dengan apa-apa ubah suaian sebagaimana yang dinyatakan oleh Menteri melalui pemberitahuan dalam *Warta Kerajaan Sabah dan Sarawak*.

(2) Walau apa pun apa-apa jua yang berlawanan yang terkandung dalam Akta ini, seksyen 40A tidak terpakai di Sabah dan Sarawak bagi—

(a) mana-mana vesel, yang nakhodanya telah memuaskan hati pegawai yang hak bahawa kemasukan vesel itu ke dalam perairan Malaysia disebabkan oleh hal keadaan di luar kawalannya, dan bahawa kemasukan vesel itu dan sebab kemasukannya dilaporkan kepada pihak berkuasa kastam atau pihak berkuasa polis yang berhampiran sekali sebaik sahaja dia mendapat peluang yang sesuai, dan bahawa selepas kemasukan itu tiada seorang pun di atas vesel itu atau yang berkaitan dengan vesel itu telah melakukan apa-apa perbuatan yang berlawanan dengan mana-mana undang-undang bertulis; atau

(b) mana-mana lancang tempatan jika orang yang menjaganya boleh menunjukkan dengan memuaskan hati seorang pegawai yang hak bahawa dia telah datang dari suatu tempat berlepas yang tidak lazim diberi atau dibawa darinya pelepasan atau daftar muatan.

(3) Walau apa pun apa-apa jua yang berlawanan yang terkandung dalam Akta ini, semua duti eksais yang kena dibayar di Sarawak di bawah Akta ini hendaklah dibayar dalam suatu tempoh selepas tarikh pengimportan atau muatan barang-barang bagi pemindahan mengikut mana-mana yang berkenaan, sebagaimana yang diperuntukkan oleh Menteri melalui peraturan-peraturan yang dibuat, atau jika tiada apa-apa peraturan-peraturan sedemikian, sebelum barang-barang itu dipindahkan daripada kawalan eksais:

Dengan syarat bahawa duti eksais ke atas barang-barang yang disimpan dalam sesuatu gudang kastam berlesen atau gudang yang diluluskan menurut mana-mana peraturan-peraturan yang dibuat di

bawah Akta ini bagi maksud itu hendaklah dibayar pada masa dan mengikut cara sebagaimana yang ditetapkan oleh peraturan-peraturan itu.

#### BAHAGIAN XV A

#### PERUNTUKAN KHAS BERKENAAN DENGAN LANGKAWI

#### Tafsiran

**91A.** Dalam Bahagian ini, melainkan jika konteksnya menghendaki makna yang lain-lain—

“kawasan utama kastam” ertinya Malaysia tidak termasuk Labuan, Langkawi, Tioman dan Pangkor;

“Langkawi” ertinya Pulau Langkawi dan semua pulau yang berdampingan dan terletak lebih hampir dengan Pulau Langkawi daripada dengan tanah besar.

#### Barang-barang kena duti di Langkawi

**91B.** Peruntukan Akta ini tidaklah terpakai bagi barang-barang yang dikilang di atau yang diimport masuk ke Langkawi, selain barang-barang yang boleh diisytiharkan oleh Menteri dari semasa ke semasa melalui perintah yang disiarkan dalam *Warta*.

#### Barang-barang yang dikilang di Langkawi hendaklah disifatkan sebagai dikilang di luar Malaysia

**91c.** Barang-barang yang tertakluk kepada duti eksais, selain daripada yang disebut dalam seksyen 91B, apabila dikilang di luar Malaysia dan apabila dipindahkan dari Langkawi ke wilayah yang lain dalam Malaysia hendaklah disifatkan sebagai pengimportan masuk ke wilayah itu dan peruntukan Akta Kastam 1967 hendaklah terpakai.

**Barang-barang yang dikilang di wilayah lain dalam Malaysia hendaklah disifatkan sebagai eksport apabila dipindahkan ke Langkawi**

**91D.** Barang-barang yang tertakluk kepada duti eksais, selain daripada yang disebut dalam seksyen 91B, yang dikilang di wilayah lain dalam Malaysia apabila dipindahkan ke Langkawi hendaklah disifatkan sebagai pengeksporan dari wilayah itu ke suatu tempat di luar Malaysia bagi maksud seksyen 19 dan perenggan 28(d).

**Duti eksais yang berhubungan dengan Langkawi**

**91DA.** (1) Walau apa pun apa-apa jua yang berlawanan yang terkandung dalam Akta ini—

- (a) tiada duti eksais kena dibayar ke atas apa-apa barang yang diimport masuk ke Langkawi, selain barang-barang yang diisytiharkan oleh Menteri dari semasa ke semasa melalui perintah yang disiarkan dalam *Warta*;
- (b) duti eksais hendaklah kena dibayar atas semua barang berduti yang diangkut ke kawasan utama kastam dari Langkawi bagi segala maksud seolah-olah pengangkutan ke kawasan utama kastam itu ialah pengimportan ke dalam Malaysia;
- (c) Menteri boleh, melalui perintah, menetapkan erti perkataan “nilai” berhubung dengan barang-barang yang diangkut dari Langkawi ke kawasan utama kastam.

(2) Subseksyen 6(2), (3), (4), dan (5) hendaklah terpakai bagi apa-apa perintah yang dibuat oleh Menteri di bawah perenggan (1)(a).

(3) Tiada apa-apa jua dalam seksyen ini boleh menjadikan tidak terpakai bagi Langkawi apa-apa duti eksais lain yang boleh ditetapkan oleh Menteri di bawah subseksyen 6(1).

**Pengangkutan barang-barang ke atau dari Langkawi dari atau ke kawasan utama kastam**

**91DB.** Jika barang-barang diangkut—

(a) dari Langkawi ke kawasan utama kastam; atau

(b) dari kawasan utama kastam ke Langkawi,

peruntukan Akta ini hendaklah, dengan apa-apa ubah suaian dan penyesuaian sebagaimana yang perlu, terpakai seolah-olah barang-barang itu telah diimport masuk ke dalam atau, mengikut mana-mana yang berkenaan, dieksport dari, kawasan utama kastam dari atau ke suatu tempat di luar Malaysia, dan tanpa menjejaskan keluasan makna di atas, peruntukan Bahagian X hendaklah terpakai bagi barang-barang yang diangkut ke atau dari Langkawi dari atau ke kawasan utama kastam dan bagi orang dan kenderaan, vesel dan kapal udara yang mengangkut barang-barang itu.

**Akuan tentang barang-barang yang diangkut dari Langkawi ke kawasan utama kastam**

**91DC.** Orang yang menjaga mana-mana kenderaan, vesel atau kapal udara yang di dalamnya barang-barang diangkut dari Langkawi ke kawasan utama kastam hendaklah membuat suatu akuan yang pada keseluruhan isinya mengikut borang yang ditetapkan dengan memberikan butir-butir barang yang diangkut dalam kenderaan, vesel atau kapal udara itu.

**Barang-barang berduti hendaklah disifatkan sebagai tidak berduti semasa berada di Langkawi**

**91DD.** Apa-apa barang berduti, selain barang-barang yang diisytiharkan oleh Menteri di bawah perenggan 91DA(1)(a) atau disifatkan sebagai telah diisytiharkan oleh Menteri di bawah perenggan itu, hendaklah, semasa berada di Langkawi, disifatkan sebagai barang-barang tidak berduti dan peruntukan Akta ini hendaklah ditafsirkan sewajarnya.

**Pemungutan duti di Langkawi**

**91DE.** Dalam membuat peraturan-peraturan di bawah seksyen 85 Menteri boleh membuat peruntukan—

- (a) bagi pemungutan di Langkawi duti eksais yang kena dibayar berkenaan dengan barang-barang yang diangkut atau hampir hendak diangkut dari atau ke Langkawi ke atau dari kawasan utama kastam;
- (b) bagi batasan atau sekatan tentang vesel dan pesawat udara yang boleh digunakan untuk mengangkut barang-barang itu; dan
- (c) bagi pelesenan atau pengawalan orang atau kenderaan, vesel atau kapal udara yang mengangkut barang-barang itu.

**Pemakaian peruntukan yang berhubungan dengan pulang balik bagi barang-barang yang diangkut ke Langkawi**

**91DF.** Peruntukan yang berhubungan dengan pulang balik di bawah Akta ini hendaklah terpakai bagi barang-barang selain barang-barang yang diisytiharkan oleh Menteri di bawah perenggan 91DA(1)(a) atau disifatkan sebagai telah diisytiharkan oleh Menteri di bawah perenggan tersebut, yang diangkut dari kawasan utama kastam ke Langkawi seolah-olah barang-barang itu telah dieksport semula.

## BAHAGIAN XV B

PERUNTUKAN KHAS BERKENAAN  
DENGAN TIOMAN**Tafsiran**

**91E.** Dalam Bahagian ini, melainkan jika konteksnya menghendaki makna yang lain—

“kawasan utama kastam” ertinya Malaysia tidak termasuk Labuan, Langkawi, Tioman dan Pangkor;

“Tioman” ertinya Pulau Tioman dan pulau-pulau Soyak, Rengis, Tumok, Tulai, Chebeh, Labas, Sepoi dan Jahat.

### **Barang-barang kena duti di Tioman**

**91F.** Peruntukan Akta ini tidaklah terpakai bagi barang-barang yang dikilang di atau yang diimport masuk ke Tioman, selain barang-barang yang boleh diisytiharkan oleh Menteri dari semasa ke semasa melalui perintah yang disiarkan dalam *Warta*.

### **Barang-barang yang dikilang di Tioman hendaklah disifatkan telah dikilang di luar Malaysia**

**91G.** Barang-barang yang tertakluk kepada duti eksais, selain yang disebut dalam seksyen 91F, apabila dikilang di Tioman hendaklah disifatkan telah dikilang di luar Malaysia dan apabila dipindahkan dari Tioman ke wilayah lain di dalam Malaysia hendaklah disifatkan telah diimport ke wilayah itu dan peruntukan Akta Kastam 1967 hendaklah terpakai.

### **Barang-barang yang dikilang di wilayah lain di dalam Malaysia hendaklah disifatkan telah dieksport apabila dipindahkan ke Tioman**

**91H.** Barang-barang yang tertakluk kepada duti eksais, selain yang disebut dalam seksyen 91F, yang dikilang di wilayah lain di dalam Malaysia dan apabila dipindahkan ke Tioman hendaklah disifatkan telah dieksport dari wilayah itu ke suatu tempat di luar Malaysia bagi maksud seksyen 19 dan perenggan 28(d).

### **Duti eksais yang berhubungan dengan Tioman**

**91I.** (1) Walau apa pun apa-apa jua yang berlawanan yang terkandung dalam Akta ini—

- (a) tiada duti eksais kena dibayar ke atas apa-apa barang yang diimport masuk ke Tioman, selain barang-barang yang diisytiharkan oleh Menteri dari semasa ke semasa melalui perintah yang disiarkan dalam *Warta*;
- (b) duti eksais hendaklah kena dibayar atas semua barang berduti yang diangkut ke kawasan utama kastam dari Tioman bagi segala maksud seolah-olah pengangkutan ke kawasan utama kastam itu ialah pengimportan ke dalam Malaysia; dan
- (c) Menteri boleh melalui perintah, menetapkan erti perkataan “nilai” berhubung dengan barang-barang yang diangkut dari Tioman ke kawasan utama kastam.

(2) Subseksyen 6(2), (3), (4) dan (5) hendaklah terpakai bagi apa-apa perintah yang dibuat oleh Menteri di bawah perenggan (1)(a).

(3) Tiada apa-apa jua dalam seksyen ini boleh menjadikan tidak terpakai bagi Tioman apa-apa duti eksais lain yang boleh ditetapkan oleh Menteri di bawah subseksyen 6(1).

### **Pengangkutan barang-barang ke atau dari Tioman dari atau ke kawasan utama kastam**

**91j.** Jika barang-barang diangkut—

- (a) dari Tioman ke kawasan utama kastam; atau
- (b) dari kawasan utama kastam ke Tioman,

peruntukan-peruntukan Akta ini hendaklah, dengan apa-apa ubah suaian dan penyesuaian sebagaimana yang perlu, terpakai seolah-olah barang-barang itu telah diimport masuk ke dalam atau, mengikut mana-mana yang berkenaan, dieksport dari, kawasan utama kastam dari atau ke suatu tempat di luar Malaysia, dan tanpa menjejaskan keluasan makna di atas, peruntukan Bahagian X hendaklah terpakai bagi barang-barang yang diangkut ke atau dari Tioman dari atau ke

kawasan utama kastam dan bagi orang dan kenderaan, vesel dan kapal udara yang mengangkut barang-barang itu.

**Akuan barang-barang yang diangkut dari Tioman ke kawasan utama kastam**

**91K.** Orang yang menjaga mana-mana kenderaan, vesel atau kapal udara yang di dalamnya barang-barang diangkut dari Tioman ke kawasan utama kastam hendaklah membuat suatu akuan yang pada keseluruhan isinya mengikut borang yang ditetapkan dengan memberikan butir-butir barang yang diangkut dalam kenderaan, vesel atau kapal udara itu.

**Barang-barang berduti hendaklah disifatkan sebagai tidak berduti semasa berada di Tioman**

**91L.** Apa-apa barang berduti, selain barang-barang yang diisytiharkan oleh Menteri di bawah perenggan 91I(1)(a) atau disifatkan sebagai telah diisytiharkan oleh Menteri di bawah perenggan itu hendaklah, semasa berada di Tioman, disifatkan sebagai barang-barang tidak berduti dan peruntukan Akta ini hendaklah ditafsirkan sewajarnya.

**Pemungutan duti di Tioman**

**91M.** Dalam membuat peraturan-peraturan di bawah seksyen 85 Menteri boleh membuat peruntukan—

- (a) bagi pemungutan di Tioman duti eksais yang kena dibayar berkenaan dengan barang-barang yang diangkut atau hampir hendak diangkut dari atau ke Tioman ke atau dari kawasan utama kastam;
- (b) bagi batasan atau sekatan tentang vesel dan pesawat udara yang boleh digunakan bagi mengangkut barang-barang itu; dan



- (c) bagi pelesenan atau pengawalan orang atau kenderaan, vesel atau kapal udara yang mengangkut barang-barang itu.

### **Pemakaian peruntukan yang berhubungan dengan pulang balik bagi barang-barang yang diangkut ke Tioman**

**91N.** Peruntukan yang berhubungan dengan pulang balik di bawah Akta ini hendaklah terpakai bagi barang-barang selain barang-barang yang diisytiharkan oleh Menteri di bawah perenggan 91i(1)(a) atau disifatkan sebagai telah diisytiharkan oleh Menteri di bawah perenggan itu, yang diangkut dari kawasan utama kastam ke Tioman seolah-olah barang-barang itu telah dieksport semula.

## BAHAGIAN XVc

### PERUNTUKAN KHAS BERKENAAN DENGAN KAWASAN PEMBANGUNAN BERSAMA

#### **Pemindahan barang ke dalam atau dari Kawasan Pembangunan Bersama**

**91o.** (1) Pemindahan barang-barang dari sesuatu negara selain Malaysia atau Negara Thailand atau dari gudang berlesen di Malaysia atau Negara Thailand ke dalam Kawasan Pembangunan Bersama hendaklah disifatkan sebagai pengimportan barang-barang itu ke dalam Kawasan Pembangunan Bersama.

(2) Pemindahan barang-barang yang dikeluarkan di Kawasan Pembangunan Bersama dari Kawasan Pembangunan Bersama ke dalam Malaysia, Negara Thailand atau mana-mana negara lain hendaklah disifatkan sebagai pengeksportan barang-barang itu dari Kawasan Pembangunan Bersama.

(3) Pemindahan barang-barang dari Malaysia atau Negara Thailand ke dalam Kawasan Pembangunan Bersama untuk digunakan dalam Kawasan Pembangunan Bersama dan pemindahan barang-barang itu dari Kawasan Pembangunan Bersama ke dalam

Malaysia atau Negara Thailand hendaklah disifatkan sebagai pemindahan dalaman barang-barang itu.

### **Duti eksais kena dibayar ke atas pengimportan ke dalam Kawasan Pembangunan Bersama**

**91p.** Duti eksais hendaklah kena dibayar atas barang-barang yang diimport ke dalam Kawasan Pembangunan Bersama.

#### BAHAGIAN XVD

#### PERUNTUKAN KHAS BERKENAAN DENGAN PANGKOR

#### **Tafsiran**

**91q.** Dalam Bahagian ini, melainkan jika konteksnya menghendaki makna yang lain—

“Pangkor” ertinya Pulau Pangkor, Pulau Mentagor, Pulau Giam, Pulau Simpan, Pulau Tukun Terindak, Pulau Pelanduk, Pulau Anak Pelanduk, Pulau Landak, Batu Orang Tua dan Batu Jambal;

“kawasan utama kastam” ertinya Malaysia tidak termasuk Labuan, Langkawi, Tioman dan Pangkor.

#### **Barang-barang kena duti di Pangkor**

**91r.** Peruntukan Akta ini tidaklah terpakai bagi barang-barang yang dikilang di atau diimport masuk ke dalam Pangkor, selain barang-barang yang diisytiharkan oleh Menteri dari semasa ke semasa melalui perintah yang disiarkan dalam *Warta*.

**Barang-barang yang dikilang di Pangkor hendaklah disifatkan sebagai dikilang di luar Malaysia**

**91s.** Barang-barang yang tertakluk kepada duti eksais, selain yang disebut dalam seksyen 91R, apabila dikilang di Pangkor hendaklah disifatkan sebagai dikilang di luar Malaysia dan apabila dipindahkan dari Pangkor ke wilayah-wilayah lain dalam Malaysia hendaklah disifatkan sebagai diimport masuk ke wilayah-wilayah itu dan peruntukan Akta Kastam 1967 hendaklah terpakai.

**Barang-barang yang dikilang di wilayah-wilayah lain dalam Malaysia hendaklah disifatkan sebagai dieksport apabila dipindahkan ke dalam Pangkor**

**91t.** Barang-barang yang tertakluk kepada duti eksais, selain yang disebut dalam seksyen 91R, yang dikilang di wilayah-wilayah lain di dalam Malaysia apabila dipindahkan ke Pangkor hendaklah disifatkan sebagai dieksport dari wilayah-wilayah itu ke suatu tempat di luar Malaysia bagi maksud seksyen 19 dan perenggan 28(d).

**Duti eksais yang berhubungan dengan Pangkor**

**91u.** (1) Walau apa pun apa-apa jua yang berlawanan yang terkandung dalam Akta ini—

- (a) tiada duti eksais kena dibayar ke atas apa-apa barang-barang yang diimport masuk ke dalam Pangkor, selain barang-barang yang diisytiharkan oleh Menteri dari semasa ke semasa melalui perintah yang disiarkan dalam *Warta*;
- (b) duti eksais hendaklah kena dibayar atas semua barang-barang berduti yang diangkut ke kawasan utama kastam dari Pangkor seolah-olah pengangkutan ke kawasan utama kastam itu ialah pengimportan ke dalam Malaysia; dan
- (c) Menteri boleh, melalui perintah, menetapkan erti perkataan “nilai” berhubung dengan barang-barang yang diangkut dari Pangkor ke kawasan utama kastam.

(2) Subseksyen 6(2), (3), (4) dan (5) hendaklah terpakai bagi apa-apa perintah yang dibuat oleh Menteri di bawah perenggan (1)(a).

(3) Tiada apa-apa dalam seksyen ini boleh menjadikan tidak terpakai bagi Pangkor apa-apa duti eksais lain yang boleh ditetapkan oleh Menteri di bawah subseksyen 6(1).

### **Pengangkutan barang-barang ke atau dari Pangkor dari atau ke kawasan utama kastam**

**91v.** Jika barang-barang diangkut—

(a) dari Pangkor ke kawasan utama kastam; atau

(b) dari kawasan utama kastam ke Pangkor,

peruntukan Akta ini hendaklah, dengan apa-apa ubah suaian dan penyesuaian yang perlu, terpakai seolah-olah barang-barang itu telah diimport ke dalam atau, mengikut mana-mana yang berkenaan, dieksport dari, kawasan utama kastam dari atau ke suatu tempat di luar Malaysia, dan tanpa menjejaskan keluasan makna di atas, peruntukan Bahagian X hendaklah terpakai bagi barang-barang yang diangkut ke atau dari Pangkor dari atau ke kawasan utama kastam dan bagi orang, kenderaan, vesel dan kapal udara yang mengangkut barang-barang itu.

### **Akuan mengenai barang-barang yang diangkut dari Pangkor ke kawasan utama kastam**

**91w.** Orang yang menjaga mana-mana kenderaan, vesel atau kapal udara yang di dalamnya barang-barang diangkut dari Pangkor ke kawasan utama kastam hendaklah membuat suatu akuan yang pada keseluruhan isinya mengikut borang yang ditetapkan dengan memberikan butir-butir barang-barang yang diangkut dalam kenderaan, vesel atau kapal udara itu.

### **Barang-barang berduti hendaklah disifatkan sebagai tidak berduti semasa berada di Pangkor**

**91x.** Apa-apa barang-barang berduti, selain barang-barang yang diisytiharkan oleh Menteri di bawah perenggan 91u(1)(a) hendaklah, semasa berada di Pangkor, disifatkan sebagai barang-barang tidak berduti dan peruntukan Akta ini hendaklah ditafsirkan dengan sewajarnya.

### **Pemungutan duti di Pangkor**

**91y.** Dalam membuat peraturan-peraturan di bawah seksyen 85 Menteri boleh memperuntukkan—

- (a) bagi pemungutan di Pangkor duti eksais yang kena dibayar berkenaan dengan barang-barang yang diangkut atau hampir hendak diangkut dari atau ke Pangkor ke atau dari kawasan utama kastam;
- (b) bagi batasan atau sekatan kenderaan, vesel dan kapal udara yang boleh digunakan untuk mengangkut barang-barang itu; dan
- (c) bagi pelesenan atau pengawalan orang atau kenderaan, vesel atau kapal udara yang mengangkut barang-barang itu.

### **Pemakaian peruntukan yang berhubungan dengan pulangan cukai bagi barang-barang yang diangkut ke Pangkor**

**91z.** Peruntukan yang berhubungan dengan pulangan cukai di bawah Akta ini hendaklah terpakai bagi barang-barang, selain barang-barang yang diisytiharkan oleh Menteri di bawah perenggan 91u(1)(a), yang diangkut dari kawasan utama kastam ke Pangkor seolah-olah barang-barang itu telah dieksport semula.

## **BAHAGIAN XVI**

### **PEMANSUHAN**

#### **Pemansuhan dan kecualian**

**92.** Undang-undang bertulis yang dinyatakan dalam Jadual kepada Akta ini adalah dengan ini dimansuhkan kecuali setakat mana undang-undang itu berhubung dengan tadi:

Dengan syarat bahawa sesuatu pelantikan yang dibuat, kewajipan yang ditanggungkan, lesen yang dikeluarkan, dan kaedah-kaedah atau peraturan-peraturan yang dibuat di bawah mana-mana daripada undang-undang bertulis yang dimansuhkan dengan ini hendaklah, setakat mana ianya tidak berlawanan dengan Akta ini, tetap berkuat kuasa sehingga peruntukan lain dibuat baginya di bawah Akta ini.

---

JADUAL

[Seksyen 92]

Akta P.T.M. 34 tahun 1961	Akta Eksais 1961
Akta Malaysia 18 tahun 1966	Akta Kastam (Tarif Bersama Malaysia) 1966
Ordinan Sabah No. 18 tahun 1959	Ordinan Eksais 1959
Bab 73 Sabah	Ordinan Hasil Liquor
Bab 27 Sarawak	Ordinan Eksais

---

**UNDANG-UNDANG MALAYSIA****Akta 176****AKTA EKSAIS 1976**

## SENARAI PINDAAN

Undang-undang yang meminda	Tajuk ringkas	Berkuat kuasa dari
Akta A73	Akta Eksais (Pindaan) (No. 2) 1971	01-03-1962
Akta A36	Akta Eksais (Pindaan) 1971	30-04-1971
Akta 293	Akta Kewangan 1983	21-10-1983
Akta 329	Akta Kewangan (No. 2) 1986	01-01-1987
Akta A781	Akta Eksais (Pindaan) 1990	31-08-1990
Akta 451	Akta Kewangan 1991	14-12-1990 pada pukul 4.00 petang
Akta 438	Akta Zon Bebas 1990	05-09-1991
Akta A874	Akta Eksais (Pindaan) 1994	04-03-1994
Akta A922	Akta Eksais (Pindaan) 1995	21-07-1995
Akta A1059	Akta Eksais (Pindaan) 1999	01-01-2000
Akta A1112	Akta Eksais (Pindaan) 2001	06-07-2001
Akta A1164	Akta Eksais (Pindaan) 2002	01-09-2002
Akta A1184	Akta Eksais (Pindaan) (No. 2) 2002	01-01-2003
Akta A1245	Akta Eksais (Pindaan) 2005	20-10-2005
Akta A1284	Akta Eksais (Pindaan) 2007	01-04-2007 Kecuali per. 2(b), s. 5, 6 dan ss. 9(2), (3) dan 4; 01-06-2007 per. 2(b), s. 5, 6

160

*Undang-Undang Malaysia*

**AKTA 176**

Undang-undang  
yang meminda

Tajuk ringkas

Berkuat kuasa  
dari

dan ss. 9(2), (3)  
dan (4)

Akta A1581

Akta Eksais (Pindaan) 2018

02-01-2019

Akta A1594

Akta Eksais (Pindaan) 2019

01-01-2020

Akta A1629

Akta Eksais (Pindaan) 2020

01-01-2021

---



## UNDANG-UNDANG MALAYSIA

### Akta 176

### AKTA EKSAIS 1976

#### SENARAI SEKSYEN YANG DIPINDA

Seksyen	Kuasa meminda	Berkuat kuasa dari
2	Akta A781 Akta 438 Akta A874 Akta A922 Akta A1059 Akta A1184 Akta A1245 Akta A1284	31-08-1990 05-09-1991 04-03-1994 21-07-1995 01-01-2000 01-01-2003 20-10-2005 01-04-2007 Kecuali per. 2(b), s. 5, 6 dan ss 9(2), (3) dan 4; 01-06-2007 per. 2(b), s. 5, 6 dan ss. 9(2), (3) dan (4)
	Akta A1581 Akta A1594	02-01-2019 01-01-2020
4	Akta A781 Akta A1594	31-08-1990 01-01-2020
4A	Akta A1594	01-01-2020
5	Akta A1059	01-01-2000
Bahagian IIA	Akta A1594	01-01-2020
5A	Akta A1284	01-04-2007 Kecuali per. 2(b), s. 5, 6 dan ss 9(2), (3) dan 4; 01-06-2007 per. 2(b), s. 5, 6 dan ss. 9(2), (3) dan (4)

Seksyen	Kuasa meminda	Berkuat kuasa dari
5B	Akta A1284	01-04-2007 Kecuali per. 2(b), s. 5, 6 dan ss 9(2), (3) dan 4; 01-06-2007 per. 2(b), s. 5, 6 dan ss. 9(2), (3) dan (4)
	Akta A1581	02-01-2019
5C-5E	Akta A1284	01-04-2007 Kecuali per. 2(b), s. 5, 6 dan ss 9(2), (3) dan 4; 01-06-2007 per. 2(b), s. 5, 6 dan ss. 9(2), (3) dan (4)
5F	Akta A1594	01-01-2020
6	Akta 293 Akta A1184 Akta A1594	21-10-1983 01-01-2003 01-01-2020
6A	Akta A1594	01-01-2020
8	Akta A1184	01-01-2003
8A	Akta A1184	01-01-2003
8B	Akta A1184	01-01-2003
11	Akta A1184	01-01-2003
11A	Akta A1184 Akta A1594	01-01-2003 01-01-2020
12	Akta 293	21-10-1983
13	Akta 293 Akta A1184 Akta A1594	21-10-1983 01-01-2003 01-01-2020

Seksyen	Kuasa meminda	Berkuat kuasa dari
14	Akta A781 Akta A1594	31-08-1990 01-01-2020
15	Akta A781 Akta A1059 Akta A1594	31-08-1990 01-01-2000 01-01-2020
15A	Akta A1059 Akta A1594	01-01-2000 01-01-2020
15B	Akta A1594	01-01-2020
16	Akta A781 Akta A1184 Akta A1594	31-08-1990 01-01-2003 01-01-2020
17	Akta A1184	01-01-2003
18A	Akta A1184 Akta A1284	01-01-2003 01-04-2007 Kecuali per. 2(b), s. 5, 6 dan ss. 9(2), (3) dan 4; 01-06-2007 per. 2(b), s. 5, 6 dan ss. 9(2), (3) dan (4)
19	Akta A781 Akta A1629	31-08-1990 01-01-2021
19A	Akta A1184 Akta A1594 Akta A1629	01-01-2003 01-01-2020 01-01-2021
19B	Akta A1184 Akta A1594	01-01-2003 01-01-2020
19C	Akta A1184	01-01-2003
19D	Akta A1184 Akta A1594	01-01-2003 01-01-2020
19E	Akta A1184	01-01-2003

Seksyen	Kuasa meminda	Berkuat kuasa dari
19F	Akta A1184	01-01-2003
19G	Akta A1594	01-01-2020
20	Akta A1594	01-01-2020
21	Akta A1594	01-01-2020
23	Akta A781 Akta A1184 Akta A1594	31-08-1990 01-01-2003 01-01-2020
23A	Akta A781 Akta A1059 Akta A1184 Akta A1594	31-08-1990 01-01-2000 01-01-2003 01-01-2020
23B	Akta A781 Akta A1059 Akta A1184 Akta A1594	31-08-1990 01-01-2000 01-01-2003 01-01-2020
24	Akta A1594	01-01-2020
26	Akta A781 Akta A1594	31-08-1990 01-01-2020
27A	Akta A1184 Akta A1594	01-01-2003 01-01-2020
27AB	Akta A1594	01-01-2020
27B	Akta A1184	01-01-2003
27C	Akta A1184	01-01-2003
28	Akta 293 Akta A781 Akta A1184 Akta A1594	21-10-1983 31-08-1990 01-01-2003 01-01-2020
30	Akta A1594	01-01-2020

Seksyen	Kuasa meminda	Berkuat kuasa dari
32	Akta A781 Akta A1594	31-08-1990 01-01-2020
33	Akta A781	31-08-1990
35	Akta A1594	01-01-2020
40A	Akta A1184	01-01-2003
40B	Akta A1184	01-01-2003
40C	Akta A1184	01-01-2003
40D	Akta A1184 Akta A1594	01-01-2003 01-01-2020
40E	Akta A1184	01-01-2003
40F	Akta A1184	01-01-2003
40G	Akta A1184 Akta A1594	01-01-2003 01-01-2020
41A	Akta A1184	01-01-2003
41B	Akta A1184 Akta A1594	01-01-2003 01-01-2020
41BA	Akta A1594	01-01-2020
41C	Akta A1184 Akta A1594	01-01-2003 01-01-2020
41D	Akta A1184 Akta A1594	01-01-2003 01-01-2020
42	Akta A1059 Akta A1112	01-01-2000 06-07-2001
42A	Akta A1184 Akta A1594	01-01-2003 01-01-2020
42B	Akta A1184	01-01-2003

Seksyen	Kuasa meminda	Berkuat kuasa dari
44	Akta A1184 Akta A1594	01-01-2003 01-01-2020
44A	Akta A1184	01-01-2003
44B	Akta A1594	01-01-2020
46	Akta A1594	01-01-2020
47	Akta A1284  Akta A1581	01-04-2007 Kecuali per. 2(b), s. 5, 6 dan ss. 9(2), (3) dan 4; 01-06-2007 per. 2(b), s. 5, 6 dan ss. 9(2), (3) dan (4) 02-01-2019
47A	Akta A1184 Akta A1284	01-01-2003 01-04-2007 Kecuali per. 2(b), s. 5, 6 dan ss. 9(2), (3) dan 4; 01-06-2007 per. 2(b), s. 5, 6 dan ss. 9(2), (3) dan (4)
48	Akta A874	04-03-1994
49	Akta A1594	01-01-2020
50A	Akta A1184 Akta A1581	01-01-2003 02-01-2019
50B	Akta A1629	01-01-2021
51	Akta A1594	01-01-2020
53	Akta A1184	01-01-2003
53A	Akta A1112 Akta A1594	06-07-2001 01-01-2020

Seksyen	Kuasa meminda	Berkuat kuasa dari
53B	Akta A1184 Akta A1594	01-01-2003 01-01-2020
53C	Akta A1184	01-01-2003
54	Akta A781 Akta A1594 Akta A1629	31-08-1990 01-01-2020 01-01-2021
55	Akta A781 Akta A1112 Akta A1594	31-08-1990 06-07-2001 01-01-2020
55A	Akta A781	31-08-1990
56	Akta A1112 Akta A1594	06-07-2001 01-01-2020
56A	Akta A1184	01-01-2003
56B	Akta A1184	01-01-2003
56C	Akta A1184	01-01-2003
56D	Akta A1184	01-01-2003
56E	Akta A1629	01-01-2021
57	Akta A1112	06-07-2001
58	Akta A781 Akta A1184	31-08-1990 01-01-2003
59	Akta A1184	01-01-2003
59A	Akta A1581	02-01-2019
60	Akta A1112	06-07-2001
61	Akta A1594	01-01-2020
61A	Akta A1594	01-01-2020

Seksyen	Kuasa meminda	Berkuat kuasa dari
62	Akta A1594	01-01-2020
62A	Akta A1184	01-01-2003
62B	Akta A1184	01-01-2003
62C	Akta A1184 Akta A1594	01-01-2003 01-01-2020
63A	Akta A1112 Akta A1594	06-07-2001 01-01-2020
64A	Akta A1184 Akta A1594	01-01-2003 01-01-2020
65	Akta A1594	01-01-2020
66	Akta A781	31-08-1990
67	Akta A781 Akta A1184 Akta A1594	31-08-1990 01-01-2003 01-01-2020
68	Akta A781 Akta A1184	31-08-1990 01-01-2003
69	Akta 293 Akta A781 Akta A1112 Akta A1184 Akta A1594	21-10-1983 31-08-1990 06-07-2001 01-01-2003 01-01-2020
69A	Akta A1594	01-01-2020
71	Akta A1184 Akta A1581	01-01-2003 02-01-2019
72	Akta A1184	01-01-2003
73	Akta 293 Akta A1581	21-10-1983 02-01-2019
74	Akta 293 Akta A1184	21-10-1983 01-01-2003



Seksyen	Kuasa meminda	Berkuat kuasa dari
	Akta A1284	01-04-2007 Kecuali per. 2(b), s. 5, 6 dan ss. 9(2), (3) dan 4; 01-06-2007 per. 2(b), s. 5, 6 dan ss. 9(2), (3) dan (4)
	Akta A1581	02-01-2019
	Akta A1594	01-01-2020
74A	Akta A1594	01-01-2020
74B	Akta A1594	01-01-2020
74C	Akta A1594	01-01-2020
	Akta A781	31-08-1990
75	Akta A1594	01-01-2020
76	Akta A1581	02-01-2019
	Akta A1184	01-01-2003
77	Akta A1581	02-01-2019
	Akta 293	21-10-1983
	Akta A1184	01-01-2003
	Akta A1581	02-01-2019
78	Akta A1594	01-01-2020
	Akta 293	21-10-1983
	Akta A781	31-08-1990
	Akta A1184	01-01-2003
	Akta A1581	02-01-2019
79		
	Akta 293	21-10-1983
81	Akta A1594	01-01-2020
81A	Akta A1184	01-01-2003
82	Akta A1112	06-07-2001
	Akta A1581	02-01-2019
82A	Akta A1594	01-01-2020

Seksyen	Kuasa meminda	Berkuat kuasa dari
85	Akta A1184	01-01-2003
	Akta A1284	01-04-2007
		Kecuali per. 2(b), s. 5, 6 dan ss. 9(2), (3) dan 4; 01-06-2007 per. 2(b), s. 5, 6 dan ss. 9(2), (3) dan (4)
	Akta A1581	02-01-2019
	Akta A1594	01-01-2020
87	Akta A1184	01-01-2003
	Akta A1594	01-01-2020
88	Akta 451	14-12-1990 pada pukul 4.00 petang
	Akta A1164	01-09-2002
	Akta A1184	01-01-2003
90	Akta A1059	01-01-2000
90A	Akta A1184	01-01-2003
90B	Akta A1184	01-01-2003
	Akta A1594	01-01-2020
90C	Akta A1184	01-01-2003
	Akta A1594	01-01-2020
90D	Akta A1184	01-01-2003
90E	Akta A1184	01-01-2003
	Akta A1594	01-01-2020
90F	Akta A1184	01-01-2003
91	Akta A1184	01-01-2003
91A	Akta 329	01-01-1987
	Akta A1184	01-01-2003
	Akta A1594	01-01-2020

Seksyen	Kuasa meminda	Berkuat kuasa dari
91B	Akta 329 Akta A1164 Akta A1184	01-01-1987 01-09-2002 01-01-2003
91C	Akta 329	01-01-1987
91D	Akta 329 Akta A1059	01-01-1987 01-01-2000
91DA	Akta A1184	01-01-2003
91DB	Akta A1184 Akta A1594	01-01-2003 01-01-2020
91DC	Akta A1184 Akta A1594	01-01-2003 01-01-2020
91DD	Akta A1184	01-01-2003
91DE	Akta A1184 Akta A1594	01-01-2003 01-01-2020
91DF	Akta A1184	01-01-2003
91E	Akta A1164 Akta A1184 Akta A1594	01-09-2002 01-01-2003 01-01-2020
91F	Akta A1164 Akta A1184	01-09-2002 01-01-2003
91G	Akta A1164	01-09-2002
91H	Akta A1164	01-09-2002
91I	Akta A1184	01-01-2003
91J	Akta A1184 Akta A1594	01-01-2003 01-01-2020
91K	Akta A1184 Akta A1594	01-01-2003 01-01-2020
91L	Akta A1184	01-01-2003
91M	Akta A1184	01-01-2003

Seksyen	Kuasa meminda	Berkuat kuasa dari
	Akta A1594	01-01-2020
91N	Akta A1184	01-01-2003
91O	Akta A1184	01-01-2003
91P	Akta A1184	01-01-2003
91Q	Akta A1594	01-01-2020
91R	Akta A1594	01-01-2020
91S	Akta A1594	01-01-2020
91T	Akta A1594	01-01-2020
91U	Akta A1594	01-01-2020
91V	Akta A1594	01-01-2020
91W	Akta A1594	01-01-2020
91X	Akta A1594	01-01-2020
91Y	Akta A1594	01-01-2020
91Z	Akta A1594	01-01-2020

---